



killt ginn, fir eng Kärשמelz justement rechtzäiteg kënnen ze stoppen, wat jo dann eben déi geféierlech Situatioun wär.

Dës Mesurë sollten d'Konsequenze vun enger Attack vu d'heute op de Sitt limitéieren an den Impakt no baussen och dann esou kleng wéi méiglech halen.

Dës Verbesserung sinn ze begreifen, mä si kënnen, an, Här President, ech muss dem Deputéierten et soen, keng honnertprozenteg Garantie si géint all denkbar Attack. Et ass wichteg, dass d'Personal „gescreent“ gëtt, wéi een dat esou schéi seet, an dass ee ganz genau analyséiert, wien Zougang huet zu deene sensibelste Plazen an enger Atomkraftzentral.

En effektive Schutz géint all Impakt ass, sou wéi ech lech gesot hunn, net ginn an ass och net méiglech ze realiséieren. Dofir ass et vun héchster Wichtigkeet, dass och d'Lutte géint den Terrorismus, Här President, souwuel op nationalem wéi och op europäeschem an internationalem Niveau gefördert gëtt.

Op nationalem Niveau ass et fir eis ganz, ganz wichteg, dass déi Organer, déi sech beim Stat ëm d'Sécherheet këmmen, och e permanenten Échange hunn. Ganz oft huet jo, sou huet een héieren och aus dem Ausland, deen een, deen Informatiounen hat, deem anere se net ginn. Dat ass et also a verschidde Länner intern ginn. Dat huet een an der Belsch héieren elo zum Beispill bei de Fakten, an et huet een elo och héieren zum Beispill bei den Attentater vu Paräis, dass et eng Rëtsch Informatiounen gëtt, déi aner Geheimdénkschter zum Beispill vun anere Länner haten, déi se net onbedéngt deem anere Geheimdénkscht dann och all ginn hunn.

Mir sinn der Meinung, dass et wierklech wichteg ass, dass een do deen Échange huet. Hei zu Lëtzebuerg fonctionnéiert dat och. An ech soen och deenen Organer Merci. An dës Kollaboratioun ass och permanent.

An erlaabt mer, dass ech lech och soen, dass am Moment keng Informatiounen virleien, déi géifen op eng Preparatioun vun enger Terrorattack op Atomzentralen an eisen Nopeschlänner hindeiten.

Op internationalem Plang gëtt et eng Rëtsch vun Instrumenter, déi ech elo net hei alleguere kann opzielen. Mä ech erlabe mer, just als Beispill de Régime de contrôle de la technologie des missiles ze ernimmen, deem och Lëtzebuerg 1990 bäigetrueden ass. Op europäeschem Plang gëtt sech intensiv mam Thema vum Terrorismus a virun allem vun der Terrorismusbekämpfung beschäftegt.

An Dir hutt och gefrot: „Op wéi engem Niveau?“ Et ass bis d'Regierungschefen, dat heescht de Conseil européen och, wou driwwer diskutéiert ginn ass, wou mer och alleguerten de Constat gemaach hunn, dass et am Fong bei den Informatiounen vun deem engen a vun deem anere wichteg ass, fir den Échange ze hunn. Et kann net sinn, dass een zu - ech huelen e Beispill - Thionville, Arel oder Tréier fichéiert wier an dass dann d'Lëtzebuerg keng Informatiounen dovunner géife kréien. An dofir ass et wichteg, dass do och en Échange gemaach gëtt tëschent de Servicer. An dat schéngt och gutt ze klappen.

D'Europäesch Unioun huet sech schonn 2005 eng Strategie gi fir d'Bekämpfung vum Terrorismus, déi op véier Ebene baséiert war. Dat waren d'Preventioun, d'Protektioun, d'Poursuitten an och d'Reaktiounen.

An op all dësen Ebenen, Här President, ginn och kontinuierlech nei Mesuren ausgeschafft, déi ugeholl sollte ginn op EU-Niveau, fir duerno och an den eenzelne Memberlänner ugeholl kënnen ze ginn.

Mir müssen och den Dialog permanent halen, net nëmmen als europäesch Länner ënner eis, mä och mat eisen internationale Partner, deenen anere grouse Länner, fir justement och esou wäit wéi méiglech Kollaboratiounsaccorden anzegoen mat deene Länner.

No den Terrorattacke vu Paräis a vu Bréssel, an Dir sidd och agaangen op d'Informatiounen, déi een duerno kritt huet, sinn am Conseil vun der Europäescher Unioun eng Rëtsch vu Moosnamen adoptéiert ginn, fir der terroristescher Bedroung entgéintzewierken. D'Moyene sinn och geännert ginn. An net méi spéit wéi haut hu mer och en Text, wou mer am Fong fir d'Terrorismusbekämpfung eis Texter och adaptéieren an engem vun den nächste Projet-de-loien, déi mer hunn.

Mä fir net eng laang Opzielung ze maachen, Här President, erlaabt mer just, zwee konkret Beispiller och kënnen ze gi vum europäeschen Niveau. Dat ass: Am Januar 2016 gouf de Centre européen de la lutte contre le terrorisme lancéiert. Dës Institutioun, déi bei Euro-pol ugesidelt ass, soll déi Plattform sinn, déi et justement och erméiglecht, deen Informatiouns Austausch an och déi operationell Koope-

rationen tëscht de Memberstaten am Terrorismus kënnen ze verstärken.

Parallel dozou hunn déi europäesch Justizministeren an och d'zoustänneg Ministere fir d'bannenzeg Sécherheet de Groupe antiterroriste, genannt den „GAT“ oder „CTG“, duerch eng Mise en place vun enger multilateraler Plattform encouragéiert, déi am Fong en zäitgläichen Informatiouns Austausch tëscht de Sécherheetsautoritéiten vun den europäesche Memberstaten, och vun der Schwäiz an Norwegen, erlabe soll.

D'Aarbechten, fir eis géint Extremfäll a ganz Europa ze wappnen, gi weidergefuert a wäerten och weider eng Prioritéit vun dëser Regierung bleiwen. Wéi gesot, mir géife vun de Konsequenze liewen, mä selwer Kompetenzen hunn, fir elo Moosnamen ze huelen hei um Lëtzeburger Terrain, dat kënn mir net.

Ech weess, dass Dir jo och eng Question parlementaire gestallt hutt, an och an der Question élargie zum Beispill iwwert d'Dronen: Wann en Dron vu Lëtzebuerg aus fortflitt, wat iwwer eng gewëssen Héicht jo net erlaabt ass, mä do gëtt et um europäeschen Niveau keng gemeinsam Legislatioun, wéi d'Drone ganz genau behandelt ginn. Mä wéi gesot, dass en Dron géif eng Zentral attackéieren, ass scho schwier, weil den Dron misst da jo awer wierklech ganz, ganz performant sinn oder op jidde Fall e Krichsdron sinn.

Mä mir als Lëtzeburger froen, an dat ass dat, wat immens wichteg ass, fir iwwert den Istzoustand vun den Zentralen ëmmer informéiert ze ginn, well wann een heiansdo d'Norichte matgedeelt kritt, a virun allem no deem, wat an der Belsch geschitt ass, muss ee feststellen, dass eng Atomzentral en Target kéint fir Terroriste sinn, wat e ganz, ganz grouse Schued kéint urriichten. An dowéinst déi Mesures préventives: Ofkillen, méi Sécherheet fir d'Personal, Elektresch, wat net ausfällt, et cetera, et cetera, dat sinn déi Mesuren, déi mer elo geholl hunn. Mä déi bescht Mesure ass nach ëmmer, den Terrorismus u senger Wuerzel ze bekämpfen!

Ech soen lech Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Statsminister. Keng zousätzlech Fro?

(*Négation*)

Villmools Merci. Da kënn mer zum nächste Punkt vun eise Ordre du jour iwwergoen, dem Projet de loi 6675, zesumme mat der Proposition de loi 6589 iwwert d'Reform vun dem Service de renseignement. D'Riedezäit ass nom Modell 2 festgeluecht. An d'Wuert huet elo direkt de Rapporteur, den Här Eugène Berger. Här Berger, Dir hutt d'Wuert.

3. 6675 - Projet de loi

1) portant réorganisation du Service de renseignement de l'État;

2) modifiant

- le Code d'instruction criminelle,

- la loi du 15 juin 2004 relative à la classification des pièces et aux habilitations de sécurité, et

- la loi du 25 mars 2015 fixant le régime des traitements et les conditions d'avancement des fonctionnaires de l'État

6589B - Proposition de loi modifiant 1. la loi modifiée du 15 juin 2004 portant organisation du Service de renseignement de l'État; 2. l'alinéa 1^{er} de l'article 88-3 du Code d'instruction criminelle

Rapport de la Commission des Institutions et de la Révision constitutionnelle

► **M. Eugène Berger (DP), rapporteur.** - Merci, Här President. Léif Kolleeginnen, léif Kolleegen, Lëtzebuerg gouf 2013 ferm duerchgerëstelt, duerchgerëstelt duerch déi sougenannt SREL-Affär, wou ënnert dem deemolege Premier eng ganz Rei Dysfonctionnement vum Geheimdénkscht un d'Dageslicht koumen, déi d'Vertraue vun de Bierger an eis Institutiounen un d'Wackele bruecht hunn. Dës Affär huet schliisslech och zu enger Statskris gefouert an, wéi mer alleguere wëssen, och zu Neiwahlen am Oktober 2013.

Dës Geheimdénkschtaffär ass och den Ausgangspunkt, Här President, dass mer haut e Gesetz iwwer eng déif gräifend Reform vum Service de renseignement hei diskutéieren. An ech sinn och zouverssiichtlech, dass mer déi mat grousser Majoritéit wäerte stëmmen.

An, Här President, fir mech ass et eent vun deene wichtigste Gesetzer an dëser Legislatur,

well mer hei e klore juristesche Kader setzen, fir dass esou Dysfonctionnement an Zukunft ni méi solle virkommen a fir dass an Zukunft d'Prinzipie vun eise Rechtsstat kloer geschützt an och gestärkt ginn.

Ech wëll elo net de ganzen Historique vun den Dysfonctionnement opzielen, just zwee, dräi Eckdate rappeléieren. Ugefaangen huet et mat der Revelation den 19. November 2012 iwwert déi sougenannten „Aueraffär“, wéi bekannt gouf, dass den deemolegen Direkter vum SREL, de Marco Mille, 2007 schonn e Gespräch mam Premier Juncker mat enger Auer illegal opgehol hat. Dräi Deeg drop dunn d'Noriicht, dass et eng cryptéiert CD géif ginn, wou e Gespräch opgehol gi wier, natierlech op eng illegal Aart a Weis, e Gespräch tëschent dem Grand-Duc an dem deemolege Premier Jean-Claude Juncker zum Sujet Bommeleer.

Et kounn dunn eng Revelation no där aner. An d'Lëscht vun den Irregularitéiten oder Dysfonctionnement ass quasi all Dag méi laang ginn. D'Chamber huet dunn dat gemaach, wat se huet misse maachen, wat sech opgedrängt huet: De 4. Dezember 2012 huet d'Chamber décidéiert, fir eng Enquêtékommis sioun anzesetzen, fir d'Missiounen, d'Organisatioun an de Fonctionnement vum Geheimdénkscht ënnert d'Lupp ze huelen. Am Ganzen hunn, wann ech dat richtig nogezielt hunn, 47 Reunione vun där Enquêtékommis sioun stattfonnt zwëschen Dezember 2012 a Juli 2013.

An am Ofschlossrapport ginn eng ganz Rei vun Dysfonctionnement opgeziet. Dat geet vu politescher Spionage während de Jore vum Kale Krich iwwer illegal Écoutten, Missiounen, déi ouni legale Kader ausgefuert goufen, Pantouflage, Korruptionsversch. An et ass och esou festgestallt ginn, dass Deeler vum SREL quasi als eng Parallellpolizei fungéiert hunn. Et ass versicht ginn, dem deemolege Procureur eng Pädophilenaffär unzehänken. Et gouf illegalen Autohandel bedriwwen an des Weidere méi. Am Ganze goufen 20 oder iwwer 20 Irregularitéiten respektiv doutéis Virgänge festgestallt.

Dat waren Dériven, Här President, déi nëmme méiglech waren, well déi hierarchesch Strukturorganisatioun, awer och virun allem d'Kontroll innerhalb vum SREL net méi fonctionnéiert hunn.

An ech wëll och hei ganz daitlech awer dat och nach eng Kéier als Rapporteur ënnersträichen, dass duerch d'Handele vun eenzelnen, wierklech vun eenzelnen Agente leider den Numm oder och dee ganze Service a Verruff geroode war, mä dass awer dee ganz grouse Gros vum Service sech näscht virzegeheien huet, well en näscht domadder ze dinn hat. Ech wollt dat hei awer och eng Kéier kloer an daitlech soen.

Ech wëll och drun erënneren, dass am Laf vun der Enquêtékommis sioun verschidden Enquêtes duerch d'Justiz opgemaach gi sinn, déi awer nach net alleguerten ofgeschloss sinn. An d'Hauptkonklusioun, zu där déi parlamentaresch Enquêtékommis sioun 2013 an hirem Rapport koun, war déi, dass de Geheimdénkscht misst déif gräifend reforméiert ginn an dass seng Kontroll verschäerft misst ginn.

An d'Enquêtékommis sioun huet dunn och eng ganz Rei vu Recommendatiounen gemaach. Mir hunn eis déi Recommendatiounen ganz genau ugekuckt, wierklech all eenzel Recommendatioun. An dat war dann och d'Virlag fir déi grondleeënd Reform vum Service de renseignement, fir eigentlech dëse Projet de loi ze schreiwen. Dat war och d'Virlag fir d'Regierung, fir deen ze schreiwen.

Fir déi nei Regierung - an ech mengen, da kann ech dat och haut an hirem Numm soen - ass dës Reform och vu gréisster Wichtigkeet a si hat dat och ënnerstrach am Ufank, well praktesch deen éischte Projet de loi, deen den neie Premier, de Xavier Bettel, am Abrëll 2014 bei senger éischer Ried zum État de la nation déposiert huet, war ebe grad dee Projet de loi, dee mer haut hei diskutéieren.

Jo, dat sinn elo schonn déck zwee Joer hier, dass en déposiert ginn ass. Et muss een awer soen, dass déi Zäit gutt genotzt ginn ass, fir dass mer eis dann intensiv a mat vill Suergfalt mat deem Projet als Parlamentarier ausenanersetzen.

Wat hu mer alles gemaach? Mir hunn déi Proposition de loi vun den Deputéierte vun der Reform vun der Kontrollkommis sioun och hei mat integréiert. Dir gesitt, um Ordre du jour stoungen nach déi zwee Projet-de-loien, mä mir hunn eigentlech herno awer décidéiert, fir déi zwee Projekte mateneen ze fusionéieren, well dat och Sénn mécht.

Mir hunn eng ganz Rei Aise consultéiert, genau studéiert. Mir haten dräi Aisen, also een Avis plus zwee zousätzlech Aise vum Statsrot, mat deene mer eis laang ausenanergesat hunn. Mir hunn analyséiert, gekuckt, wéi d'Informatiounsdenkschter oder d'Geheimdénkschter am Ausland fonctionnéieren. Mir hunn eis

wierklech an der Kommis sioun ausféierlech mat deene kruzialen Artikelen ausenanergesat. A mir hunn och, an dat ass jo och d'Aufgab vum Parlament, Amendementer abruecht, well mer zur Iwwerzeegung komm sinn no laangen Diskussiounen, dass déi Amendementer géifen dat Gesetz nach verbessere respektiv Onklorheeten aus dem Wee raumen.

An ech muss soen, Här President, ech si jo awer schonn eng Zäitchen an dësem héijen Haus an ech hunn awer selten erlieft, dass eng Kommis sioun sech esou intensiv a mat esou vill Suergfalt a mat esou vill Seriö mat engem Projet de loi respektiv där Proposition de loi ausenanergesat huet. Mir haten och, ech mengen, eng 18, 19 Sitzungen.

An ech wëll wierklech och hei als Rapporteur alleguerten de Kommis siounsmemberen e ganz grouse Merci ausschwätze fir déi flott a gutt Zesummenaarbecht, déi mer do haten. Och e grouse Merci dem Secrétaire-administrateur, dem Tania Braas. Och déi Lénk, déi zwar, ech kommen nach eng Kéier drop zrëck, gesot hunn, dass si am Prinzip net fir e Service de renseignement wieren, hunn awer trotzdeem och fläisseg matgeschafft. Si hunn och Amendementer mat erabruecht, dat wëll ech och betounen, déi zwar herno net zrëckbehale gi sinn.

Eng Recommendatioun, wëll ech awer och nach soen, vun der Enquêtékommis sioun hu mer hei an dësem Projet net berücksichtegt. Dat ass nämlech déi vun der historiescher Opschaffung vun den Archive vun den Données personnelles. Do hu mer e separate Projet de loi gemaach, nodeem mer och Experten, ënner anerem de President vun der Gauck-Behörde, bei eis haten, fir do e separat Gesetz ze maachen. Dat ass och praktesch fäerdeg, mir waarden nach just op den Avis vun der Commission nationale pour la protection des données. Da wäert dat awer och an den nächsten, ech géif net soen Deeg, mä awer an den nächste Wochen, virum 15. Juli, dann och nach hei an der Chamber kënn gestëmmt ginn.

Här President, ech kommen dann zum Inhalt vum Projet de loi. Ech wäert elo net all Artikel en détail illustréieren. Ech wäert kucken, nach eng Kéier déi grouss Akzenter, déi Neierungen oder wat d'Hauptakter sinn, hei e bësse méi am Detail ze illustréieren, respektiv dat sinn dann och déi Punkten, mat deene mer eis an der Kommis sioun am intensivsten dermadder ausenanergesat hunn a wou mer och déi eng oder aner Kéier dann nach Amendementer gemaach hunn.

Bon, eng Fro, déi sech natierlech direkt am Ufank gestallt huet, dass ass déi: Brauche mer hei zu Lëtzebuerg nach e Geheimdénkscht oder e Service de renseignement? An ech muss soen, dass awer vun Ufank un d'Daseinsberechtigung vun engem Service de renseignement hei zu Lëtzebuerg vun der grousser Majoritéit vun der Kommis sioun net a Fro gestallt ginn ass. Déi Lénk waren do éischer anerer Meinung. Ech muss awer soen, dass se awer de Konklusioun vun der Enquêtékommis sioun zougestëmmt haten, wou och ënner anerem do eng vun de Konklusiounen war, dass mer dat nach bräichten.

Ech mengen, et eriwvregt sech jo awer bal, fir dat hei nach eng Kéier ze ënnersträichen, grad an deenen Zäiten, wou mer liewen. Mir hate virun och nach eng Fro vun engem Deputéierten am Kontext vun den Atomzentralen. Mä ech mengen, grad an dësen Zäiten, wou mer leider allze oft oder ze oft dramatesch Schlagzeilen an den Zeitungen liesen, wou mer Attentater haten, dramatesch Attentater zu Paräis, zu Bréssel, op anere Plazen - ech wëll se elo net alleguerten opzielen -, ass et wichteg, dass een e Service de renseignement huet, dee kann d'Geforen anticipéieren respektiv mathëllefen, fir dass d'Souveränitéit vun eise Land gewaart bleift.

Mir wëllen de Service de renseignement, mir wëllen awer e Service de renseignement, wou d'Protektioun vun de Rechter vum Bierger och groussgeschriww gëtt. An duerfir hu mer hei e Gesetz geschriwwen, wou d'Missiounen ganz kloer definéiert ginn a wou och all déi Missiounen vum Service de renseignement - wat se maachen - millimetergenau kontrolléiert ginn.

D'Reform baséiert op fënnf groussen Achsen: d'Kontroll vum Service, d'Missiounen, d'Moyenen an d'Konditiounen vun deene Missiounen, den Émgang mat den Données personnelles an dann och d'Rechter an d'Flichte vun den Agenten.

Här President, mir war et als Rapporteur bei dëser Reform och besonnesch wichteg, dass d'Kontroll vum Service verbessert gëtt. Dat war jo och eng vun den Ursachen, firwat dass



iwwerhaupt Dysfonctionnementer konnte geschéien. An ech hu mëttlerweil esou e Leitmotiv - ech hu mer och erlaabt, deen an de schréiftleche Rapport anzeschreiwen -, datt et eigentlech soll e Service sinn, dee selwer sous haute surveillance ass.

(Interruption par M. Alex Bodry)

Wat fir eng Kontrolle sinn dat? Ech géif soen, op véier Niveauen. Eng éischt Kontroll ass um politeschen Niveau. Déi situéiert sech um sougenannten Niveau vum Comité ministériel. Mir ruffen hei am Gesetz en neit Gremium an d'Liewen. Dat ass e Comité, deen zum Beispill aus dräi Membere vun der Regierung ka bestoen - mir hunn net déi genau Zuel festgeschriwwen opgrond vum Avis vum Statsrot -, an deen definéiert déi grouss Richtung, wuer de SREL sech soll bewegen, wat d'Prioritéite solle sinn. An dee surveilléiert och permanent d'Aktivitéite vum Service de renseignement.

Wichtig ass awer, hei ze preziséieren, datt de Geheimdéngscht awer politesch engem Minister ënnersteet. Dat ass nach ëmmer deen, deen herno - fir et emol esou ze soen - de Kapp muss politesch dohinnerhalen, wann eppes géif schiffoen; wat awer an Zukunft net méi wäert de Fall sinn. An de Minister, dee gewéinlech un der Spëtzt vum Geheimdéngscht steet, dat war bis elo ëmmer de Premierminister. Et ass och elo dës Kéier de Fall an dat wäert och warscheinlech an Zukunft nach ëmmer de Fall sinn. Also e Comité ministériel, awer driwwer de politesche Responsabelen, deen, dee responsabel ass fir de Geheimdéngscht.

Nei ass eng zousätzlech Kontroll um administrativen Niveau. Do hu mer den Délégué au SRE, dee mer aféieren. Dat ass en héije Beamte vum Premier, deen dann och deeglech Zougang kann hunn zu allen Informatiounen vum SREL, deen eigentlech och dann de Service do fir de Minister suivéiert an deen och eigentlech d'Pouvoirs d'investigation innerhalb vun der Verwaltung huet, deen och regelméisseg muss Rapport maachen.

Um Niveau vun dem Contrôle administratif soll een awer och net den Direkter vun der Verwaltung vergiessen. Dee muss och seng Services kontrolléieren an dee muss jo och riichtstoe vis-à-vis vun der Kontrollkommissioun oder vis-à-vis vum Minister.

Eng drëtt Kontroll ass déi um Niveau vun der Justiz. All déi méi intrusiv Methoden - ech kommen dann nach dorobber herno ze schwätzen -, Écoutes an esou weider, déi mussen allegueren den Aval kréie vun enger Commission spéciale, déi aus dräi Riichter zesummegeat ass. D'Riichter, dat sinn: de President vun der Cour supérieure de justice, de President vum Verwaltungsgericht an de President vum Tribunal d'arrondissement vu Lëtzebuerg.

Ech wëll awer och soen, eng kleng Remarque: D'Urgence ass och nach am Gesetz virgesinn, mä awer ëmmer dans les meilleurs délais oder praktesch au même moment. Awer och, wann de Premier zum Beispill géif do eng Autorisation déclenchéieren, da muss do dann och den Accord direkt dans les meilleurs délais vun där Commission spéciale geliwwert ginn.

An dann e véierten Niveau: Dat ass d'Kontroll um parlamentareschen Niveau. Et muss een hei soen: D'parlamentaresch Kontrollkommissioun gëtt ganz kloer gestärkt an hire Missiounen.

An ech mengen, dat kann ech hei och soen, datt ech ganz frou driwwer sinn: D'Roll vum Parlament gëtt hei och an dësem Gesetz gestärkt, well ech wëll jo drun erënneren, wat d'Konklusiounen an der Enquêtekommissioun waren. Do ass nämlech gesot ginn, datt ee vun de Problemer war, datt d'Kontrollkommissioun vum Parlament eigentlech hir Aarbecht net richtig konnt maachen. Si gouf gebremst, si krut eng Rei Informatiounen net, si ass net genuch informéiert ginn an esou weider. An ech mengen, déi parlamentaresch Kontrollkommissioun, déi gëtt mat dësem Projet gestärkt an do misste mer awer allegueren hei am Haus dann och zefridde sinn.

Déi nei Kontrollkommissioun, wat kritt déi alles zousätzlech als Moyenen? Regelméisseg, dat heescht all dräi Méint gëtt déi Kontrollkommissioun, déi de Moment aus de Fraktiounscheffe besteet oder aus Leit, déi aus deene Groupements politiques kommen, déi e Fraktiounschef hunn oder déi d'Stärkt vun enger Fraktioun hunn, dat heescht, déi Leit, déi gi regelméisseg all dräi Méint iwwert d'Missiounen informéiert. Si kréien all sechs Méint de Relevé vun den Écoutes oder wat eventuell iwwert de Logiciel digital relevéiert ginn ass. Si kënnen zu all Moment Stéchprouwe maachen, si kënnen sech och vun Experten an hirer Aarbecht assistéieren

loossen. Si kënnen zu all Moment en Agent iwwer e spezifeschen Dossier befragen, si kréien och de Budget vun dem SREL presentéiert a si kréien och eng Lettre de mission ënnerbreet. Ech wäert och op déi nach eng Kéier zrëckkommen.

An ee Punkt, deen hei diskutéiert ginn ass, kontrovers diskutéiert ginn ass, dat ass deen, datt an der Proposition de loi vun den Deputéierten drastoung, datt den Direkter natierlech déi Obligatiounen hätt, déi Kontrollkommissioun iwwer alles ze informéieren, a wann en dat net géif maachen, datt e penal kéint zur Responsabilitéit gezu ginn.

De Statsrot huet do säi Veto ageluecht. Mir haten et an d'Gesetz ageschriwwen. De Statsrot huet gesot: „Et ass en Direkter vun enger Verwaltung an dee muss behandelt gi wéi all déi aner Direktere vun anere Verwaltungen och.“ Dat geet also net. An en huet och d'Fro opgeworf: Bon, da wier dat en Direkter, dee just penal responsabel vis-à-vis - hei an dësem Fall elo - vu véier Deputéierte wier?

Mä ech mengen, et ass jo och esou: Den Direkter huet den Devoir, d'Obligation d'information, déi bei all Beamte spillen, an ëmsou méi hei bei senger Aufgab, well dat ass eng vu sengen Haaptaufgaben. Wann e sech also net géif dorunner halen, da wier dat eigentlech eng Faute grave an da misst e mat Konsequenzen ze rechnen hunn.

D'Dysfonctionnementer vum SREL haten eben och zu Dag bruecht, datt d'Missiounen vum Service net kloer definéiert waren. D'Missiounen vum Service de renseignement si warscheinlech, géif ech soen, am intensiivsten - den Artikel 3 als Erënnerung - an der Kommission diskutéiert ginn, well et jo och hei enk mat der Fro vun der Daseinsberechtigung vum Service liiert ass. De Statsrot war och am éischten Avis net honnertprozenteg zefridde mat deem Artikel. En huet zwar deemools keng Opposition formelle gemaach, mä en huet awer vun e puer Saache gesot, datt een déi nach eng Kéier sollt iwwerkucken. Duerfir hu mer dat dunn nach eng Kéier gemaach. Mir hunn also deen Artikel nach eng Kéier op de Leescht geholl.

An eppes war awer vun Ufank u ganz kloer: Politisch Spionage dierf et net méi, dierf et ni méi hei zu Lëtzebuerg ginn! Duerfir hu mer dat och ganz kloer an d'Gesetz geschriwwen. Mir sinn allegueren gebrannte Kanner. Ech mengen, dat ass jo eent vun deenen donkele Kapitele vun der Geschicht vum Geheimdéngscht, dat bis an d'Zäit vum Kale Krich zrëckgeet, wéi dat d'Enquêtekommissioun festgestallt huet. Deemools si Bierger, déi au sens large politesch aktiv waren - dans le sens large, wat en dorënner versteet: Gewerkschaftler a Leit, déi vläicht an engem spezielle Veräin engagéiert waren, ONGen an esou weider -, do bespëtzelt ginn, ouni datt se iergendeng Geför fir d'Land oder fir d'Sécherheet waren.

Ech ginn elo net weider dorobber an. Ech wäert d'Geleeënheet kréie warscheinlech als Rapporteur vun dem Gesetz iwwert d'Archive vun deene Fichen, fir do nach eng Kéier dann drop zrëckkommen.

Bon, wat sinn dann elo d'Missiounen vum SREL, déi mer an d'Gesetz schreiwen? Dat riicht sech no engem grouse Prinzip, dat heescht, de SREL huet eng preventiv Missioun, wann d'Sécherheet vum Land oder d'Integritéit vum Land a Geför ass oder wann Organisatiounen oder Länner, mat deene mer Accorden hunn, enk Relatiounen hunn, wann déi a Geför wieren oder wann eis ekonomesch Interessen, eise wëssenschaftleche Potenzial a Geför wieren.

A wat sinn dann déi Menacen ebe fir d'Statssécherheet oder fir d'Integritéit vum Land? Ma déi sinn och ganz kloer opgezielt: méi wéi jee den Terrorismus, d'Spionage, den Extremismus à propulsion violente (veuillez lire: à propulsion violente). Firwat „à propulsion violente“? Mir haten do Diskussiounen. Mir hunn en Amendement gemaach. Et kënnen Leit extrem Iddien hunn, dat nennt een heiansdo „Extremisten“, oder et sinn der vläicht, déi a komesche Sekte ganz komesch Iwwerleeungen hunn, déi awer keng Geför fir iergendepes duerstellen. Duerfir hu mer awer geschriwwen „à propulsion violente“, dat heescht extrem Gruppen, déi och wierklech prett wieren, fir iergendeng Aktivitéit, eppes ze ënnerhuelen, fir d'Geför (veuillez lire: d'Sécherheet) vum Land a Fro ze stellen.

Dann d'Proliferatioun vu Massevernichtungswaffen an all Aktivitéiten, déi eisen nationale wirtschaftlechen Interesse kéinte schueden. Wéi gesot, d'Lutte géint den Terrorismus steet hei am Vierdergrond.

An dann ass awer eppes, wat mer nei als Kommissioun an d'Gesetz drageschriwwen hunn, déi sougenannt „lettre de mission“, well awer nach gesot ginn ass: Jo, déi Begrëffer do - Terrorismus, Lutte géint den Espionage an déi, déi ech elo opgezielt hunn -, do kéint een awer

nach heiansdo soen, si wieren nach vag. Duerfir hu mer gesot: „Da kommt, mir hunn hei esou eppes, wat een eng Feuille de route kéint nennen, eng Lettre de mission, wou genau drageschriwwen gëtt, wat fir déi nächst sechs Méint, dat nächst Joer d'Prioritéite sinn, mat praktesch deklinéiert, wat fir eng Missiounen dann entaméiert ginn.“ Ech mengen, dat ass eng ganz wichteg Neierung. An et ass och esou, datt och déi parlamentaresch Kontrollkommissioun déi Lettre de mission ënnerbreet kritt.

Da kommen ech zu den operationelle Methoden a Moyenen, déi am Gesetz jo da kloer definéiert sinn, an och wéi d'Prozedur all Kéiers ass. Hei ass de Mot d'ordre... Bon, Mot d'ordre ass vläicht e klengt Wuert. Hei wierklech de grondleeënde Prinzip: ëmmer déi Moyene benotzen, déi dee klengsten Agrëff an d'Privatsphär duerstellen, „le moins intrusif possible“, hu mer geschriwwen. D'Proportionalitéit vun de Moyenen, déi agesat ginn, muss ëmmer bewaart bleiven.

A mir hunn och am Gesetz da ganz kloer, transparent a ganz strikt Autorisationsprozeduren ageschriwwen, wéi jee nodeem, wat fir eng Operatioun lancéiert gëtt, wéi déi da muss autoriséiert ginn: Dat geet vum Direkter iwwert de Comité ministériel bis zur Spezialkommissioun, déi eben aus dräi Riichter besteet.

Et gëtt do verschidde Stufen. Déi éischt Stuf, dat ass einfach eng Observatioun op öffentliche Plazen duerch Agenten oder Informanten. Dat ass eng Etapp, déi muss vum Direkter autoriséiert ginn. Dee muss awer och dann de Comité ministériel informéieren. Herno gëtt a posteriori jo och dann d'Kontrollkommissioun informéiert. Vläch eng Remarque: Wat ass eng Observatioun? Dat ass, wann dräi Deeg hanereneen ee beobacht gëtt oder een dräi Deeg innerhalb vun engem Mount beobacht gëtt.

Dann déi nächst Stuf, wann een do näischt erausfënnt, dat ass dann d'Écoute téléphonique, „oflauschteren“ am Lëtzebuerger Sproochgebrauch. Dat kann ee während dräi Méint maachen. Da muss d'Autorisation erneiert ginn, och vun de Riichter. Do brauch een also d'Autorisation vum Comité, awer och vun der Commission spéciale, also vun deenen dräi Riichter. Datselwecht gëllt fir de Repérage, dat heescht, wann ee kuckt, wuer wien telefonéiert huet. Dat muss all sechs Méint erneiert ginn.

An dann, wann dat och nach näischt bréngt, oder eben an deene méi schroe Fäll oder bei deene Geforen, déi ech virdrun opgezielt hunn, déi wierklech méi akut sinn - Terrorismus, Waffenhandel, Espionage -, wann d'Écoutes näischt bréngen - an dat stelle mer leider fest, dat haut déi Leit och mam Fortschritt weiderginn, fir et emol esou ze soen -, da kann een also do dann aner Moyene virgesinn.

Dat ass, datt ee ka Passagéierleschte consultéieren, Informatiounen iwwer Banktransaktiounen, an och, datt ee kann an en Domicile eragoen, e Privatedomicile, fir do an de Computer e Logiciel dranzesetzen, well ebe festgestallt ginn ass, datt ganz oft haut - dat mierkt ee jo och, ech mengen, et brauch een nëmmen all déi Rapporten iwwer Terrorismus ze liesen - déi Leit natierlech ganz wéineg oder guer net méi iwwer Telefone kommunikéieren, mä iwwer Mailen, kryptéiert Mailen haaptsächlech, eventuell iwwer Skype. An dat kann een dann nëmme maachen, wann een dann och e Logiciel an de Computer setzt.

Do hate mer eigentlech vun der Commission nationale pour la protection des données au départ an och bis haut kee kriteschen Avis. Mä am Kader vun engem anere Gesetz, Lutte antiterroriste, war awer dunn elo e kriteschen Avis komm och vun der Ligue des droits de l'Homme, déi do eng Rei Froen opgeworf huet mat deenen, wéi mer dat dann nennen „Trojaner“ oder „Statstrojaner“.

Ech wëll hei einfach nach eng Kéier soen: Mir hunn dat an der Kommission diskutéiert. Dat hei ass eigentlech eng nei Form vun Écoute, déi awer deeneselwechte Regeln, deene strenge Kontrollen, deene strengen Autorisationsprozeduren ënnerläit fir eng Écoute oder deene Mesuren, datt och hei mussen dräi Riichter hiren Accord ginn, datt muss genau beschriwwen ginn, wat ee mécht, wat een utiliséiert, an och herno, do kommen ech nach drop, wat mat deenen Donnéeën geschitt a wéini et erëm muss ophalen.

Et ass eigentlech also hei näischt Neies, näischt anescht. Et ass eben eng nei technesch Iwwerwaachung, wou mer eis ugepasst hunn un dat, wat ebe leider dobaussen esou benotzt gëtt, fir wann Terroristen ënner sech kommunikéieren.

Wat weider am Gesetz och virgesinn ass, oder eng aner Dispositioun, dat ass, datt d'Agenten vum SREL och ënner engem Nom d'emprunt, engem geleënten Numm - bon, da kéinten d'Leit och vläicht soen: „e falschen Numm“ -

do kënnen ermëttelen oder eng operativ Operatioun kënnen duerchféieren, ouni datt se duerfir kënnen viru Gericht belaaugt ginn.

Ech hat dat och schonn elo méi wéi eng Kéier betount, Här President: D'Rechter vun de Bierger ginn an dësem Gesetz groussgeschriwwen. An duerfir ass eben dee ganze Volet vum Émgang mat den Donnéeën, déi do erhuewen, wichteg. Ech hunn dat och am Gesetz oder respektiv a mengem Rapport nach eng Kéier genau beschriwwen.

Ech mengen, d'Diskussioun ass jo déi gewéinlech, wann elo eng Écoute ass oder wann een dann ebe Maile géif kucke goen, datt do och ëmmer Leit, ech géif emol soen „kollateral“ mat ofgehéiert ginn. Dat ka souguer an engem Lieu public, wou keng Telefonsécoute ass, geschéien.

Wat geschitt mat deenen Donnéeën? Ech mengen, do ass et kloer an däitlech: Wann elo zum Beispill bei enger Écoute een ass, dee verdächtig gëtt, am Beräich vum Terrorismus kënnen aktiv ze ginn, dann telefonéiert dee vläch engem aneren aus sengem Grupp, fir eng Aktioun auszemaachen. Dat ass natierlech relevant. Et kann awer och vläch sinn, datt dee moies iergendengem Service telefonéiert huet, fir seng Poubellen eidel maachen ze kommen. Ech mengen, dat sinn dann déi Leit, mat deenen en do schwätzt, déi hu guer näischt domadder ze dinn. An déi Donnéeën ginn natierlech direkt eben do gestrach. Ech mengen, dat ass souwuel bei den Écoutes, wéi och bei deem, wat een dann am Beräich vun dem „Computeroflauschteren“, fir et emol esou ze formuléieren, géif kréien.

Wann awer elo Donnéeën do sinn, déi relevant si fir eben den Dossier, da ginn déi fënnf Joer gehalen. A wann dann och Faite sinn, déi un de Procureur weidergi gi sinn, da mussen déi Renseignementen spéitstens dann zerstéiert ginn, wann d'Prescriptioun vun der Action publique erreecht ass.

Dat sinn also eng Rei Donnéeën. Mir hunn och hei am SREL en „chargé de la protection des données“ agefouert. Hien iwwerwaacht, datt dann déi perséinlech Donnéeën entweder zerstéiert ginn, respektiv, wann der consultéiert ginn, datt dat ganz genau ka retracéiert ginn, datt een dat ganz genau muss kucken, eben och konform zum Gesetz vum Datschutz. Dat heescht, do muss dann zu all Moment kënnen gekuckt ginn: Déi doten Donnée, déi Informatioun ass vun deem am Service zu esou enger Auerzäit fir dat Motiv gekuckt ginn, an dat ass domadder geschitt.

An, dat muss ech och soen, wéi dat genau am Detail soll fonctionnéieren, duerfir sinn och schonn an der leschter Kommissionssitzung Reglementer presentéiert ginn, wou also genau beschriwwen gëtt, wéi mat den Données personnelles ëmgaange gëtt. Ech menge wierklech och hei nach eng Kéier: Et ass net nëmmen en Effort, mä wierklech fir ze ënnersträichen, datt eis d'Protection des données wierklech wichteg ass!

Och den Accès vun dem SREL oder vun de Mataarbechter, wat se kënnen consultéieren während hirer Aarbecht, dat ass am Artikel 10; datt se och zum Beispill kënnen kucken: Huet déi Persoun e Führerschäin, huet se e Waffeschäin, an esou weider? Ech zielen dat net op, dat steet am Artikel 10. Dat ass och genau am Gesetz festgeschriwwen, wou och zum Beispill steet, datt d'Leit vum SREL net kënnen direkt op e Casier judiciaire zougräifen.

Da gëtt am Gesetz och d'Zesummenaarbecht dans le sens large, géif ech soen, mat de Justizautoritéiten, mat der Police a mat de Verwaltungen niddergeschriwwen. Ech mengen, et ass immens wichteg, datt déi Kooperatioun gutt fonctionnéiert, well an der Terrorismusbekämpfung gräifen déi verschidden Administratiounen jo aneneen.

Vläch hei och e Wuert zu den Informatiounen, déi de SREL kritt vun auslännesche Geheimdéngschter. Et ass et wichteg, datt et strikt respektéiert gëtt, wann de Service de renseignement Accorden huet. A mir stëmmen där och heiansdo hei an der Chamber, dës Woch hate mer nach een, wou da wierklech op héchstem Niveau, also och vun der Chamber, décidéiert gëtt, datt do kann en Échange vu klassifizéierten Informatiounen sinn. Respektiv, wann den auslännesche Geheimdéngscht seet: „Dir kritt déi Informatioun, mä mir hätte gär, datt déi net weider an iergendenger Form ka benotzt ginn, divulgéiert ginn“, da muss een dat och strikt respektéieren. Ech mengen, dat ass immens wichteg!

Mir hunn e Geheimdéngscht, dee mat senger Moyene fonctionnéiert, deen immens vill op d'Informatiounen vum Ausland ugewisen ass. A wann een dat géif op d'Spill setzen, da géif ee keng Informatiounen méi vun deenen auslännesche Geheimdéngschter kréien. An da wiere mer wierklech manner à même oder da wiere



mer vläicht guer net méi à même, fir zum Beispill eis Lutte géint den Terrorismus uerdentlech ze organiséieren.

Dann, d'Rechter an d'Flichte vun de Beamten nach kuerz. Här President, ech hat jo gefrot, fir e bëssen Opschub. Ech mengen, ech misst ongeféier ronnkomme mat menger Zäit. Kuerz d'Rechter an d'Flichte vun den Agenten. Dat si jo d'Haaptakteuren. Dat ass en anere Volet.

Hei ass wichteg - ganz kuerz - déi Klausel fir d'Confidentialité. De Prinzip ass, dass Agente keng Informatiounen, keng Geheimnisser dierfen onerlaabt weiderginn. Ech mengen, soss komme Geldstrofen, Prisong. An enger gewëssener Form kann een déi Klausel esou soen: Dat gëllt och bis fënnef Joer no dem Austrëtt aus dem Geheimdéngscht, do dierfe se net an en anere Beruff oder eng Firma opmaachen, wou dat Wëssen eventuell kéint benotzt ginn. Mir haten dat jo an der Vergaangenheet. An et kann einfach net sinn, dass e Mataarbechter géif säi Wëssen aus dem Service huelen, fir da materielle Profitt, géif ech emol soen, dorausser ze schloen.

An a menger Lektür, Här President, vun dëser Klausel, géif ech och soen, dass et dann eigentlech net méi sollt méiglech sinn, dass en Agent oder en Exagent iwwert d'Banneliewe vun engem Service de renseignement Interviewe gëtt oder do Saache seet, déi en eigentlech net soll un d'Effentlechkeet bréngen. Dat schéngt mer awer och hei mat dëser Klausel da kloergestallt ze sinn.

Vläicht dann nach ganz kuerz, Här President, zu de Primmen. Ee Wuert doriwwer. Ech kann awer net als Rapporteur do näischt derzou soen. Et ware jo och nach déi lescht Deeg déi eng oder aner Communiquéen an der Press ze liesen. D'Beamte kréien dräi Primmen: eng Prime de risque, d'Prime d'astreinte, d'Prime spéciale. Dat mécht zesummen zwëschen 80 an 140 Punkten aus. Dir kënnt dat dann ausrechnen.

Mir haten déi Primmen och an d'Gesetz geschriwwen. De Statsrot huet do Opposition formelle gemaach. En huet gesot: „Dat geet net mam Gläichheetsprinzip vun der Verfassung.“ A wat mer hei awer probéiert hunn, dat ass, dass mer versicht hunn, e Wee ze fannen, fir dass déi Primme géife konform sinn zum Gläichheetsprinzip, dass dat och vis-à-vis vun der Verfassung géif standhalen. An eis Hauptsuerg war och, dass den Agenten näischt géif ewechgeholl ginn! Dat ass dat, wou mer versicht hunn, eng Solutioun ze fannen.

An d'Kommissioun war och der Meenung, dass dës Primme verdéngt wieren, well se jo awer eng ganz speziell Aufgab, eng ganz speziell Aarbecht hu mat enger Rei Contrainten, déi een net an anere Beruffer huet. Also eis Démarche, dat war am Interessi vun deenen eenzelne Beamte geduecht. An ech bedauern, dass d'Représentation du personnel dësen Acte de bonne volonté, dee mer do awer gemaach hunn, net esou richtig uerkennt an elo op Konflikt mat der Fonction publique geet.

Här President, ech kommen dann esou lues zum Schluss. Ech mengen, déi verschidden Avisen, ech si se elo net all duerchgaangen, Dir kënnt déi a mengem schrëftleche Rapport liesen. Ech si vläicht op déi eng oder aner Detailler, wéi gesot, net agaangen. Dat kënnt Der alles dann noliesen, well dat géif den Zäitkader sprengen.

Här President, duerfir kommen ech dann zu mengem Schluss. Ech mengen, mat dësem Projet gi mer den Ambitioun gerech, all de Recommandatiounen vun der Enquêtékommissioun nozekommen. Et ass e Gesetz, wat et engem moderne Geheimdéngscht erlaabt, sech den neien Erausforderungen ze stellen, och am Intérêt vun eise Land. Et ass e Gesetz, dass e klaren an transparente juristesche Kader schaaft, an deem de SREL sech ka bewegen. Et ass duerfir e Gesetz, dass d'Basis schaaft, dass mer ni méi Dysfonctionnement vun engem Service sollen erliewen, wéi déi, déi eis 2013 gerëselt haten an eis Institutionen un d'Wackele bruecht haten. D'Chamber huet domat hir Aarbecht gemaach an hir Missioun erfüllt.

An e lescht Wuert: Et wier och gutt, wann d'Justiz och hir Aarbecht kéint ofschléissen, well, ech mengen, eréischt da wäerte mer kënnen als Chamber den Dossier definitiv mat rouegem Gewëssen zoumaachen, clôturéieren, an all d'Léieren zéien, fir dass mer da wierklech kënnen definitiv soen: Never again!

Merci.

► **Plusieurs voix.** - Très bien!

► **M. Mars Di Bartolomeo, Président.** - Merci dem Här Berger. An d'Wuert huet elo direkt den Här Claude Wiseler fir d'CSV.

Discussion générale

► **M. Claude Wiseler (CSV).** - Merci, Här President. Ech wëll ufänken, andeem ech och dem

Rapporteur Merci soe fir déi gutt Aarbecht, déi e gemaach huet zesumme mat der Kommission. Dat hei war jo keen einfachen Text a keng einfach Diskussioun, déi mer do gefouert hunn, an dat aus e puer Grënn.

Deen éischte Grond, dass ass, dass esou Texter wéi deen heiten ëmmer déi Schwieregkeet hunn, dass se deen noutwendegen Équilibre musse fannen: Équilibre op där enger Säit zwëschen der Effikasitéit, déi esou e Service wéi de Geheimdéngscht, wéi den SRE, muss hunn, ëmmer méi muss hunn, an op där anerer Säit der Protektioun vun der Privatsphäre an den individuelle Fräiheeten. Deen Équilibre ze fannen, juristesch ze fannen op där enger Säit, an duerno an der Émsetzung och ze fannen, ass net evident.

Déi zweet Schwieregkeet, dass war déi, well d'Noutwendegkeet vun der Émännerung vun dësem Text jo entstanden ass ronderëm déi SREL-Affäre, déi mer 2012-2013 haten, an et dofir am Fong e ganz sensibelen Dossier war, dee geluede war mat vill Vergaangenheet, dee jo ënner Beobachtung stoung wéinst deenen Evénementen vun 2013, wat de Klima theoretesch net vereinfacht huet. An ech kommen nach duerno dorobber zrëck.

Ech hunn awer mat Satisfaktioun festgestallt, dass mer konnten an deene leschte Méint op engem wesentlechen Dossier trotzdeem eng korrekt Aarbecht maachen an ënner uerdentlechen a korrekter Konditioun schaffen, an dat eis Aarbecht baséierend op déi Propositionen, déi d'Commission d'enquête gemaach hat an déi sengerzäit och d'CSV-Fraktioun gedeelt huet. Mir hu leedeglech bei deem Rapport vun der Commission d'enquête net déi politesch Konklusioun gedeelt, mä awer déi Propositionen, déi d'Commission d'enquête gemaach hat, dat waren och eis Konklusiounen. An dofir ass et gutt, dass se an dësem Text kënnen ëmgesat ginn.

E puer Aussoe wëll ech maachen. Déi éischt, dass ass eng evident an eisen Aen: Mir brauchen och zu Lëtzebuerg e Geheimdéngscht, an haut méi wéi jee! De Lucien Weiler, deen 2004 Rapporteur vun dem Text iwwert de Geheimdéngscht war, huet den 19. Mee 2004 gesot, an ech zitieren en: „Net ëmmer huet esou eng Atmosphère sereine ëm de Geheimdéngscht bestane wéi haut.“ An dat war 2004. „Et gouf eng Zäit, wou de Service de renseignement den Enjeu hei am Land war vun heftegen ideologeschen Debatten. Déi Zäite sinn eriwuer. Haut, denken ech, stellt keng Fraktioun hei an der Chamber méi d'Noutwendegkeet vun engem Geheimdéngscht a Fro. Et herrscht Konsens driwwer, dass déi Welt, déi sech an deene leschte Joren entwéckelt huet, leider eng Welt ass, déi ouni Geheimdéngscht a Geheimdéngschter net auskënn.“

(Coups de cloche de la présidence)

► **M. Mars Di Bartolomeo, Président.** - Wann ech gelift, lauschtert no!

► **M. Claude Wiseler (CSV).** - Dat war dat, wat de Lucien Weiler 2004 gesot huet. An, ech mengen, zumindest bei der leschter Ausso läit e sécherlech richtig. Bei där éischter hu mer eng Fraktioun haut an der... hu mer eng Sensibilitéit, pardon, haut an der Chamber, déi dat scho méi contestéiert.

An ech hunn och am Avis vum Conseil d'État gelies: A sengem éischten Avis huet de Conseil d'État sech näamlech d'Fro gestallt a sech gewonnen, dass d'Utilitéit vun dem Service de renseignement net géif justificéiert ginn. Ech zitieren do och: «Ni le Gouvernement ni d'ailleurs non plus la commission d'enquête parlementaire sur le Service de renseignement de l'État (...) n'entendent apparemment remettre en cause l'utilité d'un service étatique chargé du renseignement.» Dat seet de Conseil d'État. Dat schreift en awer am Dezember 2014. Dat ass schonn eng Zäitche hier, net nëmmen eng Zäitche hier, mä och eng Rei Evénementen hier, déi an deene leschte Méint geschitt sinn. An an deenen Avisen duerno, no deenen Evénementen, war och den Toun vum Conseil d'État licht geännert.

Op jidde Fall, fir d'CSV ass kloer: dass Lëtzebuerg en effikasse Geheimdéngscht brauch; dass Lëtzebuerg e Geheimdéngscht brauch, deem seng Missiounen, seng Aktiounsméiglechkeeten an aller Däitlechkeet, an allem Detail och beschriwwen sinn; dass Lëtzebuerg e Geheimdéngscht brauch, deem unerkannt ass, och vun deenen Déngschter am Ausland, well, wéi de Rapporteur scho virdru gesot huet, eng ganz Rei vun deene Renseignementen, déi de Lëtzebuerger Geheimdéngscht kritt, natierlech hir Originne bei auslänneschen Déngschter hunn a mer dofir op déi Kollaboratioun ugewise sinn. An déi Kollaboratioun, déi baséiert natierlech op géigesäitegem Vertrauen.

Lëtzebuerg brauch e Geheimdéngscht, deen a senge Kontrollmechanismen och evidenteweis effikass muss kënnen fonctionnéieren. Lëtze-

buerg brauch e Geheimdéngscht, deen déi technesch Moyenen huet, fir sengen Aufgabe gerecht ze ginn. A Lëtzebuerg brauch e Geheimdéngscht, deen déi personell Moyenen dofir huet, fir deene Geforen, deene mer haut ausgesat ginn, kënnen ze begéinen.

Wéi de Geheimdéngscht an de 60er Jore geschaaft ginn ass, du ware mer an enger Situatioun vum Kale Krich, wou zwee Bléck sech géinteneen affrontéiert hunn. D'Geheimdéngschter waren en Deel vum System vun der géigesäiteger Aschüchterung, Block géint Block, e Feindbild, dass kloer déterminéiert war.

Haut ass dat anescht! D'Mauer ass gefall. D'Gefore sinn anerer ginn. D'Gefore si méi diffus, méi divers, manner organiséiert an hirer Originne, mä vläicht souguer méi geféierlech, well se manner detektabel sinn, well se och vläicht méi gewaltbereet sinn, well se och vun enger anerer Gewaltbereetschaft ausginn. Och war den Terrorismus an de 70er, 80er Joren haaptsächlech en Terrorismus, deen op Ziler ausgaangen ass, deen Ziler erausgewielt huet, déi Sënn - an hiren Aen - haten.

Hei hu mer et mat engem Terrorismus ze dinne, dee blann agéiert, deen eis alleguer, all d'Leit a Gefor bréngt. Also ass e vill méi schwéier ze detektéieren. En ass méi divers och a sengen Zilsetzungen, méi divers an den Ziler, déi e sech eraussicht a ganz oft och gemaach vu Leit, déi Einheimesch sinn, net also auslännescher Originne, esou wéi d'Aufgaben am Kale Krich sech heiansdo gestallt hunn.

Och d'Technologé sinn total anescht ginn. Mir hunn et haut mat Kommunikatiounstechnologien ze dinne, déi mer sécherlech an deene Jore vun deem éischte Geheimdéngscht hei zu Lëtzebuerg net haten. D'Propaganda vun Terrororganisatiounen gëtt och ganz anescht gemaach. Hir Kommunikatioun leeft iwwert déi modern Technologien, déi d'ailleurs haut och fir jiddwereen Eenzelnen accessibel sinn. Och dat fonctionnéiert ganz anescht.

An et muss een och, wann ee wëllt als Geheimdéngscht effikass sinn, déi Mass vun Informatiounen, déi haut op den Netzer zirkuléiert, analyséiert kréien, detektéiert kréien a gesinn, wat do relevant ass a wat net. An dat ass an der Mass vun den Informatiounen, déi mussen analyséiert ginn, och wesentlech méi schwéier. Also eng Evolutioun vun de Moyenen, där een absolutt muss Rechnung droen.

De Rapporteur huet a sengem Rapport ganz vill Detailler gesot. Ech ginn och net méi op déi Detailler an. Ech wëll just hei och nach eng Kéier déi Punkten ernimmen, déi fir eis wichteg sinn.

Evidenterweis ass dat fir d'Éischt de Contrôle vun dem Geheimdéngscht - ee vun deene wichtigste Punkten -, well en en fin de compte an deene leschte Jore virun 2013 net esou geklappt huet, wéi ee sech dat hätt kënnen, hätt solle virstellen, weder um Niveau vun der ministerieller Kontroll nach um Niveau vun der parlamentarescher Kontroll. Mir haten illegal Ecouten. Mir hate Missiounen, déi de legale Kader dépasséiert hunn. A mir haten och ongenügend Finanzkontrollen ënner anerem. An ech mengen, dësen Text mécht eng Rei wichteg Erneierungen.

Éischtens, de Comité ministériel, e puer Wuert doriwwer: An där éischter Versioun, déi mer vun der Regierung krute vum Comité ministériel, do war et esou, dass mer e Comité haten, wou dräi Ministeren zesumme sollten Décisiounen huelen an eng gemeinsam Responsabilitéit hate fir dat, wat am Geheimdéngscht geschitt ass.

Ech verstinn, dass een esou e Comité ministériel asetzt, fir eng besser Coordination interministérielle ze maachen, mä et war awer an eisen Ae vun Ufank u kloer, dass d'Responsabilitéit net däréiert, net sollt diluéiert ginn, well an eisen Aen d'Responsabilité ministérielle eng politesch an individuell Responsabilitéit ass. An de Prinzip vun eise Konstitutionelle Gefüge ass, dass déi Responsabilitéit, déi individuell Responsabilitéit, net däréiert verwässert ginn!

An der zweeter Versioun, déi mer zesummen an der Kommissioun duerno gemaach hunn, ass dat och ganz anescht gestallt ginn. Formell kënnen mer elo domadder liewen, well den Artikel 2 Paragraph (1) kloer an däitlech seet, dass déi Autorité hiérarchique bei de Ministres de tutelle, also an dësem Fall, haut op jidde Fall, beim Statsminister läit, deen also och déi politesch an déi administrativ Responsabilitéit en définitif huet.

Fir eis ass et wichteg, dass dat kloer an däitlech ass. An et ass och iwwerall bäigefüügt ginn, wann de Comité ministériel zesummekënn, dass déi Décisiounen, déi en hëlt, „sur proposition du ministre“ sinn, dass heescht vum Ministre de tutelle kommen. Dat sinn onschëlleg, onscheinbar Sätz, mä déi awer an der Realitéit vun de Responsabilitäten a vun den hiérarchesche Strukturen an eisen Aen extrem

wichtig sinn. An an esou engem Fall wéi deem heiten ass et onausweichlech, dass ee muss Kloertext schwätzen an dass d'Responsabilitäten och musse kloer an däitlech sinn.

D'Kreatioun vum Comité mécht also sécherlech eng besser Coordination interministérielle an deem dote Kontext méiglech. De Comité diskutéiert iwwert d'Politique générale, d'Orientatioun vun den Aktivitéiten, d'Protektioun vun de Renseignementen, déi sensibel sinn. En huet och eng Kontrollroll a sech an d'Gesetz ageschriwwen kritt.

An dat, wat nei ass, och par rapport zum originale Regierungstext, dass ass, dass hei eng Lettre de mission ageschriwwen gëtt, déi de Comité ministériel muss mindestens eemol d'Joer schreiwen, fir a sech déi Aufgaben, déi an deem Joer ustinn, dass heescht déi politesch Prioritéiten, ze definéieren.

Dat ass a mengen Ae wichteg, well et eng zousätzlech Kontroll erlaabt. Den Text seet och ganz kloer, dass déi parlamentaresch Kontrollkommissioun déi Lettre de mission zougestallt muss kréien, wat also fir d'parlamentaresch Kontrollkommissioun heescht, dass se elo wesentlech an hirer Kontroll ka méi wäit goen: Wann déi parlamentaresch Kontrollkommissioun bis elo kontrolléiert huet, dann huet se a sech d'Missiounen, d'Legalitéit vun de Missiounen kontrolléiert, gekuckt, ob dat alles korrekt ofgelaf ass. Elo, wa se eng Lettre de mission kritt, wou d'Regierung genau beschreift, wat fir eng Prioritéiten a wat fir eng Aufgabe se dem Service de renseignement gëtt, dann ass et och un der Commission de contrôle ze kucken, ob a sech déi Lettre de mission an deem, wat d'Kommissioun (veuillez lire: de Service de renseignement) mécht, dann och richtig exekutéiert gëtt, dass heescht, dass en och de politesche Virschreft vun der Regierung follegt an déi Aufgabe prioritär behandelt, déi d'Regierung och als Prioritéit gesäit.

Fir mech ass dat en zousätzlechen Aspekt vun der Kontrollkommissioun, deen ech als wichteg empfannen.

Datselwecht ass d'Kreatioun vun dem Délégué au Service de renseignement de l'État. Dee kënnt aus dem ganz einfache Gedanken eraus, mengen ech, dass de Minister selwer - haaptsächlech wann et de Premier ass, mä och wann et en anere Minister ass, wéi dësen Text dat elo erlaabt -, deen Tutelle vun dem Service de renseignement, vum Geheimdéngscht huet, och net méiglecherweis déi noutwendeg Zäit kann drop konzentréieren, fir dat alles esou ze maachen, wéi et misst gemaach ginn. An dat ass a priori och verständlech. Dat war verständlech, dass ass och fir d'Zukunft verständlech.

D'Kreatioun vun engem Délégué fir de Geheimdéngscht, déi hëlleft, fir dass d'Regierung a sech déi Kontrollfunktoun a priori wesentlech besser kann exercéieren, déi hir ass: en héije Beamten, deen déi noutwendeg Capacitéiten huet - wat dann déi noutwendeg Capacitéiten sinn, ass nach eng aner Fro, mä den Text gesäit emol vir, dass et déi noutwendeg sinn; da kucke mer emol, wéi dat an der Realitéit duerno ausgesäit -, deen all Autorisatiounen huet, fir alles ze kontrolléieren, deen all Rapport kritt, deen an alle Reunionen kann derbäi sinn, fir dee kee Secret opposabel ass, deen all Investigatiounen op allen Niveaue ka maachen, ausser elo d'Exekutioun, déi an der Responsabilitéit evidenteweis vum Direkter ass. All Moyenen also, fir en uerdentleche Contrôle a priori ze maachen a fir op de Komma genau der Regierung ze rapportéieren, wat dann am Geheimdéngscht lass ass, fir dass d'Regierung dee Contrôle a priori ka korrekt maachen.

En aneren Typ vu Kontroll, well ech gesinn dat esou och als Kontroll, dass ass déi Spezialkommissioun vun den dräi Riichter, déi hei am Text ënnerstrach gëtt. Déi sinn a sech responsabel, fir eng Rei Autorisatiounen ze ginn. Och de Fait, dass d'Riichter Autorisatiounen ginn, ass och en Typ vu Kontroll, well domat gëtt d'Adéquatioun vun de Moyene kontrolléiert, ginn d'Moyenen autoriséiert, dass heescht, gëtt och ëmmer kontrolléiert, dass de Geheimdéngscht Fall pro Fall dee Moyene agesat huet, deen am Fong och deem Fall, deen e just amgang ass ze behandelen, entsprécht, dee proportionéiert ass, deen adequat ass, deen dee richtige fir deen do Fall ass.

Och dat ass en Typ vu Kontroll. An dann ass et natierlech un der parlamentarescher Kontrollkommissioun, fir a posteriori ze kontrolléieren, ob all déi noutwendeg Autorisatiounen, och déi vun der Kommissioun vun deenen dräi Riichter, dann do waren, ier déi Moyenen agesat gi sinn.

Wat d'parlamentaresch Kontrollkommissioun ugeet - well ech do mat de Fraktiounskolleegen



an deene leschte Joren eng Rei Erfahrungen hunn -, wëll ech e puer Saache soen:

D’Kommissioun huet gesetzlech all Méiglechkeeten. Si ass awer evidenterweise ofhängeg a war och - déi lescht och - ofhängeg vun alle Renseignement, Informatiounen, déi de Minister oder de Service selwer, an haaptsächlech de Service selwer, der Kommissioun ginn hunn.

D’Kommissioun huet zwar och aner Recherchë gemaach, mä an der Multitude vun den Aufgaben, déi e Service de renseignement huet, wa se net Informatiounen kritt, wa se net iwwer alles informéiert gëtt, dann tappt se awer am Blanne ronderëm. Si kuckt zwar, si sicht zwar, mä et ass net evident. Dofir muss déi Kommissioun sech kënnen drop verlossen, datt se déi relevant Informatiounen och zur Verfügung stellt kritt, ansonsten ass dee Contrôle net evident oder zumindest dem Zoufall ausgesetzt. Datt ass dat Eischte.

Dat Zweet, wat ech wëll soen: D’Kommissioun huet all Méiglechkeeten, mä déi Leit, déi dräsetzen, si Parlamentarier an net onbedéngt grouss Spezialisten a Geheimdéngschtaktiounen, gradesou wéi d’Regierungsmemberen dat net sinn. Si hunn och eng Rei aner Saachen nach ze dinn. Dat heescht, och hiren Zäitkonto ass limitéiert. Dat sinn also zwou Schwächen, déi inherent vun där awer noutwendeger parlamentarescher Kontroll sinn.

Dëst Gesetz probéiert, Léisungen ze fannen. Ob déi Léisungen elo richtig effikass sinn, dat gesi mer an nächster Zäit. Mä op jidde Fall probéiert et, eng Rei Léisungen en place ze setzen. Eng vun de Léisungen, dat ass, datt d’Kommissioun an Zukunft och déi Méiglechkeet huet, fir sech Spezialisten zur Säit ze huelen, déi se ka ganz prezis asetzen, fir an all Detail den een oder deen anere Fall ze analyséieren an hir e Rapport dovunner ze maachen. Ech mengen, dat ass eng grouss Hëllef. Et muss een nach kucken, wéi dat elo praktesch ëmgesat gëtt, mä et ass schonn eng Méiglechkeet, déi awer en aneren Typ vun Analys, en aneren Typ vu Kontroll méiglech mécht.

Op där anerer Säit sinn natierlech och déi Informatiounen, déi d’Kommissioun kritt, wichtig. An do ginn och eng Rei nei Etappen hei gesat. Éischters, ech hunn et scho virdru genannt, kritt d’Kommissioun déi Lettre de mission vun der Regierung. Si kann also kontrolléieren, ob de Geheimdéngscht elo effektiv deem entsprécht, wat e vun der Regierung gesot kritt, a seng Missiounen erfëllt.

Si huet och - an dat muss mer nach kucken, wéi dat organiséiert gëtt - méiglecherweis Relatiounen mat dem Delegéierte vum Geheimdéngscht, dee jo nei geschaaft gëtt. Och do muss ee kucken, wéi déi Relatiounen zwëschen deem engen an deem anere wäerten an Zukunft fonctionnéieren. A si kritt dann och am Gesetz - mä dat war schonn deelweis virdru - generell Informatiounen vum Direkter op prezisen Délaie festgeschriwwen: all dräi Méint fir all déi Missiounen, déi en cours sinn, all sechs Méint fir d’Mesures de contrôle vun de Kommunikatiounen, mat der Obligatioun evidenterweis, komplett ze sinn.

Et steet och do am Text, datt den Direkter spontan muss informéieren, wann en Dysfonctionnement ass, an net drop waarden, bis d’Kommissioun dann zoufälligerweis den Dysfonctionnement gesäit. An datselwecht gëllt fir de Minister: Wann de Minister en Dysfonctionnement géif gesinn, deen d’Kommissioun net gesinn hätt, misst en dem Gesetz no obligéiert sinn, fir d’Kommissioun direkt ze informéieren, dat heescht d’Parlament domadder direkt ze informéieren.

Ech regrettéieren, datt déi Sanction-pénallen, déi virgesi ware fir en Direkter, deen délibérément, wëssentlech also, d’Kommissioun net informéiert, aus dem Text erausgeholl sinn. Dat ass d’ailleurs och eng Proposition, déi d’Commission d’enquête virun zwéi Joer gemaach hat a sengerzäit als wichtig empfongt hat.

Hei gëtt et eng Opposition formelle vum Conseil d’État, de Rapporteur huet et scho gesot. De Conseil d’État schreift: «Le Conseil d’État comprend parfaitement les raisons historiques d’un tel régime. Toutefois, ce régime particulier de responsabilité pénale pour le directeur du service pose des problèmes sérieux au regard du principe de l’égalité de traitement avec d’autres chefs d’administration.» An e mécht hei eng Opposition formelle op Basis vum Non-respect du principe d’égalité.

Ech fannen, d’CSV-Fraktioun fënnt, datt de Geheimdéngscht schonns e besonnesche Service ass. An et ass keen anere Service beim Stat,

et ass keng aner Administratioun beim Stat, déi d’ailleurs en Délégué huet, dee sech just ëm hir Affäre bekëmmert. Et ass keng aner Administratioun beim Stat, wou eng parlamentaresch Kontrollkommissioun d’Aktivitéite vun enger Administratioun kontrolléiert.

Et ass keen anere Service beim Stat, deen esou vill Moyenen huet wéi de Service de renseignement, wéi de Geheimdéngscht, fir preventiv an d’Privatsphär vun de Leit anzudréngen; an och heiansdo bei Leit, déi just duerch Zoufall an esou eng Enquête an Écouteren oder wat och ëmmer gerode sinn, ouni datt se direkt eppes domadder ze dinn hunn.

Et ass kee Service, deen esou sensibel ass an esou vill Moyenen huet, wéi de Geheimdéngscht dat huet. An dofir wär déi Form vu penaler Responsabilitéit, esou wéi se am Text initialement ageschriwwen war, duerchaus an eisen Ae justifiabel a wëschenswäert gewiescht. Mir hunn et akzeptéiert, se hei erauszehuelen, well mer deen Text esou schnell wéi méiglech brauchen a well mer wollte weiderkommen. Mir regrettéieren awer, datt se eraus ass.

Deen zweete grouss Punkt, dat sinn d’Missiounen vum Geheimdéngscht. Och hei waren e puer Clarificatiounen wichtig. Mir hu jo zu Lëtzebuerg contrairement zu deenen anere Länner nëmmen ee Service, wou d’Déngschter... An aner Länner, déi hunn a sech zwéi Services, wou op där enger Säit d’Déngschter fir intern Sécherheet an och déi Déngschter fir auslännesch Aktivitéiten da schéi propper separéiert sinn, ob dat de BND an de Verfassungsschutz an Däitschland sinn, d’CIA an d’NSA op där anerer Säit an Amerika, d’DGSi an d’DGSE a Frankräich oder den MI5 an den MI6 an England. Dat gëtt et bei eis net. Mir hunn nëmmen ee Service, dee sech haaptsächlech op déi intern Sécherheet soll konzentréieren an deen och do a sengen Aufgabe ganz kloer limitéiert muss sinn.

An dofir war et elo wichtig, an dem Text selwer déi Aufgaben esou ze spezifizéieren, datt et kloer ass, datt et nëmme Missiounen sinn, wou Anticipatioun gemaach gëtt a Preventioun gemaach gëtt, datt et nëmme Missiounen sinn, wou a sech eng grouss Menace oder e Risque de menace op d’Sécurité nationale ass, a ganz kloer och dranzeschreiwen, datt dat «à l’exclusion de toute surveillance politique» ass, ob dat d’Surveillance vu Parteien, vu Gewerkschaften oder vun ONGen ass, an datt et mat deem Text net méi méiglech ass, déi Banque-de-données - iwwert déi mer wäerten an e puer Wochen oder an e puer Méint hei schwätzen, déi am Service de renseignement, am SREL, fonnt gi waren a wou et elo drëm geet, se historesch opzeschaffen an ze analyséieren - unzelleen, well dat kloer hei exclu ass a richtegerweis exclu ass, esou wéi den Text elo formuléiert ass.

Mir haten an der Kommissioun och laang Diskussiounen iwwert d’Aktivitéiten, déi susceptible sinn, dann esou eng Menace, esou e Risk duerstellen. Verschiddener waren der kloer: Espionage, Ingérence, Terrorisme, Prolifération d’armes, do ass et evident, datt se mussen drënnerfalen, Crime organisé, Cyberkriminalitéit, Cybermenace evidenterweis och.

Aner Diskussiounen ware méi nuancéiert: Wann ee vun „extrémisme“ schwätzt, do hu mer wëlle preziséieren, datt dat den „extrémisme à propension violente“ wär, net Extrémisme tout court. Et kann een extrem Meinungen hunn. A wat ass Extrémisme, wann een et wëllt definéieren? Mä Extrémisme à propension violente ass evidenterweis eppes anescht a fält ënnert de Ressort vun dem Service de renseignement. An datselwecht ass mat den Sectes nuisibles, déi am Ufanktext esou opgefouert waren, déi awer no Diskussiounen an der Kommissioun aus dem Text erausgeholl gi sinn.

Datselwecht gëllt fir d’Moyenen, déi agesat ginn. Och do ginn ech net an den Detail an. De Rapporteur huet dat gemaach, a se sinn och am Text am Detail beschriwwen. Mä hei gëtt d’Méiglechkeet ginn, och nei Technologien anzusetzen. A mir wëssen, datt d’Kommunikatioun an d’Propaganda haut just iwwert den elektronische Wee lafen.

A wichtig ass, datt och e Kader gesat ginn ass, wéi déi nei Moyenen dann agesat ginn, well se sinn natierlech penetrant fir d’individuell Liewe vun de Leit. An dofir mussen och déi Autorisationsprozeduren an de Kader, an deem se agesat sinn, ganz kloer definéiert sinn. Dësen Text definéiert de Kader esou kloer, wéi et méiglech ass. Si kënnen nëmmen „de façon ciblée“ agesat ginn, dat heescht prezis an net emol generell. Fir emol iwwerall nozekucken a fir dann duerch Zoufall eppes ze fannen, dat geet net - just de façon ciblée!

Et muss en „indice grave ou plusieurs indices concordants“ do sinn. An dat muss och noweisbar sinn. Dat kann dann och kontrolléiert ginn. Si mussen och „proportionnels à la gravité“ sinn a si mussen „la moindre intrusion

dans la vie privée“ wéi méiglech sinn. Och dat soll vun där Kommissioun vun den dräi Riichter da Fall fir Fall gekuckt ginn.

Dat heescht, et muss Moyenen do sinn, mä well se esou intrusiv sinn, muss och kloer sinn, wéi a mat wat fir engen Autorisatiounen se da kënnen gebraucht ginn. An hei sinn och d’Autorisationsprozeduren: Wann ee se kuckt, wéi se am Text beschriwwen sinn, si se net onkomplizéiert an net ondetailéiert beschriwwen. Verschidde Moyene kënnen iwwert d’Autorisation vum Direkter agesat ginn, fir anerer brauch een d’Autorisatiounen vum Comité, fir anerer brauch een d’Autorisatiounen vum Comité a vun der Commission spéciale. Anerer si limitéiert op dräi Méint, anerer si limitéiert op sechs Méint. An d’Destruktioun vu verschidene Saache muss no fënnf Joer obligatoresch gemaach ginn.

Vläicht kann ee soen: Et ass ze vill detailéiert an et ass iwwerdrifwen, mä ech soen awer och ganz kloer, datt et hei jo awer ëm de Schutz vum Privatlewe geet, ëm individuell Fräiheet geet. An dofir, soen ech, mussen déi Beschreibungen hei ganz kloer sinn. Et muss am Gesetz ganz genau stoen, wéi wäit de Geheimdéngscht ka goen, wie wat autoriséiert a wéi et duerno kontrolléiert gëtt. An duerfir, wann dat och à première lecture komplizéiert ka schéngen, ass déi Komplexitéit awer noutwendeg, fir datt et kloer ass, wéi et fonctionnéiert, an datt et och am Detail richtig sëtzt. Et muss effikass sinn, mä mir mussen et am Grëff behalen.

All eis Suerge sinn awer net behuewen, notament déi, wat de Gebrauch vu sougenannten „Statstrojaner“ ugeet, wou awer Intrusioun gemaach gëtt, net ëmmer an d’Liewe vun den Zilpersounen, mä och méiglecherweis an d’Liewe vun deene Persounen, déi sech ronderëm déi Zilpersounen bewegen. Ee vu menge Fraktiounskolleegen wäert nach duerno méi am Detail dorobber agoen.

En anere Punkt, dee fir eis wichtig ass, dat ass dee vun de Relatiounen mat anere Services, ob dat elo inlännesch Services sinn, wéi d’Polizei oder d’Justiz, oder ob et auslännesch Geheimdéngschter sinn. An och hei muss een esou prezis wéi méiglech sinn. An och hei beschreift den Text relativ kloer, wéi dat geet. Den Accès un d’Base-de-données ass geregelt am Artikel 10. (2). A wat fir mech wierklech wichtig ass, dat ass, datt am Service och selwer e Chargé de la protection des données ass, deen dat dann alles nokontrolléiere kann. An och den Informationsaustausch ass kloer geregelt iwwert d’Demande écrite, iwwert d’Voie hiérarchique. An d’Noutwendegkeet vun enger Traçabilité ass hei mat deem Text erfëllt.

Mir haten och laang Diskussiounen an der Kommissioun, schwieereg Diskussiounen, muss ech soen - also inhaltlech schwieereg, net ënner eis schwieereg -, schwieereg Diskussiounen iwwert dee Moment, wou de Service de renseignement en Dossier misst ofginn un aner Services, un d’Polizei zum Beispill.

Et ass eppes zrëckbehale ginn, wat am Fong evident ass an dofir net méi an den Text huet misse geschriwwen ginn, mä et ass mer awer wichtig genuch, fir datt een et nach eng Kéier ernimmt: Et ass evident, datt d’Leit aus dem Service de renseignement, aus dem Geheimdéngscht sech mussen un den Artikel 23 vum Code d’instruction criminelle halen. Dat heescht, wa se an hirer Enquête eppes gesinn, wa se eng penal Infraction constatéieren, mussen se dat och natierlech un déi zoustänneg Stellen automatesch weiderginn. Dee grouss Prinzip gëllt fir jiddwereen, also evidenterweis och fir d’Leit aus dem Geheimdéngscht!

Wat den Échange mat anere Geheimdéngschter ass, vun deenen natierlech de Lëtzebuerger Geheimdéngscht leeft, sinn eng Rei Garantien agefouert ginn, déi och am alen Text am Fong net dra waren: D’Garantien, fir ze soen, datt, wann de Geheimdéngscht refuséiert, eng Rei Quellen eraszeginn am Kader vun enger Gerichtsaffär, da kann de Riichter awer verifizéieren, datt et sech hei och ëm auslännesch Quellen handelt, datt et sech hei ëm auslännesch Dokumenter handelt, soudatt hien dat net einfach muss gleewen, mä déi Verifikatioun ka vun engem Riichter gemaach ginn, deen dat da constatéiert a confirméiert.

Wat d’Personal ugeet, e puer Remarquen, oder déi éischt Remarquen iwwert d’Primmen: D’Regierung hat am initialen Text des Primmen, esou wéi se waren, weidergefuert. Domat huet se am Fong och en Engagement vun der viregter Regierung agehalen, déi am Fong gesot hat, datt näischt un de Primme géif geännert ginn, notament am Kader vun de viregte Gehälternégociatiounen, an haaptsächlech ouni datt eng generell Etüd iwwert d’Primme géif gemaach ginn. Dat sinn och Aussoen, zu deene mer nach ëmmer stinn!

De Conseil d’État huet awer du gesot, datt en d’Grënn net géif verstoen, firwat am Service de renseignement eng Prime de risque, eng Prime

d’astreinte an eng Indemnité spéciale géif bestoen, an en huet de Principe constitutionnel de l’égalité devant la loi ervirbruecht, fir dorop eng Opposition formelle ze maachen. Et ass probéiert ginn, eng Rei Solutiounen ze fannen, an et ass a sech de Prinzip vun der Prime de risque, d’astreinte an der Indemnité spéciale bäibehale ginn, ouni datt et awer elo tel quel konnt bäibehale ginn, aus dem Grond vun der Opposition formelle zu deem, wéi et a sech am Initialtext festgehal gëtt.

Et ass regretttabel, datt et net anescht méiglech war. Mä fir eis ass et awer och kloer, datt mer deen Text hei esou schnell wéi méiglech brauchen an dofir mussen mat deem Text weiderkommen.

Ech wëll awer kloer hannendrusoen, datt an eisen Aen dat hei net ka benotzt ginn als Präzedenzfall fir zukünfteg Reformen, déi kommen. Dat muss kloer an däitlech sinn. D’Regierung kennt elo dem Conseil d’État seng Meinung iwwert deesen Typ vu Primmen, an an Diskussiounen iwwer eventuell aner Administratiounen muss d’Erkenntnis vun deem, wat de Conseil d’État wäert iwwer esou Primme soen, dann och diskutéiert gi mat deenen zoustänneg Leit, fir Solutiounen an engem gemeinsamen Accord do ze fannen.

Deen zweete Punkt iwwert d’Personal, dat ass dee vun dem Personal, vum Ensembl vum Personal, wat dem Geheimdéngscht zur Verfügung steet. Dat ware 60 Leit. Deen éischten Text huet eng Limit vu 65 Leit virgesinn, et ass vu 60 op 65 Leit eropgaangen. Och do seet de Conseil d’État: «Tout en concédant que ce renforcement de l’effectif relève en fin de compte du domaine des questions d’opportunité à trancher par la Chambre des députés, il s’interroge pourtant sur la nécessité des engagements supplémentaires, alors qu’il ne résulte nulle part du dossier sous examen quelle est l’utilisation actuelle des ressources humaines en place et quelles seraient d’éventuelles raisons justifiant le renforcement prévu.»

Och do soen ech kloer am Numm vun der CSV, datt mir vun Ufank un der Meinung waren, contrairement zum Conseil d’État, dee retizent war fir eng Augmentatioun vun den Effectiven, datt a sech souguer déi Augmentatioun, déi am Text virgesi war mat der Limit vu 65 Leit, fir eis vun Ufank un ongenügend war a mer eis agesat hunn, datt keng Limit sollt an den Text geschriwwen ginn. Dat, well mer der Meinung sinn, datt fir déi Aufgaben, déi de Service soll maachen, d’Personal haut schonn net duergeet, datt d’Evolution och wäert mat sech bréngen, datt mer nach wesentlech méi Personal an Zukunft brauchen, an datt bei aneren Administratiounen och an deene leschte Gesetzestexten keng esou Limiten ageschriwwen gi sinn!

Am Ufank huet d’Regierung op déi Limit insistéiert, duerno awer noginn an déi Limit erausgeholl. Elo muss all Poste justifiéiert ginn, wat ech absolut normal fannen, de richtige Wee fannen. D’CER muss en, wéi bei aneren Administratiounen, accordéieren an, seet och d’Gesetz, d’Kontrollkommissioun kritt déi eenzel Demanden, déi de Service de renseignement all Joers mécht, a ka se aviséieren a kann och d’Regierung informéieren iwwer hiren Avis zu den Effectiven, déi dann eventuell gefrot ginn, fir an d’Luucht ze setzen.

Zum Schluss vun deem, wat ech wollt soen, zwou Froen, déi mer eis, mengen ech, haut awer mussen stellen, wa mer deen Text hei hunn. Déi éischt Fro ass: Hätt deesen Text, wa schonn an Applikatioun virun zwéi, dräi, véier Joer, déi Problemer verminden, déi mer 2012 an 2013 opgedeckt hunn? Éischt Fro.

Zweet Fro, nach méi wichtig, a mengen Aen: Gëtt den Text den Erausforderunge gerecht, déi op d’Sécherheet vun eisem Land an op eise Geheimdéngscht an deenen nächste Jore wäerten zoukommen? Ass en adaptéiert un déi Geforelag, déi sech haut stellt? Hëlleft en eis, besser géint d’Geforen, zu Beispill vun Terrorismus, preventiv ze handeln?

Zwou Froen, wou d’Äntwert a mengen Aen net einfach ass an net einfach ka Jo oder Nee sinn, wou een nuancéiert muss erugeen. Déi éischt Fro: Hätt en d’Problemer verminden? En ass sécherlech - an ech wëll et emol esou beäntwerten - en Deel vun der Äntwert, déi mer kënnen drop ginn. En ass manner flou. E schaaft méi Kontroll. An dat hätt sécherlech kënnen an deene Jore virdru hëllefen! Zum Beispill fir illegal Écouteren, zum Beispill fir d’Missiounen, déi de legale Kader dépasséiert hunn, dat wär mat deem Text sécherlech méi schwieereg gewiescht, fir et ze maachen.

Ob aner Faiten, wéi zum Beispill dee vum Enregistrement vun engem Statsminister, hätte kënnen évitéiert ginn, ass eng aner Fro. Gewollten eenzel répréhensibel Aktiounen vun eenzelne Leit si warscheinlech ni ganz ze vermeiden. Op jidde Fall bezweifelen ech et. Ech mengen par contre, datt dat hei sécherlech e richtige



Schrëtt ass an déi richteg Richtung, ouni datt en alles an Zukunft wäert vermeiden.

Zweet Fro: D'Gefore vun haut, gött en hinne gerecht? Et ass scho méi wéi eng Kéier gesot ginn: Eng absolutt Sécherheet gött et net! Mä dat hei schafft méi Klorheet, méi juristesche Moyenen, méi Méiglechkeeten, méi Ofsécherung och vun de Beamten, déi hir Aufgab maachen, méi Kontroll. Dofir ass et wichteg a positiv a mengen Aen.

Ech soen awer och hannendrun: Vu datt déi Welt, den Terrorismus, déi Geforen, déi op Europa, op eist Land lauer, awer amgaange sinn, och extrem schnell ze änneren - d'Aart a Weis wéi et fonctionnéiert, d'Aart a Weis wéi mer menacéiert ginn -, musse mer och prett sinn, fir zousätzlech Adaptatiounen kuerzfristeg ze maachen, dann, wa mer gesinn, datt se noutwendeg sinn. Och mir als Parlament an d'Regierung musse schnell, musse reaktiv kënne sinn dann, wann et noutwendeg ass.

Dat hei ass sécherlech net dee leschten Text, dee mer an deenen nächste Joren, déi kommen, maachen. Et ass elo den Text, wou mer mengen, datt en op dat äntwert, wat mer haut gesinn, mä muer komme sécherlech aner Saachen, aner Geforen, an da musse mer kënne reaktiv sinn, da musse mer kënne schnell reagieren.

An der gesamter Sécherheetsfro, soen ech och hannendrun, ass et och nëmmen een Aspekt, dee mer haut beréieren. D'Gesetz vum Haut-commissariat - mir hunn et gëscher an der Institutionskommissioun ugeschwat - ass deen nächste Schrëtt, muss esou schnell wéi méiglech kommen. D'Ännerunge vum Artikel 32.(4) vun der Constitution iwwert d'Crise nationale an den État d'urgence sinn en aneren Aspekt, dee muss kommen. Dee ganzen Text iwwert déi Sécherheetsmoossnamen, deen an der Chamber déposéiert ass, ass och sécherlech een Deel vun deem Arsenal, deen eng Demokratie, deen e Stat sech muss ginn, fir reaktiounsfäeg ze sinn, an deen déi noutwendeg Equilibre schafft tëschent Sécherheet a Fräiheet. An am Kader vun deenen Texter muss iwwert deen noutwendegen Equilibre sécher nach eng Kéier diskutéiert ginn.

An eisen Aen ass den Text iwwert de Geheimdängscht, wéi déi dräi aner Texter, en noutwendegen Text, fir eise Rechtsstat staark ze maachen. D'Zilsetzung vun engem staarken Rechtsstat ass et, eis Bierger, eis Gesellschaft, hir Wäerter an domat och d'Fräiheet vu senger Bierger ze schützen. An aus deem Grond wäert d'CSV deen Text stëmmen.

Ech soen lech Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Wiseler. An d'Wuert huet elo den Här Lex Delles fir d'DP.

► **M. Lex Delles (DP).** - Merci villmools! Här President, léif Kollegeinnen a Kollegen, ech wëllt dann och virop dem Eugène Berger fir säi schréfftlechen a mëndleche Rapport félicitéieren, an deenen hien ausféierlech op déi zukünftige Changementer am Service de renseignement agaangen ass.

Dës Reform ass wichteg a batter néideg, ze-mools wann ee bedenkt, wat aus dem fréiere SREL ginn ass. De Geheimdängschtskandal huet sech jo deemools lues a lues zu enger regelrechter Institutionskris entwéckelt. Regierung, Chamber, Justiz an net zulescht de SREL selwer waren am Coup. Keen huet deem anere méi esou richteg getraut an et wouste een net méi esou richteg, wien ee wat sollt gleewen.

D'ganzt Land war wéi geläamt, d'Leit ware verunsécher, d'Vertrauen an d'Institutionen op engem Déifpunkt. D'Fundamenter vun eise Rechtsstat ware seriö a Gefor. Dat soll keng iwwerdriffige Polemik duerstellen, mä et war keng schéin Zäit fir eist Land. An ech si mer sécher, datt mir, an domat mengen ech all d'Institutionen, nach haut an deem Vertrauensverloscht ze knaen hunn, deen deemools ugeriicht gouf.

Mir liewen an enger séier iwwerliefter Zäit, an där oft Saachen, déi haut nach wouer sinn, muer schonn erëm onwouer oder vergiess sinn. D'Geheimdängschtsaffär dierfe mer awer op kee Fall vergiessen! Et ass eng Affär, déi iwweregens bis haut net ganz opgekläert gouf a vun esou engem enormen Ausmooss war, datt si fir eis Zukunft eng Léier an eng Warnung zugläich soll sinn.

Et däerf net méi virkommen, datt mir lichtfäerdeg mat de Pouvoire vu staatlechen Organisation wéi dem SREL ëmginn, besonnesch well dës, falls se erëm aus dem Rudder lafen, riskéieren, grav Suitte fir eis Gesellschaft ze hunn.

Wann ech virdru gesot hunn, datt de SREL deelweis gemaach huet, wat him grad an de Sënn komm ass, da wëllt dat leider net hee-

schen, datt déi Responsabel vun deemools net am Bild waren, wat deemools gelaf ass. Nieft dem Fakt u sech, datt am SREL massiv Dysfunktionnementer waren, fannen ech et eigentlech gradesou schlëmm, datt déi deemoleg politesch Responsabel vun deenen Dysfunktionnementer Bescheed wousten an näischt direkt ënnerholl hunn! Et si weder personell Konsequenzen am SREL gezu ginn nach ass derfir gesuergt ginn, datt de SREL ënner hirer Op-sicht esou ëmorganiséiert gouf, datt Abusen net méi méiglech waren!

Ech ginn dem Här Juncker awer ausdrécklech recht a senger Ausso, datt ee Minister eleng de SREL net kontrolléiere kann. Mä firwat huet en dann net reagiert, wéi e bis gemierkt huet, datt d'Verhale vu senger Beamten aus dem Rudder gelaf ass? A spéitstens no der Aueraffär si jo awer och all Alarmklacken iwwerall ugaangen. Souguer während der Enquêtekommissioun ass ëmmer nëmmen dat zouginn, wat virdru duerch d'Press duerchgesickert ass a soumat net méi ofzestriede war.

Duerch déi regelrecht Salamtaktik, déi do ugewannt gouf, sinn eiser Justiz haut duerch d'Verjörung deelweis d'Hänn gebonnen, well deemools de Moment verpasst ginn ass, d'Plainten direkt ze maachen! Nëmmen duerch esou e Feelverhale konnt et zu där institutioneller Kris am Land kommen, mat där hire Suitte mir, wéi gesot, nach bis haut geplot sinn.

Et muss een dës Regierung wierklech ausdrécklech Merci soen, datt mir mat deemem Projet de loi weinstens inhaltlech Konsequenzen zéie kënnen an de Geheimdängscht esou opstellen, wéi sech dat an engem Rechtsstat gehéiert. Ee Geheimdängscht ass nämlech wichteg an noutwendeg, och, wa säi Rôle staark geännert huet, well wann ee fréier genau wouste, op wéi enger Säit ee stoung a wien ee misst ausspionéieren, fir u relevant Informationen ze kommen, esou ass dat haut net méi de Fall.

D'Cible vum SREL gesäit een net méi op enger Landkaart. Et si keng Natiounen méi, mä Persounen, déi sech iwwerall op der Welt kënnen ophalen. Dofir ass och de gudder Kontakt zu anere Geheimdängschter immens wichteg, fir sech géigesäitig géint d'Geforen aus dem In- an Ausland ze schützen. De primäre Rôle vum Geheimdängscht ass net méi eleng, fir un Informationen ze kommen - mir liewen nämlech an engem Iwwerfloss un Informationen -, mä e besteet elo doranner, zesumme mat de Kollegen aus dem Ausland d'Informationen ze sammelen, ze filteren an da beschtméiglech drop ze reagieren.

Dës ass ëmsou méi wichteg, wa mer eis virun Ae féieren, wat zurzäit an eise noen Ëmfeld lass ass. Frankräich ass am Moment an engem quasi permanenten État d'urgence an et vergeet bal keng Woch, an där net vun anere Menacen aus dem Ausland gehéiert gött. D'Billen vun deene grujelegen a feigen Attentater, ënner anere zu Paräis a Bréissel, hunn eis gewisen, datt och virun der Lëtzebuerger Hausdier eng potenziell Gefor besteet, op déi ee ganz gutt muss oppassen a mat där een net kann naiv ëmgoen.

Här President, ech mengen, d'Wichtigkeet vum SREL dierft deene meeschten heibanne kloer sinn. Wat awer däitlech manner kloer war an der Vergaangenheet, ass d'Fro, wéi de SREL soll funktionéieren a wéi een de SREL soll kontrolléieren. Och wann deen ënnert der Tutelle vum Staatsminister stoung, dem Chef vun der Regierung also, esou war dat an deene leschte Jore keng Garantie derfir, datt de SREL a riichte Bunne gelaf ass an datt hien net gemaach huet, wat him grad an de Sënn komm ass.

Dës Reform war dofir vun Ufank un eng absolutt Prioritéit fir dës Regierung. Déi legislativ Prozedur zu deemem Projet de loi huet awer net erëischt mam Premierminister Xavier Bettel sengem Dépôt während senger éischter Ried zur Lag vun der Natioun ugefaangen. Dës Reform huet eng Virgeschicht mat engem Héichpunkt, an zwar mat der memorabler Chambersdebatt vum 10. Juli 2013.

Et war genau deen Dag, op deem d'Enquêtekommissioun hire Rapport presentéiert huet, e Rapport mat 140 Säiten, deen d'Konklusionen iwwert d'Mësstänn an d'Dysfunktionnement am SREL gezunn huet. Et war en exemplaresche Bewäis fir d'Zesummeschaff vu Parlamentarier, och wann deemools d'CSV Schwierigkeiten hat, deem zoustëmme. Et war en équilibréierten Rapport, an deem et jiddwerengem fräigestallt war, selwer Iddien a Virschléi anzubringen, an e Rapport, un deem bis zulescht geféilt gouf.

Mir erënneren eis alleguerten drun, datt de Premier 2007 vu sengen eegene Leit mat enger truquéierter Auer ofgelauschert ginn ass. Während dësër Écoute sollt jo rieds sinn iwwer eng kryptéiert CD, déi Informationen enthalte sollt iwwert dem Premier säi Gespräch mam Grand-Duc am Kader vum Bommeleerprozess.

Dat muss ee sech emol virun Ae féieren! Falls déi Informationen wierklech op dës kryptéierter CD waren, goufen de Premier an de Grand-Duc, ëmmerhi Stats- a Regierungschef, vum eegene Geheimdängscht ausspionéiert!

E fundamentale Problem war awer, wéi gesot, datt net direkt reagiert ginn ass, soudatt zum Beispill de Marco Mille sech ni huet misse fir säi Feelverhale verantworten an esou gemitterlech an d'Privatindustrie konnt plënnere.

Dobäi war jo déi sougenannten Aueraffär just d'Spëtzt vum Äisberg! No an no sinn duerch d'Press ëmmer weider Mësstänn un d'Liicht komm, déi net manner grav waren. Aus dem Rapport goug jo och nach ervir, datt 2006 intern eng Operatioun lancéiert ginn ass, fir eng parallell Police ze schaffen! Dat muss ee sech dach emol virstellen!

Do huet e SREL-Agent, dee virdru bei der richteger Police grand-ducale war, Dossierien eriwuer an de SREL geschleeft. Do goufen dann op Basis vun deenen Informationen Enquête gemaach, wéi eng sexuell Orientatioun verschidde Perséinlechkeeten hunn, an net egal wéi eng Perséinlechkeeten! Et goug deemools ëmmerhin ënner anere ëm deen héchste Magistrat, dee sech dann duerno och nach huet misse géint Pädophilie-Rumeure wieren!

An ech wëll nach eemol op dës Plaz soen: D'Streeë vun dëse Rumeure war an ass skandaléis! Et gött keen anere Qualificatif dofir.

Ech kéint och nach weider Dysfunktionnementer uschwätzen, wéi zum Beispill d'Affär mat den Dängschtwegen vum SREL, de Logement vum Gérard Reuter an d'Operatioun Katana, mä dat géif de Kader vun haut sprengen, esou vill misst zu deenen eenzelnen Dysfunktionnementer awer emol gesot ginn.

All dës huet dozou bäigedroen, datt de Lëtzebuerger Service de renseignement an der Effentlechkeet an e schlecht Liicht geroden ass, an dës zu Recht! Déi grav Mësstänn, déi un eise Rechtsstat gekraatz hunn, hunn net dozou bäigedroen, d'Vertrauen an eis Institutionen ze stäerken. Dat systematescht Feelverhale vum SREL huet eis gewisen, datt och ee Geheimdängscht sech un d'Regele vun der Stee hale muss an datt et net ka sinn, datt de SREL an engem rechtsfräie Raum operéiert!

Här President, zanterhier sinn awer dräi Jore vergaangen, an elo sti mer nees hei, fir op en Neits iwwert de SREL ze schwätzen. Mat dës Reform gött de SREL an Zukunft op véier ënnerschiddlechen Niveauen kontrolléiert, fir esou sécherstellen, datt de Geheimdängscht genau déi Aufgabe mécht, déi him zougestallt goufen, net méi an net manner!

Et gött e Service „sous haute surveillance“, wéi de Rapporteur et scho sot. D'Missionne gi kloer preziséiert. Fir dat ze ënnersträichen, gött hei och eng Lettre de mission ausgeschafft. Et ass e Gesetz, datt d'Missionen an d'Methode genau beschreift. Den Datschutz steet am Vierdergrond. Haut ass also dee virleefegen Ofschloss vun enger Affär, déi eise Rechtsstat seriö a Gefor bruecht huet.

D'DP huet sech ëmmer als eng Partei verstanen, déi fir de Rechtsstat, eis Wäerter an eis Fräiheeten asteet. Dat war 2013 net anescht. Wann d'DP deemools esou hartnäckeg derfir agetrueden ass, datt de Geheimdängschtskandal opgekläert gött, dann hat dat näischt, awer och wierklech guer näischt mat engem parteipolitesche Manöver oder engem Coup d'État ze dinn, wéi dat haut heiansdo e puer Leit nach probéieren ze behaupten. Mir bedeelegen eis net u bëllege Versich, d'Geschicht nei ze schreiwen, mir konzentréieren eis weiderhin drop, duerch eis Politik d'Land besser ze maachen.

Wa mir haut dës Reform de loi an dës Reform vum SREL stëmme kënnen, wëll ech ënnersträichen, datt dat de Verdängscht vun enger Rei Journalisten ass, déi d'Mësstänn am Funktionnement vum Geheimdängscht opgedeckt hunn. Ouni dës Révélatione wier et warscheinlech ni zu enger Enquêtekommissioun komm a mir géifen haut ganz sécher net iwwert dës Reform ofstëmme. Ech wëll also zum Schluss vun der Geleeënheet profitéieren, fir deenen engagéierte Journaliste Merci ze soe fir hir exzellente Aarbecht, awer och fir hire Courage, dee si zu där Zäit bewisen hunn!

Dës gesot, ginn ech am Numm vu menger Fraktioun den Accord fir dës Reform am Sënn vun eise Land an am Sënn vum Rechtsstat. Merci fir d'Nolauschteren!

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Delles. An d'Wuert huet elo den Här Alex Bodry fir d'LSAP. Här Bodry!

► **M. Alex Bodry (LSAP).** - Jo, Här President, Dir Dammen an Dir Härren, et ass net fir d'Éischt an - ech woen deen Ausbléck hei ze maachen - warscheinlech net fir d'Lescht,

wou dës Parlament wäert iwwert de Service de renseignement an iwwer eng méiglech Reform oder Reorganisatioun vum Service de renseignement diskutéieren.

Et huet dat gemaach verschidde Kéieren an der Vergaangenheet, eng éischte Kéier 1960, wéi dat éischt Gesetz iwwert de Service de renseignement komm ass. Et waren e puer Artikelcher, déi déi Aktivitéit probéiert hunn ze beschreiwen. A mir wëssen, zu wat fir engen Auswüchsen an der Praxis en ze kuerzen, en ze onprezisen, en ongenügende legale Kader gefouert huet! Déi al Karteien, déi al Archive vun dem Service de renseignement, déi jo wäerten historesch a wëssenschaftlech opgeschafft ginn, weisen, dass do munchen net an deem Kader bliwwen ass, wéi et sengerzäit hei vun der Chamber gewünscht war.

Et ass an de 70er Jore souguer probéiert ginn, deemools vun der sozialiberaler Koalitioun, fir de Service de renseignement ofzeschaffen. Den Här Juncker huet bei den Debatten 2004 hei genüsslech zitéiert aus deem aussichtslose Kampf, dee sengerzäit d'Regierung Thorn-Vouel respektiv Thorn-Berg gefouert huet, fir de Service de renseignement ofzeschaffen, Renseignementsaktivitéiten ze verlagere an eng ëmreforméiert Sûreté, an dem Brëif, dee sengerzäit anscheinend den Här Luns dem Här Thorn geschriwwen huet, wou e gesot huet: „Ma weini gitt Der dann elo aus der NATO eraus?“

Et wär vläicht dem Här Juncker besser ergaangen, wann den Här Thorn sech sengerzäit mat senger Regierung duerchgesat hätt par rapport zum Statsrot, dee ganz géint dee Projet war, och par rapport zu der CSV an der Opposition a par rapport zu der NATO.

Eh bien, et ass net esou komm! An dee Versuch ass definitiv gescheitert, och wann aner Membere vun dësem Haus e puer Jore méi spët - et gött och eng Proposition de loi vun den Härren Huss a Bausch - och sengerzäit gefrot hunn, iwwer e Gesetz de Service de renseignement ofzeschaffen.

Mä och déi Regierung duerno, och eng CSV/LSAP-Regierung, huet an der Period 1994-1999 an hirem Programm scho gehat, fir de Service de renseignement ze reforméieren, eng éischte Kéier. Ech sinn do Zäitze gewiescht vun deenen Diskussionen. Do ass e Projet presentéiert ginn, ech mengen, eleng sengerzäit ausgeschafft vun dem deemolege Responsable vum Service de renseignement, deen eng Kéier am Conseil de Gouvernement diskutéiert ginn ass an deen do op esou harsch Kritik gestouss ass weinst sengen inhaltlechen an technesche Mängel, dass den deemolegen zoustännige Minister, den Här Juncker, et net méi gewot huet, deen Text nach eng Kéier zréckzebréngen.

Et huet also gedauert bis an d'21. Jorhonnert eran, bis e Projet de loi komm ass, deemools presentéiert vum Här Juncker am Rumm vun enger CSV/DP-Koalitioun. Dee Projet ass dann an der leschter Sitzungswoch - dat war vläicht net déi allerbeschten Iddi -, an der leschter Sitzungswoch ier et zu de Wahlen komm ass, am Mee 2004 dann hei vun der Chamber diskutéiert an och majoritär ugehall ginn.

An ech wëll grad bei mengen Iwwerleeungen ebe vun den Debatte vun 2004 ausgoen, well do drolecherweis - et ass interessant, dat nozeliesen - den Här Wiseler nëmmen Zitater geholl huet aus dem Rapport vum Rapporteur, dem Här Weiler sengerzäit. Ech wäert mer erlaben, e puer aner Zitater hei unzeféieren, well et zum Deel genau déi Froen, wou den Här Wiseler elo grad esou mat grousser Euphorie sech hei begeeschtert huet, dass mer dat an deen neien Text géifen eraschreiwen, grad déi dote Propositione waren an der Debatt do, fir deen Text, deen elo aktuell d'Gesetz iwwert de Service de renseignement ass, fir deen net esou duerchgoen ze loosse, wéi deemools d'Regierung e presentéiert huet, mä op e puer Punkten ze verbessere. An dat si genau déi Punkten, déi sech herno als Schwaachstelle vum Text erausgestallt hunn an et si genau déi Innovationen, déi mer elo zwielef Jore méi spët an dat neit Gesetz iwwert de Service de renseignement wëllen aféieren!

Do sinn zéng, zwielef Jore verluer gaangen. Wann ee sech sengerzäit méi opgemaach hätt fir sachlech virgedroe Kriticken, da wäer vläicht munch Saachen net passéiert an deene leschte Joren.

Wat waren déi Kriticken, déi sengerzäit formuléiert si ginn - notamment vun der LSAP, mä net nëmmen vun der LSAP - bei deenen doten Debatten?



Et ware véier Haaptkriticken. Et war d'Meenung, dass déi parlamentaresch Kontroll - dat war jo eng vun deene groussen Neierungen, déi agefouert ginn ass -, dass déi ongenügend wär, dass dat en zahnlosen Tiger wär an dass u sech déi parlamentaresch Kontrollkommission net genuch Moyenen hätt, fir kënnen eng uerdentlech Kontroll ze maachen, well se och ëmmer ofhängeg war vun deem, wat se vun Informatiounen geliwwert krut. Deemools ass scho gesot ginn, dat dierft net esou sinn, dass déi einfach Rapporten nëmme virgedroe kritt, mä déi misst och selwer kënnen aktiv ginn - genau eng Schwaachstell, déi mer an der Tëschenzäit dann an der Praxis detektiert hunn.

Deen zweete Virschlag, dee vun der LSAP sengerzäit gemaach ginn ass, dat war deem, dass mer onbedéngt missten nom belsche Modell - well d'Belsch haten deemools schonn e Gesetz an deem Sënn - e legalen Encadrement maache vun allen Investigatiounspraktiken, déi de Service de renseignement huet, net nëmme vun den Écoutes téléphoniques, mä och vun der Filature, och vun de verdeckten Ermittlungen. Dat ass sengerzäit refuséiert ginn.

Den Här Juncker huet dozou nach expressément Stellung bezunn. En huet et refuséiert, well et a sengen Aen ze komplizéiert wär. Abee, zwielef Joer méi spët weise mer, dass et geet, dass mer hei Texter hunn an dass dat dote machbar ass, wann de politesche Wellen do ass, fir uerdentlech an zerguttst Gesetzestexter ze schreiwen.

Och hate mer sengerzäit virgeschloen, et misst een de Verbuet vun der politescher Bespëtzelung an den Text vum Gesetz eraschreiwen. Genau dat, wat mer elo maachen an deemem Text! A genau dat, wat den deemolege Statsminister refuséiert huet, well e gemengt huet, dass dat géif eigentlech ze vill anengen.

Ech zitieren: „Den Här Bodry hätt gare gehat, dass an d'Gesetz géif stoe kommen, et dierfte keng politesch Renseignementer agezu ginn. Ech verstinn déi Remarque, mä ech deele se net richtig, well wann een dat draschreift, leet ee sech och Handschellen un.“ Enn vun deemem Zitat. Ech hoffen, dass mer eis elo mat deem heiten Text, wou mer dat drageschriwwen hunn, net onnéideg Handschellen hei undinn.

Datselwecht gëllt, véierte Punkt, fir den Emgang mat den Datebanken an den Date-schutz. Wéi geet ee mat deene Renseignementer ëm, déi do gesammelt gi sinn? Do ass e Règlement grand-ducal virgesi gewiescht an deem Text vun 2004. Do war kee Projet gläichzäiteg virgestallt ginn, wéi deem Text hei gestëmmt ginn ass, et war och nach keen Text fäerdeg sengerzäit, mä den Här Juncker, grousszügeg wéi e war, huet a senger Antwort um Schluss vun den Debatten och dozou eng ganz markant Ausso gemaach. E sot, jo, selbstverständlich géif dorunner geschafft ginn, an en hätt guer kee Problem, der Kontrollkommission an allen anere Kommissionen am Parlament, déi en Interesse hätten, dat Règlement dann zoukommen ze loossen.

Abee, soulaang wéi den Här Juncker Statsminister war, ass et net esou wäit komm, dass en dat dote konnt maachen, well einfach un deem Text net geschafft ginn ass!

Dat, fir ze soen, dass mer eis munches hätte kënnen erspueren, wann ee sengerzäit méi op Konsens ausgeriicht gewiescht wär an et hätt een, nieft deene gudden Neierungen, déi och schonn am Text vun 2004 par rapport zum Text vun 1960 dra waren, effektiv och déi zousätzlech, fundamental eigentlech gerechtfertigt Remarqueng eng kéier berücksichtig. Mä dat war, esou kuerz virun de Wahlen, net gewollt. An et wollt ee jo nach schnell virun de Wahlen kënnen soen: „Ma mir hunn hei de Service de renseignement reforméiert a mir hunn eng parlamentaresch Kontroll agefouert an domadder ass alles an der Rei.“ A gläichzäiteg huet een natierlech och domadder d'Parlament mat an d'Responsabilitéit eragezunn.

Dat huet dozou gefouert, dass mer eis sengerzäit enthalten hate bei deem doten Text, well mer der Meenung waren, dass den Text eigentlech gutt genuch wär, fir net dergéint ze stëmmen, mä net gutt genuch, fir och fir deem Text ze stëmmen. déi gréng an ee Verrieder vum ADR hu sech sengerzäit och enthalten. All déi aner Parteien hunn deem Text vun 2004 gestëmmt.

Deen Text do fanne mer elo net méi gutt. Dat ass déi zweet Etapp, déi sech da mécht, an der-tëschen natierlech hu mer déi onangeneem Evenementer kritt, déi mer alleguerde kennen, mat deenen Dysfonctionnement am SREL, besonnesch an der Period vun 2004 bis 2008,

mat all deene Schwaachstellen am Fonctionnement, an der Organisation, an der Kontroll vun deem Noriichtendéngscht, déi sech bemierkbar gemaach hunn, deene Leit, déi sech verselbststännegt haten an der Struktur selwer, déi jo Enquêtes ugefaangen an Initiativ op eege Fauscht geholl hunn a kenger Kontroll intern an extern eigentlech ausgesat waren.

Dat Ganzt ass niddergeschriwwen am Rapport vun der Enquêtékommision, déi jo vun Dezember 2012 bis Juli 2013 getaagt huet an op déi administrativ, penal, disziplinaresch a politesch Responsabilitéiten agaanen ass an deem Rapport an déi och concluéiert huet, dass den zoustännege Minister, et war de Statsminister Juncker, och déi politesch Responsabilitéit ze droen hätt fir déi Dysfonctionnement, déi festgestallt si ginn, opgrond einfach vum Fait, dass en de politesche Virgesetzen ass vun deem Service do, an opgrond och vun eegener ongenügender Féierung eigentlech, wat déi Verwaltung ugeet, déi him als Minister ënnerstallt war.

Dee Rapport, ech wëll et nach eng kéier betounen, ass ugehall gi mat de Stëmme vun LSAP-, DP-, Gréngen-, Lénk- an ADR-Verrieder. D'CSV huet en net gestëmmt. Mä et ass wouer, dat wëll ech awer hei bestätegen, si huet awer ëmmer gesot, dass se eigentlech déi inhaltlech Konklusionen, wat d'Reform vum Service de renseignement ugeet, dass se déi och sengerzäit mat gedeelt huet.

An deem Rapport, dat ass interessant, hu mer eng Virfro beäntwert, déi och vun anere Riedner hei schonn ugeschnidde ginn ass: Brauche mer eigentlech e Service de renseignement?

A sengerzäit, nodeem mer och eng Rei vun auslänneschen Experte gehéiert haten, wou mer de Pro a Kontra eigentlech vun där Frostellung do konnten ofweien, si mer mat grousser Majoritéit zum Schluss komm, dass Lëtzebuerg och haut, vläicht grad souguer haut och e Service de renseignement brauch. Ouni Renseignementer, ouni och en Austausch vu Renseignementer tëschen deene Stellen, déi an deenen eenzelne Länner spezialiséiert sinn an deem dote Beräich, ass et ganz, ganz schwéier, eng Rei vun Erausforderungen vun der öffentlecher Sécherheet unzegoen, wéi déi vum Kampf géint den Terrorismus, dem Kampf géint déi organiséiert Kriminalitéit oder och nei Forme vu Kriminalitéit, déi sech breetmaachen, Cyberkriminalitéit zum Beispill, wat och eng immens grouss Erausforderung ass, mat deene mer allguerten als Länner hei ze dinn hunn.

Mir brauchen e Geheimdéngscht, mä déi zweet Fro ass dann: Wat fir e Geheimdéngscht brauch Lëtzebuerg? Mir brauchen do kee Modell ze kopéieren. Ech mengen, mir müssen opgrond vun deenen Erfahrungen, déi mer hei gesammelt hunn, eis eege Regeln, eis eege Struktur definéieren fir dee Geheimdéngscht, dee grad ebe fir Lëtzebuerg, e klengt Land, noutwendeg ass. Dorënner fält d'Definitiou vun de Missiounen vun deem Service, seng Organisation, seng Kontroll, déi intern wéi och déi extern, dozou gehéiert och déi parlamentaresch Kontroll, an de legale Kader awer virun allem, an deem d'Aktivitéiten vun deem Service sech ofspillen, de legale Kader och besonnesch fir déi eenzel Investigatiounsmethoden a -mëttelen, déi him zur Verfügung stinn.

Ech hunn et virdru scho gesot: Déi Analys, déi eigentlech gemaach ginn ass an der Enquêtékommision, huet déi Schwaachstelle vum Gesetz vun 2004 ganz kloer gewisen, déi sech scho ganz fréi an den éischte Kritikke scho bemierkbar gemaach haten.

Dat gëllt ënner anerem fir d'parlamentaresch Kontroll. Dobäi wëll ech nach eng kéier hei ganz kloerstellen - an do hunn ech fundamental ëmmer eng aner Positioun gehat wéi de fréiere Statsminister -, dass déi parlamentaresch Kontroll net gläichgestallt ass mat där normaler Kontroll a Responsabilitéit, déi den direkt zoustännege Minister ze féieren huet, déi d'Exekutiv ze féieren huet. Fir eng Verwaltung, fir en Deel vun der Exekutiv, an de Service de renseignement ass nun emol en Deel vun der Exekutiv an net vun der Legislativ, ass nach ëmmer d'Regierung, un éischter Stell den direkt kompetente Minister haaptzoustänneg. D'Haaptzoustännegkeet ass do. D'parlamentaresch Kontroll ass eng complémentaire, eng subsidiaresch Kontroll, déi sech grefféiert op déi éischt politesch an administrativ Kontroll, déi der Responsabilitéit vun der Exekutiv ënnerläit.

Et kann net anescht sinn! Et ass probéiert ginn, et kann een et probéieren, mä et kënn een net duerch dermat, wann ee probéiert eigentlech, déi parlamentaresch Kontroll an déi Kontroll vun der Exekutiv géinteneen ausespillen, an domadder och probéiert, d'Responsabilitéiten natierlech vu sech selwer ze déagagéieren. Déi éischt Responsabilitéit läit bei der Exekutiv an net bei der Legislativ!

Et ass also eng zousätzlech Schutzmoossnam praktesch, déi 2004 eng éischte kéier age-

fouert ginn ass, déi et och praktesch entretemps bal an allen europäesche Länner gëtt, mat Ausnam, mengen ech, vu Frankräich, déi dat doten nach ëmmer net hunn, a wou et also wichteg ass, dass mer dorunner och feile ginn. Dat hu mer gemaach.

De Rapporteur, den Här Berger - deem ech wëll Merci soe fir säin ausféierleche Rapport, deen en hei gemaach huet -, huet drop higewisen, dass och eng Proposition de loi jo virfält, wou deen dote Volet eigentlech, wat elo d'parlamentaresch Kontrollkommission ugeet an hire Fonctionnement, hir Zumesetzung, hir Attributiounen, dass do am Fong och scho relativ fréi probéiert ginn ass, dat ëmzeschreiwen iwwer eng Proposition de loi, déi ënnerschriwwen ginn ass vun Deputéierte vun sämtleche Parteien a Sensibilitäten, déi hei am Parlament vertrat sinn, wou mer probéiert hunn, relativ schnell do virunzekommen, an déi Iddie sinn hei integréiert ginn, schlussendlech, an de Gesetzesprojet vun der Regierung.

Och do ass virun allem bemängelt ginn am Rapport vun der Enquêtékommision, dass een d'Zumesetzung misst iwwerkucken. Do misst et och eng Chance ginn, dass spezialiséiert Deputéiert do erakommen an et net onbedéngt müssen d'Fraktionspresidente sinn. Et ass virun allem eng spontan Informationspflicht ageschriwwen ginn, souwuel fir d'Direktion vum Service de renseignement wéi och fir den zoustännege Minister. Alle béid musse se, soubal se Kenntnis kréie vu relevante Fäiten, déi kéinten op en Dysfonctionnement hindeuten, d'Kontrollkommission vun hirer eegener Initiativ aus informéieren. Wa se dat net maachen, leie se also am Feeler a si setze sech disziplinaresch respektiv politesche Sanktiounen aus.

A mir waren der Meenung, dass d'Investigatiounsméiglechekeete vun der Kommission selwer sollten ausgebaut ginn doduerjer, dass se kéint Experten, also Drëttpersone chargéieren, fir an hirem Numm eng Rei vu méi techneschen Investigatiounen duerchzuféieren, déi se selwer net amstand ass ze maachen. Och déi Iddi fanne mer am Gesetzesprojet erëm, wéi déi aner Iddien och. Dat sinn, mengen ech, ganz kloer Fortschreitter par rapport zu dem éischte Versuch vun 2004, déi parlamentaresch Kontroll hei zu Lëtzebuerg anzeféieren.

Gradesou wichtig, wann net nach méi wichtig, ass de legale Kader, an deem d'Aktioun vum Service de renseignement sech aschreiwen. Nieft der Definitiou vun de Missiounen sinn dat natierlech déi eenzel Mëttelen, déi eenzel Instrumenter, déi en dierf asetzen, fir seng Aarbecht ze maachen, seng Missiounen also ze erfüllen.

Och do hate mer festgehalen sengerzäit an de Konklusiounen vun der Commission d'enquête - e Rapport, dee mer zwar, dorunner wëll ech nach eng kéier erënneren, an der Kommission ugehall hunn, mä deen ni, am Eifer des Gefechts, hei vum Plenum vun der Chamber ugehall ginn ass; mir maachen awer esou, wéi wann dat u sech en offiziell Chambersdokument wär -, do hate mer gesot: „Et muss onbedéngt Buch gefouert ginn iwwer all eenzelt Investigatiounsinstrument, wat an engem Fall agesat gëtt.“ Dat muss een also am Dossier kënnen ermënnen. Et müssen deelweis och speziell Lëschten ugefäerdeg gi vun den Ecouten, vun aneren Instrumenter, wéi der Observatioun oder esou, déi agesat ginn am Eenzelfall, fir dass ee ka kontrolléieren, ob déi doten Aktivitéiten dann och am gesetzleche Kader ofgelaf sinn.

Si müssen natierlech autoriséiert sinn. Et ass schonn erkläert ginn, dass jee no der Intensitéit an der Invasivitéit eigentlech vun der Aktioun dann deen Autorisationsniveau ëmmer e Krack eropgesat gëtt, vun dem Direkter vum SREL iwwer dann de Comité vun den dräi Ministere bis hin zu dem Riichtergremium, deenen dräi héchste Riichter praktesch aus dem Land, déi do zumesetzen an déi, och anescht wéi am Gesetz vun 2004, hei net en Avis ofginn, mä si müssen en Assentiment hei ginn. Si müssen also mat d'accord sinn. Quitte dass d'Praxis haut och bestanen huet, fir eigentlech déi Avice vun de Riichter am Regelfall ze suivéieren.

Wat d'Mëttel méi intensiv sinn, wat se also méi en Agrëff duerstellen an dat, wat eigentlech ze schützen ass, nämlech d'Privatsphär vun den eenzelne Leit, vun den Zilpersounen, wat also den Autorisationsniveau an d'Komplexitéit och natierlech vun den Autorisationen an d'Luucht geet.

Wat mer nach gefrot hu sengerzäit - dat gëtt nëmmen deels ëmgasat, dat muss een och soen -, dat ass d'Schafung vun engem interne Kontrollorgan. Mir haten deemools als Iddi zrëckbehalen esou eng Aart Inspection générale de la Police, fir en äänlechen Inspektorat, eng Inspektioun anzeféieren beim Service de renseignement.

Et kann ee soen, dass dat deelweis elo ersat gëtt duerch eng Iddi, déi mer sengerzäit net zrëckbehalen hunn an eise Konklusiounen, vun engem Délégué au Service de renseignement, also e Statsbeamten, deen dem zoustännege Minister respektiv deem Ministerkollegium direkt ënnerstallt ass an deen also och Kontrollan Investigatiounskompetenzen huet, fir direkt kënnen anzewierken am Service de renseignement.

Schliisslech hate mer och nach gefrot, dass mer et och géife gutt fannen, wann e permanent Sekretariat fir d'Kontrollkommission vum Parlament géif bestoen. Och do hu mer eis esou organiséiert, dass dat, mengen ech, gutt strukturiert ass fir de Moment. Et kann een et nach ëmmer eng kéier ausbauen. Mä ech mengen, dass mer net onbedéngt do müssen d'Gesetzer änneren.

Da war eng aner Fuerderung, dat waren déi, dass mer iwwer e Code de déontologie géife verbidde, dass een, deem am Service de renseignement geschafft huet, dass dee bannent engem gewëssenen Zäitraum dierf de Service verloossen an duerno direkt an d'Privatwirtschaft an deem dote Beräich schaffen goen. Abee, deem gëtt zu zu honnert Prozent eigentlech Rechnung gedroen, well dat ass net an engem Code de déontologie festgeschriwwen, dat gëtt an de Gesetzestext selwer elo ageschriwwen, dass während fënnf Joer esou eng Karenzzeit muss respektéiert ginn.

Aner Wënsch, déi mer haten, déi een elo ermënn och an deem Gesetzesprojet, dee mer haut debattéieren, ass den Informationsaustausch tëschen dem Service de renseignement, de Justizorganen, de Polizeiautoritéiten. Et ass de Verbuet, wat ech schonn ervirgestrach hunn, de Verbuet vun enger reng politescher Spëtzelei. Et ass déi rechtlech Klärung vun dem Emgang mat deenen ale SREL-Archiven. Do ass e Spezialgesetz, wat mer deemnächst och hei an der Chamber wäerte kënnen diskutéieren. An et ass eng Fuerderung gewiescht, fir och gesetzlech ze regelen déi ganz Fro ronderëm d'Intelligence économique. Dat ass nach vläicht e Punkt, deen aussteet a wou et, mengen ech, och net onwesentlech wär, dass mer eis eng kéier als Kommission géife mat där doter Problematik nach ausermesetzen.

De Gesetzesprojet vun der Regierung, wéi gesot, dréit grosso modo deene wesentleche Fuerderunge Rechnung, déi mer sengerzäit iwwer all Parteigrenzen eraus formuléiert haten, opgrond vun där batterer Erfahrung vun den Dysfonctionnement an deene Jore virdun. Si huet nieft dem Délégué au service de renseignement eng aner Neierung agefouert, dat ass dee Comité ministériel, deen haut aus dräi Ministereen zesummegeest ass, deen also u sech och nieft dem direkt zoustännege Minister eng Rei vun Attributiounen huet an dee jo eigentlech och schonn de facto, wann ech dat richtig matkréien, haut besteet, wou eng eng Konzertatioun besteet tëschen deenen dräi Ministereen, déi haut also net duerch Zoufall hei setzen, fir bei deenen Debatte ronderëm de Service de renseignement mat derbäi ze sinn.

Mä och do ass et net esou, dass doduerjer den eigentlech kompetente Minister senge Responsabilitéiten enthuewe wär, an et ass och net esou, dass natierlech och d'Regierung in globo doduerjer hir Attributiounen, déi se als kollektiv, kollegialt Organ duerch eis Verfassung auszeüben huet, net kéint ausüben.

Nei ass d'Iddi, dat ass ganz interessant, vun den Ordres de mission, wou also méi, also och iwwer dee Comité ministériel op Proposition vum zoustännege Statsminister eng Orientéierung järelech gi gëtt vun den Aktivitéiten vum SREL, wou d'Prioritéiten kënnen festgeluecht ginn, wou soll geschafft ginn, a wou och gewäerleescht ass, dass déi Ordres de mission do och zumindest der parlamentarescher Kontrollkommission zougestallt ginn, déi jo dann, wa se do eppes aussetzen hätt, sech kann och do Gehéier verschafen an deem dote Punkt.

E legale Kader, deen nei ass, dat ass deen och fir d'Sourcé vum Service de renseignement selwer, de Schutz also vun de Sourcen an den Informanten vum Service. Dann awer, wéi gesot, gëtt d'Observatioun geregelt. Den Nom d'emprunt, d'Identitéit d'emprunt, also verdeckten Ermittlungen, duerfir gëtt endlech och hei gesetzlech de Kader gesat. Datselwecht gëllt an enger ausgebauter Form par rapport zu haut weinst den Agrëffer, déi an d'Kommunikatioun, an d'Post eragin.

An do stellt sech déi effektiv ganz sensibel Fro vum Asaz vu sougenannten „Statstrojaner“, also wierelech e ganz intrusiven Agrëff an d'Privatsphär, wou mer eis awer iwwerzeegt gelooss hunn, dass de Prinzip eigentlech, dass ee muss kënnen Zougrëff hunn op déi doten Informatiounen a grave Fäll, wierelech ginn ass, well sech haut net méi esou alles mécht um Niveau vun den traditionelle Kommunikatiounen



iwwer Téléphone, mä ebe munches iwwert den Internet leeft, iwwert d'sozial Netzwierker leeft. An do kënnt een net derlaanscht, fir sech och esou Mëttelen ze ginn, wéi och d'Polizei soll esou Mëttel kréien, wat hir Aktivitéiten an hirem spezifesche juristesche Kader ugeet.

Et ass also eng ganz wichteg Fro. Et ass och eng Fro, déi an anere Länner och diskutéiert gëtt, net nëmmen elo an Däitschland, wou et en Uerteel gëtt vum Bundesverfassungsgericht. Net méi spéit wéi am September dëst Joer wäert an der Schwäiz e Referendum stattfannen iwwer hir Reform vum Service de renseignement. Mir sinn also net déi Eenzeg, déi probéieren, hir Norichtendéngschter ze reforméieren. An der Schwäiz huet d'lescht Joer d'Schwäizer Parlament esou eng Reform gestëmmt. An déi gëtt do och kritiséiert, a si gëtt notament kritiséiert op deem dote Punkt, wou also an der Schwäiz do eng Volleksbefragung wäert stattfannen, nodeem och déi néideg Zuel vun Ennerschrëfte gesammelt ginn ass.

Et ass also e Punkt, mengen ech, wou ee kann duerchaus, fir de Moment zumindest, d'accord si mat deem heiten Text, well en awer déi néideg Schutzprinzipie festleet. Dat sinn déi, dass, wann iwwert deen dote Wee wéi iwwer all aner Kontroll vun de Kommunikatiounen et dozou kënnt, dass do Informatiounen gesammelt ginn, déi näischt ze dinn hunn eigentlech mat där Zilpersoun, déi ee wierklech am Viséier huet, da mussen déi direkt zerstéiert ginn. Déi dierfen net gehale ginn. Alles, wat näischt mat där Enquête, mat där Missioun ze dinn huet, muss eigentlech vum Prinzip hier direkt zerstéiert ginn. Dat ass, mengen ech, dat och, wat an deem Text hei an aller Kloeherheet drasteet.

Ech weess net, wéi een dat anescht soll formuléieren! Méi kloer geet et praktesch net. Mir musse just kucken, wéi mer dat kënne kontrolléieren, dass deem och esou ass. Dat ass, mengen ech, déi Erausforderung, déi sech stellt. Mä ech mengen, deen Text u sech ass kloer, wat den Émgang mat Informatiounen ugeet, déi näischt direkt ze dinn hu mat deem, wat een eigentlech sicht. Wann een do also an dat Privat, an d'Liewe vun anere Leit andréngt, da muss dat selbstverständlech direkt verschwannen aus deem ganzen Dossier, deen de SREL dann opmécht.

Wat déi aner Fro ugeet, déi och diskutéiert gëtt an deem Zesummenhang, dat ass: Wéi fiabel sinn déi Systemer, déi een do akafe geet? Ech mengen, dat ass eng Fro, déi mer net iwwer e Gesetz kënne regelen, dat ass eng Fro natierlech, déi herno wäert an der Responsabilitéit vun der Exekutiv stoen, déi jo da muss zesumme mat der Direktioun vum Service de renseignement déi Choixen do treffen. An déi musse sech natierlech iwwert d'Ausschreibungsmechanismen déi néideg Garantie ginn, déi néideg Expertise och mat bähuelen, dass dat dote fiabel Systemer, fiabel Programmer sinn, déi se sech an deem dote Beräich géifen dann uschaffen.

Nei am Text sinn dann eng Rei vu Schutzbestëmmungen, déi eigentlech éischter elo de Service schützt respektiv d'Membere vum Service oder d'Kollaborateure vum Service schützen, déi Afloss geholl hunn an deen heiten Text eran.

D'Budgetsregelen, déi leien net ganz wäit vun deenen ewech, déi mer haut am Text vun 2004 kennen. Et gëtt zrëckgegraff op de Comptable extraordinaire. Et gëtt zrëckgegraff op d'Marchés négociés, wat Ausschreibunge vum Service de renseignement ugeet.

D'Direktioun, dat sinn am Prinzip zwou Persounen an dovunner muss een e Jurist sinn.

D'Begrenzung vun der Zuel, do soen ech ganz eierlech, ech hu mech laang staarkgemaach an der Kommissioun, fir eng Begrenzung bäizebehalen, hu mech awer ganz zum Schluss e bësen iwwerzeegelooss, obwuel ech nach ëmmer kleng Doutten hunn, dass een, wéi dat och an anere Verwaltungen ass, net onbedéngt méi muss hei eng Begrenzung aschreiwene. Dat ass deelweis awer kompenséiert ginn doduer, dass all déi Ufroen, déi gestallt gi vun zousätzlech Personal, eigentlech der Commission de contrôle musse matgedeelt ginn, soudass déi awer zumindest en Iwwerbléck behält, wat ugefrot ass, wat zougestane gëtt a wat d'Evolutioun vun den Effektiver vum Service de renseignement ugeet.

Bei esou Zorte vu Verwaltungen hunn ech léiwer den Deckel drop, soen ech ganz kloer. An dann ass et eben un der zoustänneger Kontrollkommissioun vum Parlament, hir Aarbecht an deem dote Sënn ze maachen.

Da kënnt... net den Haaptpunkt vum Projet, mä deen am meeschte bis elo an der Effentlechkeet bal diskutéiert ginn ass - et ass bal eng Schan! -, dat sinn d'Primmen. Et ass vläicht en Zustand vu Lëtzebuerg, deen domadder e bësse charakteriséiert gëtt. Déi meescht Com-

muniqéé si bis elo komm iwwert d'Fro vun de Primmen. Ech mengen, mir hu sécherlech déi öffentlechkeetsfreedegst Personaldelegatioun vun engem Geheimdénkscht a ganz Europa, well déi Delegatioun et fäerdegruecht huet an de leschte puer Deeg, eng ganz Rëtsch vu Communiquéen erauszeginn.

(Interruption)

Dat ass jo e bësse besonnesch awer fir eng Verwaltung, déi normalerweis net gewinnt ass, esou wëllen an d'Rampenlicht vun der Effentlechkeet ze kommen.

Da wëll ech och soen, dass et hei net d'Absicht vun der Chamber ass, an och d'Absicht net vun der Regierung war, fir hei eppes op d'Kopp ze werfen, wat bestanen huet. Ech mengen, den Här Wiseler huet dat och schonn ënner anerem ervirgehuewen.

Et war awer eis Suerg, dass mer net iwwer e Sträit iwwer Primmen eis legislativ Aarbecht an d'Reform vun deem Service de renseignement, op déi mer laang waarden, nach weider ëm Wochen, ëm Méint no hannen drécken. Mä mir sollen als Parlament do eis Aarbecht maachen.

(Mme Simone Beissel prend la présidence.)

Mir hu versicht, e Modus Vivendi mam Statsrot ze fannen, e Statsrot, dee jo hei och awer méi héich Rechtsprinzipie beméit huet, fir ze soen: „Sou wéi Dir et elo virgeschloen hat, dat heescht, den ale System vu Primmen, deen ass net konform zu iwwergeuerdnete Rechtsprinzipien. Sou kënnt Der dat net maachen!“ Dunn hu mer also probéiert, am Intérêt vun der Saach, am Intérêt och vun deenen direkt concernéierte Beamten, fir hei eng uerdentlech Léisung ze fannen.

Dat mag eventuell nëmmen eng Iwwergangsléisung sinn. Näischt verhënnert, wann en allgemengen Accord do ass iwwert d'Primme beim Stat, dass een dann och nach op déi heiten Texter zrëckgeet. Dat hei ass op jidde Fall dat, wat elo méiglech war dranzeschreiwene, ouni fundamental awer eppes wëllen op d'Kopp ze werfen an ouni doduerer och e Präzedenzfall wëllen ze schafe fir Primmen, déi soss op anere Plaze bestinn.

Ech wëll awer just eng Bemierkung maachen, well vun de Verteideger vum aktuelle Primmesystem ëmmer besonnesch de Gläichheetsprinzip, a bal nëmmen deen, an de Vierdergrond gestallt ginn ass: Also, wann et eppes beim Stat insgesamt gëtt, dann ass et d'Ongläichheet, d'Ongläichheet tëschent eenzelne Primmesystemer an eenzelne Verwaltungen! An duerfir mengen ech, dass et net gutt wär, grad deen dote Prinzip ze beméien, fir hei ze soen: „Dir dierft eigentlech elo den Text net änneren. Dir musst ofwaarden, bis sämtlech Konziliationsprozeduren eriwuer sinn.“ Ech mengen, dass mer hei richtig handeln, dass dat keng béis Absicht ass an dass mer dee Provisorium zumindest awer esou kënne an deen heiten Text aschreiwene.

Ech kommen zum Schluss vu mengen Ausföierungen zu deem heite Projet. Ech mengen, et kann een als LSAP feststellen, dass Lëtzebuerg mat deem heiten Text sech e modernt Gesetz gëtt, wat de Service de renseignement ubelaangt. Et huet een aus den Erfahrungen, deelweis schmärerlechen Erfahrungen, vun deene leschte Jore geléiert. Ech widderhuelen et nach eng Keier: Villes hätt scho kënne 2004 geschéien!

Ass dat Gesetz perfekt? Sécherlech net! Perfekt Gesetzer sinn, mengen ech, rar op der Welt, net nëmmen hei zu Lëtzebuerg. An ech sinn och sécher, dass mer opgrond vun der praktescher Uwendung elo vun deenen heiten Texter an e puer Joer op deen een oder aneren Aspekt vun där Reform hei wäerte missen zrëckkommen.

Schléisst dat heite Gesetz Dysfonctionnementer endgültig aus? Och do, mengen ech, misst ee kënne mat Neen äntwerten, mä et mécht se sécherlech méi schwéier, et mécht d'Probabilitéit méi kleng, dass et zu Dysfonctionnementer kënnt. Mä kee kann dat zu honnert Prozent ausschléissen, och wa mer dat vläicht ustriewen.

Mir sinn awer der Meinung als LSAP-Fraktioun, dass deen, et kann ee soen, dee „Skandal“ ronderëm de Service de renseignement - et ass jo effektiv en onerhéierte Virgang, dass en Direkter vun engem Service de renseignement säin zoustänneger Minister iwwer eng truquéiert Auer ofhéiert; dat ass schonn eppes, wat an d'international Press gehéiert, dat muss ech soen -, dass dat awer e Schock ausgeléist huet, sécherlech. Et huet e Schock ausgeléist am Service de renseignement selwer, et huet e Schock ausgeléist an der politescher Klass, géif ech mengen, a sécherlech och an der Effentlechkeet.

Et ass ze hoffen an et gesäit duerno aus, dass et kéint en heilsame Schock sinn, deen dat Ganzt

ausgeléist huet, an duerfir menge mer, dass een deem Service, där Direktioun vum Service soll Vertraue ginn. D'Politik sollt deem Service Vertraue ginn, fir déi Missiounen, déi d'Gesetz him elo mat méi Däitlechkeet, méi Präzisioun gëtt, mat deenen Instrumenter, déi elo besser geregelt sinn duerch deen neien Text, déi vill a wichteg Missiounen kënne voll a ganz ze erfëllen.

Mir hu versicht op jidde Fall, en Équilibre hierstellen tëschent op där enger Säit Autorisationsprozeduren, Kontrollmechanismen, op där anerer Säit awer och deem néidege Bewegungsspillraum, deen awer esou eng Verwaltung mat hire Missiounen och brauch. Dat ass net ëmmer einfach. Ob et e perfekten Équilibre ass, dat wäerte mer an deenen nächste Jore feststellen. Et war op jidde Fall eis Suerg, fir deen Équilibre do hierzustellen.

Mir deelen net onbedéngt déi Euphorie, déi den CSV-Spreecher hei ronderëm de Service de renseignement développéiert huet. Ech wëll och soen, dass et wahrscheinlech, wa sech meng Fraktiounskolleegen un dat halen, wat d'Positioun vun der Partei ass, déi éischte Keier ass, dass mir als Sozialisten en Text iwwert de Service de renseignement stëmmen.

(Interruption)

1960 ass d'Fraktioun opgespléckt gewiescht. D'Gewerkschaftler an der Fraktioun - fir ze schematiséieren -, déi méi antikommunistesch ausgerichtet waren, hunn den Text gestëmmt, an de gréissten Deel vun den Affekoten an aner Vertrieber vu liberale Beruffer hunn deen Text net gestëmmt gehat. 2004 hu mer eis enthalte beim Text iwwert de Service de renseignement. Dës Keier wäerte mer den Text stëmmen, wat sécherlech mat Abstand de beschte vun deenen dräi Texter ass. Do si mer eis, mengen ech, souguer iwwer all Parteigrenzen eens.

(Interruptions diverses et hilarité)

A mir hunn, mengen ech, probéiert hei, esou wäit wéi méiglech déi Friktiounen, déi noutwenderweis mussen dann a wann entstoen tëschent dem Geheime, dat nun eemol zu engem Geheimdénkscht gehéiert, an der Transparenz, wat de Grondprinzip ass vun der Demokratie - do si Widderspréch, dat dierf een net verkennen, dierfe mer och hei net verniedlechen -, mir mengen awer, dass mer probéiert hunn, esou wäit wéi méiglech, esou wäit wéi dat iwwerhaapt méiglech ass, eng Conciliatioun vun deenen zwee Elementer ze maachen: Rechtsstat a Verteidigung vum Rechtsstat, Recht op d'Sécherheet an och awer Verteidigung vun den individuelle Rechter a Fräiheeten.

Dëst Gesetz, an ech kommen domadder definitiv zum Schluss, ass gutt genuch, dass mer et als LSAP-Fraktioun wäerte stëmmen.

► Plusieurs voix.- Très bien!

► **Mme Simone Beissel**, *Présidente de séance*.- Merci dem Här Bodry. Als nächst ageschriwwen Riednerin hunn ech d'Madamm Viviane Loschetter. Madamm Loschetter, Dir hutt d'Wuert.

► **Mme Viviane Loschetter** (*déi gréng*).- Merci. Madamm Presidentin, Dir Dammen, Dir Hären, et ass elo scho ganz vill gesot ginn hei op dëser Tribün iwwert dat, wat ons beweegt an och beweegt huet, eng grondleeënd Reform vum SRE auszeschaffen. Dofir wäert déi gréng Fraktioun och prinzipiell net op Vergaangenheitsbewältigung agoen, mä éischter déi zwou wichteg Notiounen aus der Ursaach vun der Reform ervirhiewen. Dat éischt ass d'Notioun vu Verantwortung an dat Zweet ass d'Notioun vu Kontroll.

A mir géife gären als Gréng zwou zousätzlech Notiounen derbäisetzen, déi fir ons elementar wichteg woren an der Diskussioun während de parlamentareschen Aarbechten an der Kommissioun: Dat ass d'Notioun vun de kloren oder esou kloer wéi méigleche Missiounen vun engem SRE. An dat ass fir ons awer och d'Garantien, d'Notioun vun der Garantie vun der Proportionalitéit vun de Missiounen par rapport zum Schutz vun der Privatsphär vun deem eenzelne Bierger hei am Rechtsstat.

Well e Geheimdénkscht befënnt sech, esou gesi mir et op alle Fall, an de Paragë vum potenzielle Risiko vun enger Infraktioun, an där sensibeler Grozon tëschent Verdacht an Dot, jo, haut souguer - an enger séierer a globaliséierter Welt - oft virum Verdacht, bei der Observatioun vun der Informatioun, déi gegebenfalls e Renseignement gëtt. An déi dräi Termen „Observatioun“, „Informatioun“ a „Renseignement“ sinn iwwregens laang an hirer Semantik an der Diskussioun an der Kommissioun diskutéiert ginn.

Haut méi wéi virdu gëtt vun engem Geheimdénkscht erwaart, datt en anticipéiert, D dat heescht, datt en enger Missioun vu Preventioun schafft. An den Term „Preventioun“

ass positiv konnotéiert a Beräicher wéi zum Beispill der Santé oder der Educatioun. An der Aktivitéit am Beräich vun der Justiz, virop am Beräich vun der Justice pénale huet den Term „prévention“ allerdéngs e ganz aneren Noge-schmaach. Preventive Verdacht, preventiv an antizipativ Aktivitéit vun engem Geheimdénkscht legaliséieren an autoriséieren, dat ass, zumindest fir ons, dach awer eng ganz aner Geschicht.

Bei dëser Reform geet et erëm eng Keier drëms, grad wéi bei där leschter SRE-Reform: Wat ass erlaabt? Wat ass net erlaabt? A wat ass zu bestëmmte Konditiounen erlaabt? A genau dat do ass dat Thema, wat mir nennen: Garantie vun der Proportionalitéit vun den Aktivitéit vun engem Geheimdénkscht respektéieren.

Wéi vill un intrusive Methoden an Aktivitéiten dierfen zu wéi engem Grad vu Gefor genee-megt ginn? Wéi vill muss d'Qualitéit vun den Aktivitéit kloer beschriwwen an opgezielt ginn? Wéi a wéi vill kënne mir assuréieren, datt intrusiv Moossnamen, egal wéi contraignant d'Oplage sinn, zu den Ausnamen an net zu dem Standard gehéieren?

Déi Haapterausforderung ass a bleift fir ons d'Kontroll, d'Kontroll a priori an d'Kontroll a posteriori, an domadder déi gréisstméiglech Versécherung schafen, fir all Abus ze verhënnere oder zumindest kënne opzedeecken an dann och ze sanktionéieren.

déi gréng gehéieren net zu deenen, déi denken, mir bräichte kee Geheimdénkscht. Mir plädéieren eendeiteg fir e Geheimdénkscht par définition a wëlle kee Geheimdénkscht par défaut!

An dat aus e puer Grënn: Fir d'éischt emol, well sech ëmmer wäert e Wee fannen, fir genee déi Observatiounen ze maachen, déi ech virdrun erimmt hunn, well et e Besoin dofir gëtt a well et och eng Demande dofir gëtt. A well et den Ufank vun enger Wourecht, enger Gefor, enger Infraktioun ka sinn oder respektiv ass, a well et schlussendlech, wéi et am Projet de loi steet, zur nationaler Sécherheet an zur Garantie vun der Souveränitéit onëmgängelech bäidréit.

Wéi de Rapporteur et a sengem schrëftleche Rapport schreift, proposéiere mir an dëser Reform eng verstärkt Kontrollopdeeling an eng prezis Verantwortungopdeeling, eng méi prezis Beschreibung vun de Missiounen a vun de Moyenen a Moossnamen an eng méi strikt Regelung vum Zougang zu a vum Austausch vun Informatiounen. Ech kommen nach all Kéiers op déi Punkten zrëck.

E puer Wuert awer fir d'éischt zu de Missiounen vum SRE. Mir haten effektiv eng länger Diskussioun iwwert d'Domäne vun dem Geheimdénkscht a wou dee soll aktiv sinn. A fir ons huet sech och d'Fro gestallt: Wat heescht „eng Menace fir onst Land“? A wat heescht eng Menace fir «des États étrangers ou des organisations internationales ou supranationales», mat deene mir dann «objectifs communs» hunn?

An effektiv, wéi de Rapporteur et och scho genannt huet, den zweete Paragraf vun drëften Artikel, dat heescht den Artikel 3 aus deem Projet de loi, definéiert an onsen Ae bescht-méiglech a weist eng Oplëschtung vun deem, wat domadder gemengt ass.

Nawell kann ee sech déi Fro stellen: Geet dat duer? Ass dat prezis genuch? Oder vläicht ass et erëm ze vill prezis? An d'CNPD weist och drop hin, notament datt dat Wuert „ingérence“ net gutt erkläert ass an datt et e gewësene Flou artistique, eng gewëssen Oppenheet zouléist, déi eigentlech misst besser beschriwwen ginn.

Kann een unhand vun dëser Oplëschtung am zweete Paragraf e Mëssbrauch ausschléissen? Neen, denke mir, mat Sécherheet kann ee wahrscheinlech net all Mëssbrauch ausschléissen, mä et kann ee versichen, esou gutt wéi méiglech e Mëssbrauch net opkommen ze loossen, andeem een esou prezis wéi méiglech definéiert.

Mir haten och eng Diskussioun, inwiefern d'Definitioun vum Terrorist oder Extremist kéint ausgeweit ginn a wéi grouss de Risiko kéint bestoen, als kriteschen oder kämpferesche Bierger als Terrorist oder Extremist agestuift ze ginn. D'Vergaangenheet an de Verfolgungswahn ronderëm de Kale Krich an dono ronderëm de lénksextremisteschen Terrorismus hu schlussendlech - net zu Onrecht, musse mir betounen - bis haut Wonnen an Zweifelen hannerlooss. Notament eng Rei vun onse Memberen hu sech an der Kartei vun den Archive vum Geheimdénkscht erëmfondt! An dofir ass et och wichteg, datt Gewerkschaften, politesch Parteien, ONGen an Associatiounen explizit



am Rapport ernimmt ginn an ausgeschloss gi vun de Missioun vum SRE. Am Projet de loi heescht et dozou: «à l'exclusion de toute surveillance politique interne».

Et ass kloer, datt mir ons hei hautno un der rouser Linn vum Dateschutz a vun den elementarsten demokratesche Rechter vun engem Rechtsstat, jo, souguer Mënscherechter bewegen. An dëse Projet de loi huet de Mérite, obwuel e vläicht e bësse méi schwéierfällg fir de Lecteur a sécher méi schwéierfällg fir de Service de renseignement selwer ass, mä en huet de Mérite, datt e kloer definéiert, wat weini erlaabt ass, a virun allem ënner wéi enge Konditiounen et engem Agent erlaabt ass, enger bestëmmter Aktivitéit nozegoen, an, an dat ass wichteg, datt dëse Wee och retraçabel ass.

An dofir ass et fir ons eng éischt wichteg Kloerheet, nach eng Kéier ze ënnersträichen, datt den SRE net an Eegeregie schafft. D'Regierung, vertrauensduerch den zoustännegen Minister, definéiert déi wichteg Orientatiounen vum Geheimdénkscht mindestens - mindestens! - eemol d'Joer, an dat eben duerch déi Lettre de mission, déi zousätzlech nodréiglech an dee Projet de loi eragefloss ass.

An als Member vun der parlamentarescher Kontrollkommissioun kann ech dat nëmme begrëssen, an ech denken, meng Kolleegen an der Kommissioun, grad wéi déi, déi déi Missioun virdrun en charge haten, bestëmmt och. Well effektiv ass all Verbesserung vu Retraçabilitéit vun Aktivitéite fir eng Kontroll, déi a posteriori geschitt, extrem begrëssenswäert.

Zweet wichteg Kloerheet: Et gëtt eng Tësche-kontroll tëschent Exekutiv an SRE-Direktioun agebaut an der Persoun vun deem Délégué, deen e Kontroll-Feedback vum Terrain assuriert. Bei enger anerer Administratioun géif esou eng Fonctioun bestëmmt fir vill Onrou suergen. Wat kéint als Vertrauensskeptis verstane ginn, gëtt hei éischter als zousätzlech Garantie fir d'SRE-Direktioun verstanen. An ech erënneren an dësem Kontext drun, datt mer jo ausgaange waren an onsen Diskussiounen dovun, datt fir den Direkter penal Strofe virgesi woren, mä déi huet de Statsrot, wéi jo gewosst, verworfen.

Et erlaabt der Exekutiv, iwwert dat, wat um Terrain geschitt, informéiert ze sinn an ergo och hir Verantwortung dofir ze droen.

Drëtt wichteg Kloerheet deemno: Kee ka sech, oder kee ka sech méi senger politescher Verantwortung entzéien.

Last but not least gëtt dësen Tëschekontrollmechanismus och dem Bierger an der Biergerin eng beschtméiglech Garantie, datt d'Missiounen an d'Aktivitéite kontrolléiert an agehale ginn. Op d'mannst sinn d'Regele vum Spill kloer. Sollt et zu engem Dysfonctionnement kommen, wëssen och de Bierger an d'Biergerin, wie politesch zur Rechenschaft gezu muss ginn.

Véiert wichteg Kloerheet: Nieft dem Comité ministériel mussen gläich dräi Persounen aus der Magistratur, an net där mannster, datt ass scho gesot ginn: de President vun der Cour supérieure, de President vum Verwaltungsgericht an de President vum Tribunal d'arrondissement vu Lëtzebuerg, all intrusiv Aktivitéit am Virfeld geneemegen. An dat ass op alle Fall fir ons Gréng den absolutt noutwendegen Wee, fir iwwerhaupt - fir iwwerhaupt! - kënnen Aktivitéite vum SRE an domadder och dës Reform guttzeheeschen!

Mir mierken nämlech an anere Länner, natamment a Länner ronderëm ons, wéi delikat et ka sinn, wann de Ministère public/de Parquet net oder net genuch an der Autorisatioun matagebonnen ass a sech viles, wann net alles, um Niveau vun dem Polizeiniveau erleedegt.

Wat fir ons Gréng awer gradesou wichteg ass, ass, datt d'Justiz och de Garant ass fir d'Informatiounen, déi vun auslännesche Partner vum SRE kommen. Och dës Informatiounen oder d'Demande vun Informatiounen kënnen net ouni de Parquet weiderverschafft ginn.

Innerhalb vun der Administratioun vum Geheimdénkscht gëtt den hierarchesche Wee och besser a méi kloer definéiert. Keng Aktivitéit, do wëll ech hei nach eng Kéier drun erënneren, keng Aktivitéit, esou harmlos se och mag schéngen, geet laanscht den Direkter - oder d'Direktesch -, deen alles, alles muss si gnieren.

Fënneft Kloerheet: D'Commission de contrôle parlementaire huet d'gesetzlech Garantie vun enger Obligation d'information iwwer all Zweifel um korrekten Oflaf, sief et um Fong oder un

der Form, an dat souwuel vum zoustännegen Minister wéi och vum Direkter. Iwwerhaupt bréngt, an dat ass och schonn hei gesot gi vu meng Kolleegen - iwwregens sinn all meng Virriedner och Member vun der Kontrollkommissioun, dofir mengen ech, wësse se och, vu wat se schwätzen -, dëse Projet de loi bréngt der parlamentarescher Kontrollkommissioun eng Rei vu Verbesserungen, déi hir et erméiglechen, déi Kontrollaarbecht besser an och méi genee kënnen ze maachen.

Wéi schonns virdru gesot: Méi prezis a kloer Regeln an eng besser Retraçabilitéit sinn zwou wichteg Notiounen fir d'Kontrollkommissioun. Am Projet de loi gëtt och definéiert, weini anner wéi enge Konditiounen d'Agente vum Geheimdénkscht eng falsch Identitéit kënnen unhuelen. Et gëtt och kloer definéiert, ënner wéi enge Konditiounen den SRE méi intrusiv Methode kann applizéieren, wéi zum Beispill effektiv Écouteur oder Kommunikatiounen verfollegen.

Dës Methode sinn ëmmer an der Zäit delimitéiert a brauchen ëmmer fir eng Verlängerung eng nei Geneemegung, soit vum Comité ministériel wéi och vun der Commission spéciale vum Parquet. Och hei ass et fir déi parlamentaresch Kontrollkommissioun enorm wichteg, datt mer déi zäitlech Begrenzung hunn, well et erméiglecht ons och do erëm eng Kéier, d'Kontroll besser ze maachen an och der Retraçabilitéit besser nozegoen.

Mä déi zäitlech Begrenzung ass erëm eng Kéier och fir de Bierger an d'Biergerin net onwichtig. Am Fall wou eng Pist nëierens hiféiert, müssen all déi Daten, déi zäitlech begrenzt sinn, all déi Daten direkt all zerstéiert ginn. Eng Pist, wou d'Aarbecht ofgeschloss ass, gëtt no fënnf Joer total zerstéiert. Alles dat si kloer a retraçabel Obligationen, déi kënnen kontrolléiert a gegebenenfalls och penaliséiert ginn.

Wat allerdéngs manner kloer bleift, an och dat muss een éierlechkeetshalber soen, dat ass, datt de Geheimdénkscht a sengen Aktivitéiten, a senger méi intrusiven Aktivitéiten, wéi zum Beispill den Écouteur, de Kommunikatiounen vun enger Persoun nogoen, och op Persounen wäert stoussen, déi näischt mat der Missioun ze dinn hunn, oder och de Fall zum Beispill vun engem Verdacht, dee sech herno als net fundéiert erausstellt, deen zum Beispill während enger definéierter an erlaabter Zäit suivéiert ginn ass, ouni datt déi Persoun oder déi Persounen dat wëssen. Dat ass an dat bleift a posteriori en onberechtigten Agrëff eigentlech an d'Privatsphäre vun eenzelne Leit, déi ni eppes dovunner gewuer ginn. An dat bleift och fir ons e batteren Nogeschmaach vun dësem Projet de loi, e batteren Nogeschmaach, dee wuel och par définition zu de Missiounen vun engem Geheimdénkscht gehéiert, ouni déi wahrenscheinlech e Geheimdénkscht net kéint existéieren an net kéint schaffen. Mir sinn ons däärs bewosst.

Sechst Kloerheet: Mir fannen am Projet de loi eng exhaustiv Lëscht, déi kloe stellt, wou den SRE en direkten Accès huet op Daten a wou den SRE eng Autorisatioun vum Procureur général brauch. All Accèsen op Date si retraçabel: wien, genau weini? A genau firwat huet en identifizéierten Agent op eng Donnée zréckgegraff, an dat nom Artikel 17 vum Dateschutzgesetz, deen d'Konditiounen an d'Sanktiounen dovunner definéiert?

Siwent Kloerheet: Wat an engem Ausnahmefall vu Cas d'urgence méiglech ass an ënner wéi enge spezielle Konditiounen, gëtt och an dësem Projet de loi definéiert. Do ginn et just dräi Notiounen, dat sinn: Proliferatioun, Espionnage an Terrorisme, wou gegebenenfalls den zoustännegen Minister eleng kann eng Décisioun huelen an engem Cas d'urgence, awer im Nachhinein säi Comité muss informéieren an d'Autorisatiounen, och vun der Kommissioun vum Parquet, sech muss nodréiglech siche goen.

Den SRE, an dat ass och schonn hei ugeschneide ginn, gehéiert sécherlech net zu de groussen an incontournabele Geheimdénkschter aus dëse bewegten Zäiten. An dach ass et sécherlech fir d'Sécherheet vun dësem Land an doriwwer eraus fir d'Sécherheit Liewe vun de Bierger a Biergerinne wichteg, datt d'Partnerservicen och zu Lëtzebuerg en Usprechpartner hunn.

Déi wichtegst oder eng vun deene wichtigste Missiounen vum SRE ass wuel, datt en hei zu Lëtzebuerg ass an datt en en Usprechpartner ass fir déi aner Geheimdénkschter. An dat ënnersträicht dann och d'Wichtigkeet an d'Effizienz vum Zesummeschaffen tëscht de Partnerdénkschter, mam Ausland, mä och hei intern zu Lëtzebuerg tëscht de Verwaltungen.

Mir Gréng gehéieren zu deenen, déi natamment a Saache Bekämpfung vum Terrorismus der Iwwerzeegung sinn, datt eng besser Koordinatioun tëscht alle concernéierte Services den effikassste Wee ass, fir weiderzekom-

men. Ob Geheimdénkscht, ob Police oder Parquet, ob hei am Land oder am Ausland: eng Förderung vun der Kooperatioun ass onser Meinung no méi effikass ewéi d'Verschäerfung vun de Gesetzger an Aschnëtter a privat Fräiheeten, wou den État d'urgence riskéiert, zur Regel ze ginn. An et brauch ee just an onst Nopeschland eriwuer kucken ze goen, fir ze wëssen, wat ech domadder mengen.

Här President, Dir Dammen an Dir Hären, am Résumé sti mir Gréng zu dëser Reform vum SRE a wëllen der Direktioun an hire Mataarbechter och elo emol einfach a priori onst Vertrauen aussprechen. Mir brauchen en neien Ufank a mir wëllen zur Dagesuerdnung erëm eriwuerkommen. Mir brauchen e positiv Bléck op dës Administratioun, déi, obwuel se eng staatlech Administratioun ass, dach awer keng Administratioun ewéi eng aner ass. A mir wëssen och, datt an dëser Administratioun vill an oft och ronderëm d'Auer geschafft gëtt. A mir wëssen och, datt an där Administratioun d'Gefill vu Verantwortung grouss ass an och gewuess ass an datt si sech bewosst sinn, wéi sensibel dat Spillfeld ass, an deem si sech bewegen. An dofir wënsche mer hinnen eng gutt Hand. Mä mir wënschen ons allegueren och e waakregt An!

Ech soen lech Merci.

► **Plusieurs voix.** - Très bien!

► **Mme Simone Beissel, Présidente de séance.** - Merci der Madamm Loschetter. Als nächste Riedner ass ageschriwwen den Här Fernand Kartheiser. Här Kartheiser, Dir hutt d'Wuert.

► **M. Fernand Kartheiser (ADR).** - Madamm President, Dir Dammen an Dir Hären, och vun eiser Säit aus fir d'Éischt e Merci un de Rapporteur fir en héich interessante Rapport. Mir begrëssen och prinzipiell, datt de Geheimdénkscht mat dësem Gesetz reforméiert gëtt. Et ass, mengen ech, ganz wichteg, datt esou en Dénkscht politesch a juristisch kloer encadréiert ass. An d'Politik weist hei Handlungsfäegkeet. Mir kënnen jo net als Politik akzeptéieren, datt et evident eng ganz Rei vun Dysfonctionnementen gouf, eng Rei méi schwéier, eng Rei manner schwéier, an dann net aktiv probéieren, dat ze korrigéieren an och fir d'Zukunft auszuschléissen.

Also déi Iddi, fir en neit Gesetz iwwert de Geheimdénkscht ze maachen, ass richtig. A mir sinn och frou, datt mer haut d'Geleeënheet hunn, dee Projet ze diskutéieren.

Ob dee Projet elo gelongen ass, dat ass eng aner Saach. Ech mengen, mir hunn haut elo vun alle Riedner, déi bis elo geschwat hunn, vill Positives héieren iwwert dëst Gesetz. Mä ech mengen, et muss een och heiansdo e kritesche Bléck op Saache werfen a sech da froen, ob dat Gesetz wierklech de Besoinen entsprécht, ob d'Missiounen déi sinn, déi mer brauchen, ob d'Moyenen déi sinn, déi mer brauchen, ob d'Kontroll effikass ass. Well eist Zil - weinstens eist Zil als ADR - ass jo, datt mer en operationellen, effikassen Geheimdénkscht hei brauchen. An dat hu jo och eng Rei Virriedner elo betount.

Politesch ass fir mech déi éischt Konklusioun, mengen ech, déi mer aus der Debat mussen zéien, déi mer bis elo haten, datt och eben déi lénk Parteien, déi bis elo kritesch géint iwwer der Existenz vun engem Geheimdénkscht iwwerhaupt waren, déi opgetratt sinn ëmmer erëm, fir de Geheimdénkscht an Zweifel ze stellen, haut, wou se an der politescher Verantwortung stinn, awer dat Gesetz stëmmen an de Geheimdénkscht hei verdeedegen. Ech fannen, dat ass eng ganz wichteg Entwécklung an der Lëtzeburger Politik.

D'Madamm Loschetter hat fir déi Gréng gesot, déi Gréng géifen net zu deene gehéieren, déi d'Existenzberechtigung vum Geheimdénkscht géifen a Fro stellen. Dat huet virun e puer Joer nach ganz anescht geklongen. Ech hat mer d'Méi gemaach, e puer Communiquéen vun deene Gréngen nozeliesen aus dem Joer 2012, wou ëmmer erëm gefrot gouf, et misst emol gekuckt ginn, ob iwwerhaupt Lëtzebuerg e Geheimdénkscht bräicht. Et ass gutt, datt haut déi Fro anscheinend parteiintern gekläert ginn ass.

Mir haten hei vu Bündnis 90/Die Grünen en Expert héieren an der Kontrollkommissioun, dee gesot huet: „V-Leute des Verfassungsschutzes sind Kriminelle im Dienst des Staates.“ Haut hu mer awer e Gesetz hei, wat Tarnidentitéiten erlaabt a wat eben och dann den Asaz vu Leit, déi mat Tarnidentitéiten operéieren, jo dann och ofseent; dat eent ergëtt ouni dat anert kee Sënn.

Politesch ass och interessant, fir ze kucken, wéi déi Kommissioun am Ufank, wou se iwwert dëst Gesetz geschafft huet, rasonéiert huet: Do wor net nëmme d'Daseinsberechtigung vum Geheimdénkscht nach e Sujet - wéi gesot, mir wore virun der Rekrutesenz vum Terrorismus, vum blannen Terrorismus, dee mer an de

leschte Jore gesinn hunn -, mä och d'Notioun vun der Souveränitéit vum Land wor deemools net esou kloer. Et ass vill argumentéiert gi mam Lissabon-Vertrag, wat dann nach eis Souveränitéit résiduelle wär, ob mer déi misste verdeedege mat engem Geheimdénkscht. Och haut, zwee Joer méi spéit, gesi mer do vill méi kloer, well deen europäesche Projet haut an Nout ass an déi national Souveränitéit a ganz Europa erëm méi staark betount gëtt.

Mir gesinn also hei, datt an Zäit vun zwee, dräi Joer eng Rei vu politesch grondleeende Prozesser stattfonnt hunn an datt dee Gesetzesprojet hei a méi wéi enger Hisiicht weist, wéi séier d'politesch Ramebedéngunge sech kënnen änneren a wéi wichteg et dowéinst ass, eng virsichteg a wäitsichteg Politik ze maachen.

Zum Projet: Déi meescht vun eis, dat wor och interessant nozelauschten, wa se iwwert de Geheimdénkscht schwätzen, soen dat, wat all Mënsch am Land seet a si nennen de Geheimdénkscht „SREL“. Dat ass esou, dat huet sech esou agebiert. De Projet de loi nennt en „SRE“, dat ass schwéier auszuschwätzen. Et wär vläicht gutt gewiescht, et dann och direkt SREL ze nennen. Mä et ass en Detail. Ech sinn awer iwwerzeegt, datt d'Leit weiderhi SREL soen, wa se iwwert de Geheimdénkscht schwätzen.

Da kënnt awer bei de Missiounen, an dat ass en éischten interessante politesche Punkt, deen ee muss maachen, déi Iddi vun der «exclusion de tout contrôle politique, de toute surveillance politique interne». Dat ass e bëssen e spéide Revanchismus vun der Lénker. Et gëtt gesot am Rapport: «à aucun moment un danger pour la sécurité...», d'Leit hätten ni eng Gefor duergestallt fir d'Sécherheet vum Stat. Dat kann een haut soen. Ech weess net, ob et richtig ass. Ech zweifelen drun.

Mir haten am Kale Krich, well ëm déi Zäit geet et, d'Diskussioun ëm d'Fënnelt Kolonn, a mir woren an enger anerer Realitéit.

Den Owend um sechs Auer ass iwwregens am Musée hei vun der nationaler Geschicht e Virtrag iwwert d'Spionage während dem Kale Krich. En ass bestëmmt interessant.

(M. Mars Di Bartolomeo reprend la présidence.)

An et woren awer ganz aner Zäiten. Déi Aktivitéiten vun der Ligue communiste révolutionnaire, deemools, woren inspiréiert vun enger Ideologie vun der Revolutioun an all Land. Dat ass eng potenziell Gefor fir en demokratesche Rechtsstat. Et ass normal, datt e Stat dat kontrolléiert, wa Mouvementer an engem Land vun enger Revolutioun an engem Land schwätzen a se wëllen aktiv bedreiwen, quitte datt herno, wéi d'Ligue communiste révolutionnaire sech opgeléist huet, eng Rei vun hinne bei déi Lénk gaange sinn, bei d'Komunisten, bei déi Gréng. Mä awer déi Realitéit vun deemools soll een dach net verkennen a probéieren, im Nachhinein ze korrigéieren.

Och haut muss ee sech froen, wann ee seet: „Mir maache keng Surveillance politique interne“, ob mer net eng Sécherheitslück schafen domadder! Well mir hunn dach ëmmer erëm vläicht de Besoin fir Mouvementer, déi sech kreéieren, déi och nach net d'Violence sinn oder „à propulsion violente“, wéi dat dann am Gesetz heescht, fir déi awer mussen ze observéieren, aus enger Rei Grënn. Well dat Éischt ass: Wat ass dann, wann eng Partei sech grënt, déi zwar seet, si wär net violent, mä déi awer tendenziell dat kéint sinn? Wien huet dat Recht ze observéieren? D'Police huet ganz kloer Konditiounen, weini se wéi kann intervenéieren.

De Service de renseignement...

(Interruption par M. Marc Baum)

Gelif?

► **M. Mars Di Bartolomeo, Président.** - Wann den Här Orateur d'accord ass, mä Dir kritt jo souwisou direkt d'Wuert dono.

► **M. Fernand Kartheiser (ADR).** - Ech hunn eng Véirelstonn, wësst Der, ech géif nawell gär elo...

► **M. Mars Di Bartolomeo, Président.** - Okay!

► **M. Fernand Kartheiser (ADR).** - Awer herno, wann ech nach Zäit hunn, ganz gär, well näischt hunn ech léier wéi eng gutt Diskussioun, och mat deene lénke Kolleegen. Mä ech maache meng Ried, wann Der erlaabt, well mat enger Véirelstonn huet een net ganz vill. Mä gutt!

Dat ass also och haut d'Situatioun: Wann dann elo eng Partei oder e Mouvement sech grënt, wou ee weess, datt se eventuell kéinte gewalttätig ginn, awer déi et a kenger Form soen a wou näischt drop hiweist, datt et imminent ass, wien huet dann d'Recht, eng Observatioun ze maachen? Et ass jo awer eis Pflicht als Stat, fir d'Sécherheet vum Bierger ze garantéieren, fir do keng Sécherheitslacune ze hunn!



Ech wëll verweisen op eng Diskussioun an Däitschland iwwert de Verfassungsschutz an deem doten Zesummenhang. De Verfassungsschutz, deen observéiert jo am Land eng Rei vu Mouvementer, och salafistesche Mouvementer, mä och de Verfassungsschutz seet kloer: „Et muss een och déi genau observéieren, déi zwar no bei deene sinn, déi bereet sinn, Gewalt auszeüben, mä et gëtt och an deene Mouvementer Deeler vu Mouvementer, déi net gewaltbereet sinn.“ Wann een déi also observéiert, dann huet dat de Virdeel, datt de Stat genuch weess, fir kënnen differenzéiert un d'Problemer erunzegoen, fir ze wëssen: Wien ass potenziell gewalttätig? Wien ass et potenziell net? A wat kënnen mer maachen, fir déi, déi et potenziell net sinn, vläicht esou ze encadréieren, datt se net bei déi kommen, déi et wierklech kéinte sinn?

Mir maachen eis blann als Stat, zum Deel weinstens! Ausser d'Regierung kéint eis herno erklären, wéi se déi Situatiounen wëllt ugoen. A wie sech blann mécht, deen hält eis wichteg Handlungsméiglechkeeten, doduerch eben, datt mer, wéi an dësem Gesetz, als Stat d'Surveillance politique einfach ausklammere. Dat ass wahrscheinlech onvorsichteg, fir op déi pauschal Manéier virzegoen.

Och wat déi praktesch Aarbecht vun deem Service ugeet, do kann ee sech eng ganz Rei Froe stellen. Mir hate schonn als ADR drop ugespillt, datt et wichteg fir eis ass, d'Gewaltentrennung ëmmer kloer ze respektéieren am Stat allgemeng. Näischt géint Persounen, ech argumentéieren hei net ad personam, mä prinzipiell menge mer, datt d'Magistrate missten an der Magistratur sinn an datt d'Statsverwaltungen misste geféiert gi vu Beamten aus de Carrière vun de Statsadministratiounen.

E Magistrat, wann e Magistrat Direkter vum Service de renseignement ass, ass an eisen Aen net genuch Distanz gi géintwuer deene Magistraten, wou dee Magistrat da soll Autorisatiounen afroen, fir verschidden Aktiounen kënnen ze maachen.

E Geheimdéngscht ka geféiert gi vun engem héije Beamten, vun engem Offizéier, vun engem Diplomat, wéi et jorelaang de Fall war, ouni datt et an deene Fäll zu Dysfunktionementen komm wär, op jidde Fall keng, déi mir géife kennen. An et ass eng gutt Erfahrung gewiescht. Fir elo Magistraten ze hunn an der Inspection générale vun der Police, am Geheimdéngscht, dat ass dach eng Ausbreedung vun der Magistratur op Sécherheetsorganer. An ech wëll just hei dat emol opwerfen, ob domadder d'Gewaltentrennung nach wierklech ganz garantéiert ass.

► **Une voix.** - Très bien!

► **M. Fernand Kartheiser** (ADR).- D'Bürokratie... Dat Gesetz ass och heiansdo an engem Geescht geschriwwen, wou ee sech ka froen: Wéi realistesch ass dat doten, oder wéi bürokratesch gëtt hei argumentéiert oder geschriwwen?

E puer Beispiller, wou souguer déi Bürokratie, déi Approche kann d'Sécherheet vun deene Leit am Geheimdéngscht a Fro stellen, zum Beispill de Port d'armes: De Port d'armes, weinstens a menger bescheidener Aschätzung, dat ass eppes, wat déngschtintern kann décidéiert ginn, wou normalerweis en Direkter vun engem Geheimdéngscht ka soen: „Hei, dat do ass eng geféierlech Missioun, du hëls eng Waff mat.“

Hei ass et awer esou, datt den Direkter „peut autoriser“ - ganz bürokratesch - den Agent, deen eng Waff brauch, datt deen eng Autorisatioun beim Justizminister muss sollicitéieren, dat heescht bei deem senge Beamten - et ass jo kaum de Minister selwer, dee sech ëm esou Dossiere këmmert -, well en dann eng Waff brauch. Dat heescht, seng Identitéit ass natierlech dann am Justizministère bekannt, seng reell Identitéit. An derbäi kënn nach: Wat ass dann, wann e se refuséiert kritt vum Justizminister, well e brauch se, sou seet d'Gesetz, fir seng legitim Défense?

Also hei gi mer an d'Prozedur eran - déi ech kann novollzéien aus dem Geescht vu verschiddene Virriedner, wéi si de Geheimdéngscht gesinn -, mä mir mussen dach kucken, datt de Geheimdéngscht an déi Agenten e Risiko fir eis alleguer op sech huelen! Si infiltriéieren Organisatiounen vun deem niddregste moraleschen Niveau, an da kommen nach esou bürokratesch Hürden derbäi, déi och nach hir Identitéit a Fro stellen.

Well e Grondprinzip am Geheimdéngscht ass deen, datt desto manner Leit wëssen, wat geschitt, desto manner Leit iwwerhaapt d'Identitéit kennen, desto besser ass et! Well dat si keng Situatiounen, déi sech op der Place publique diskutéieren. Et ass eng grondsätzlech Kritik géintwuer dësem Gesetzesprojet, datt vill ze vill Leit eigentlech vill ze vill wëssen. Ech kommen am Detail nach dorobber zréck.

Iwwert déi sëllege Rapporten a Lëschten, déi gemaach ginn, gutt, do kann een déi verschiddenst Meenungen hunn. Wichteg ass awer, datt déi Prozeduren net laangwiereg sinn! Wann en Direkter en Extrait vun engem Casier judiciaire 2 freet, da soll dat direkt kommen! Well hei steet zwar, datt e muss schréfflech ugefrot ginn, mä wéini kritt en eng Äntwert? Dat sinn alles Saachen an esou Operatiounen, wéi Geheimdéngschter se maachen, dat muss direkt sinn, dat muss séier sinn! Do kënnen mer keng Délaie verdroen.

Dann och bei den Observatiounen a Wunnengen - et wor bal witzeg, dat ze liesen -, do steet dann, wann eben de Geheimdéngscht sech an eng Wunneng eramécht, fir verschidde Saache virzehuelen, en Trojaner oder wat och ëmmer unzebréngen, datt de Geheimdéngscht kann an eng Wunneng goen, «le cas échéant», steet do, «sans le consentement du propriétaire ou de l'occupant de ces lieux». Jo, ëm déi geet et jo!

Soll dann elo, wéi dat do juristesche formuléiert ass, herno an engem Prozess gesot ginn: „D'Autorisatioun ass net gefrot ginn!“, quitte datt se herno vum Propriétaire oder vum Occupant refuséiert gouf? Firwat esou eng Formulierung? Firwat seet een net einfach: «le consentement n'est pas requis»? Well dat sinn alles Saachen, déi net realistesch sinn.

Genausou wéi d'Indemnisation des sources humaines. Natierlech kritt ee fir eng wäertvoll Informatioun Suen, wann dat eben de Wee ass, fir eng Informatioun ze kréien: En Numm vun engem Agent, eng Prozedur, eng Plaz, déi wichteg ass fir eng bestëmmt Operatioun, déi ass eben esou vill wäert an da gëtt dat bezuelt. An da steet do, dat wier kee Revenu nom Steiergesetz! Jo, wat hätt Der da wëlle maachen? Dir hätt nach sollen en Impôt libérateur draschreien oder esou! „Hei hues de 5.000 Euro a 500 Euro huelen ech zréck weinst de Steieren.“! Dat ass einfach net realistesch!

A wéi déi Servicer fonctionnéieren, et ass vläicht gutt, datt dat an engem Gesetz steet, mä dee ganze Geescht hei, do freet ee sech: Wivill Erfahrung hunn déi Leit, déi esou eppes schreien?

Genausou wéi mat den Identitéiten: Eng Identitéit d'emprunt, dat ass och eppes, wat esou geheim ass an esou wichteg, fir d'Sécherheet vun deene Leit ze schützen, déi ebe sech infiltriéieren oder an esou enger Situatioun sinn. An dat geet dann duerch e Comité ministériel. E Comité ministériel: Et ass net, datt ech e Mësstrauen hätt géintwuer deene Leit, déi an deem Comité sinn, an och scho guer net géintwuer deenen, déi am Abléck drasetzen. Och dat ass net ad personam, dat Argument. Mä do heescht et erëm, datt op d'mannst dräi Ministeren, den Délégué à la sécurité a Gott weess wien nach do ronderëm op eemol Nimm kennen an Tarnidentitéit kennen. Och dat ass net gutt!

D'Kontroll allgemeng, fir dorobber anzegoen: Firwat net d'Cour constitutionnelle an deenen dräi Magistraten? D'Cour constitutionnelle ass bei den Droits de l'Homme dat Organ! Firwat net? Ech huelen ul, datt dat ass, well d'CSV mat deenen dräi aktuelle Regierungsparteien eigentlech d'Verfassungsgericht wëllen ofschafen. Mir als ADR hunn eng aner Approche. Mir wëllen et stäerken! An...

Dach! Den Här Minister kuckt komesch.

► **M. Félix Braz**, *Ministre de la Justice*.- Dat stëmmt dach net!

► **M. Fernand Kartheiser** (ADR).- Kuckt Äre Projet fir eng nei Verfassung, do gesitt Der dat!

Dann den Délégué à la sécurité...

► **M. Alex Bodry** (LSAP).- ...steet schonn haut am Text dran! ...

► **M. Fernand Kartheiser** (ADR).- Här Bodry, wann ech gelift! Wann Der eng Fro hutt, da stellt se!

(*Interruptions diverses*)

Ech kommen och dorop.

Dann den Délégué à la sécurité...

(*Interruption*)

Dir wëllt d'Verfassungsgericht ofschafen, Här Bodry, mir kënnen...

Sou, den Délégué à la sécurité, dat ass eppes, wat och ganz, ganz geféierlech ass. Elo stellt lech emol vir... Dat ass esou de Politikkommissar am Geheimdéngscht.

(*Brouhaha*)

Et ass och e Mësstrauen, et ass en institutionellt Mësstrauwe géintwuer dem Direkter vum Geheimdéngscht. Well, elo stellt lech emol vir, den Délégué à la sécurité an den Direkter vum Geheimdéngscht kommen net laanschteneen!

(*Interruption*)

Och dat si mënschlech Problemer. Dat sinn alles administrativ Konstrukter, déi kënnen fonctionnéieren, mä déi wahrscheinlech net ëmmer fonctionnéieren.

D'Commission parlementaire: fir eis an där aktueller Form net akzeptabel! D'ADR, d'Sensibilitéit sinn net dran. Mir verstinn als ADR selbstverständlech, datt mir e Recht hunn, dodran ze sinn, an dorobber besti mer och!

De Comité ministériel, fir domadder opzehalen, well ech gesinn, meng Zäit ass eriwuer, ee Wuert nach zum Comité ministériel. Et gëtt eng individuell ministeriell Verantwortung. De Comité ministériel am Artikel 2 ass beschriwwen als en Organ, dat soll Direktive ginn, eng «politique générale du renseignement», eng «politique en matière de protection des renseignements» an esou weider, oder Données sensibles.

An da stinn am Artikel 8 awer operationell Befugnisser, e gëtt d'Autorisatioun fir Moyens de recherche, en ordonnéiert verschidde Saachen! An da muss ee sech awer froen: Jo, wat ass dann elo de Rôle vun deem Comité ministériel? Ass et e Gremium, fir allgemeng Richtlinnen ze ginn, oder ass et eng operationell hierarchesch Instanz? Dat ass net kloer.

Ech wëll ophalen, wéi gesot, well meng Zäit leider eriwuer ass, mat engem Wuert iwwert d'Primmen. Et ass klenglech, esou eng Diskussioun ze féieren, well wann ee weess, wéi geféierlech et fir déi Leit ass a wat déi alles op sech huelen am Liewen, fir fir eis Sécherheet ze suergen,...

(*Interruption par M. Eugène Berger*)

Jo, Dir verstitt dat net, Här Berger, well Der wahrscheinlech ni an esou enger Situatioun waart. Mä dat...

► **M. Eugène Berger** (DP), *rapporteur*.- Mat Leit wéi lech, do hätte mer nach...

► **M. Fernand Kartheiser** (ADR).- Mä ech wëll ophalen...

► **M. Mars Di Bartolomeo**, *Président*.- Et ass net méi Zäit fir den Dialog. Kommt zum Schluss, Här Kartheiser!

► **M. Fernand Kartheiser** (ADR).- Dat maachen ech gär, Här President. An dat Schlusswuert ass, datt mer hei - vu datt mer alleguer heibannen, vläicht ausser deene lénke Kollegen, der Meinung sinn, datt mer dee Service brauchen - der Meinung sinn, datt mer em solle Vertraue schenke fir deen neien Ufank an datt mer dann awer och Merci soen deene déi Leit, déi dat do op sech huelen! Well déi, déi d'Aarbecht kennen, wëssen, wat dat do heescht, an et ass wierklech net einfach!

Ech soen lech Merci.

► **Une voix.** - Très bien!

► **M. Fernand Kartheiser** (ADR).- Den Här Gibéryen erënnert mech mat Recht, Här President, drun, datt ech nach eppes Wichteges net gesot hunn: D'ADR stëmmt dëst Gesetz also net! Merci.

► **Une voix.** - Ah sou!

► **M. Mars Di Bartolomeo**, *Président*.- Et ass gutt, dass den Här Gibéryen nach do ass.

► **M. Fernand Kartheiser** (ADR).- Jo, dat fannen ech och.

► **M. Gast Gibéryen** (ADR).- Ech och, ech och!

(*Hilarité*)

► **M. Mars Di Bartolomeo**, *Président*.- Also, dat gesot, ginn ech d'Wuert direkt weider un den Här Marc Baum, dee virdrun net zu Wuert komm ass, mä deen dann elo seng ganz Zäit zur Verfügung huet, fir all dat ze soen, wat e wollt soen.

► **M. Marc Baum** (déi Lénk).- Merci, Här President. No dësem Zäitsprong an déi deifsten Däischterte vum Kale Krich, déi mer elo grad hei hu misse materliwen, probéieren ech, op d'Realitéit zréckzekommen an d'Situatioun haut.

Ech wëll awer virausschécken, datt de Rapporteur nach keng zwou Minutte geschwat hat, an dunn huet e schonn déi éischt Onwouerecht gesot,...

► **Une voix.** - Ouh?

► **M. Marc Baum** (déi Lénk).- ...näamlech datt déi Lénk de Rapport vun der Enquêtekommission gestëmmt hätten. Och den Här Bodry huet dat duerno gesot! Dat ass awer net wouer.

Mir hunn eis enthalen dozou, an aus zwee Grënn.

Éischtens, well dee Saz am Rapport steet: «L'utilité d'un service de renseignement ne semble pas être mise en question», dat stelle mir a Fro, well fir eis ass dat a Fro gestallt. An zweetens, well och aus der Enquêtekommission erausgeet, datt d'Enquête soll zouge-

maach ginn. Och do ware mer dergéint. Duerfir hu mer eis enthalen. An duerfir ass et och net politesch inkohärent, wa mer elo och weiderhin dat doten a Fro stellen.

Här President, déi dräi, véier lescht Joren...

► **M. Eugène Berger** (DP), *rapporteur*.- Här President!

► **M. Mars Di Bartolomeo**, *Président*.- Här Baum!

► **M. Marc Baum** (déi Lénk).- Jo.

► **M. Mars Di Bartolomeo**, *Président*.- Vu dass Dir virdrun d'Fro gestallt hat, ob Der dierft. Den Här Berger wollt eng Bemierkung maachen. Hir kritt dat selbstverständlech och ugerechent.

► **M. Marc Baum** (déi Lénk).- Da gären.

► **M. Eugène Berger** (DP), *rapporteur*.- Jo, dat ass och elo net ganz... Ech wollt nach eigentlech just soen, datt ech elo... Bon, den Här Baum huet elo gesot, de Rapporteur hätt d'Onwouerecht gesot oder hinnen eppes ënerstallt. Ech mengen, wann een dat och herno nolauschert, ech hu mer ëmmer Méi ginn, fir ze soen eben, datt déi Lénk och an der Kommission ganz konstruktiv matgeschafft hunn, mä datt si op enger Rei Punkten eng aner Vue haten. Ech hu versicht awer als Rapporteur, dat objektiv duerstellen. A wann dat esou ukomm wier, wéi wann ech do hinnen iergendwéi eng Inkonsequenz wëlt virgeheien, da war dat awer sécherlech net d'Intentioun. Merci.

► **M. Mars Di Bartolomeo**, *Président*.- Merci, Här Berger.

► **M. Marc Baum** (déi Lénk).- Jo, Merci och fir dës Präzisioun dann, Här Berger.

Här President, déi dräi, véier lescht Jore waren dovunner geprägt, datt d'Éffentlechkeet ëmmer erëm op en Neits mat Skandalen ronderëm Geheimdéngschter konfrontéiert gouf. Den amerikanesche Geheimdéngscht NSA huet systematesch d'Téléphone vun europäesche Statscheffen, Politiker, kuerz, vun europäeschen Décideuren op allen Niveauen ausspionéiert, och hei zu Lëtzebuerg, wéi mer duerch de Whistleblower Edward Snowden gewuer gi sinn.

Eis däitsch Noperen hu ronderëm den NSU-Prozess a sëllege Bundeslänner Enquêtekommissionen agesat, déi zu erschreckenden an entsetzleche Konklusione komm sinn: Jorelaang huet den däitschen Inlandsgeheimdéngscht ënnert dem Virwand vun der Infiltratioun duerch hir sougenannte V-Männer wesentlech zur Stärkung vun der organisierter a mënscheveruechtender rietser Kriminalitéit bäigedroen.

Dëst ass net an iergendwellechen ënnerentwéckelte Länner geschitt, mä bei eisen Noperen zum Deel, bei eise sougenannten Alliéierten, mat deenen och déi lëtzebuergesch Servicer jo haut nach intensiv kooperéieren. An zu Lëtzebuerg huet d'Enquêtekommission 2013 Dysfunktionementen vum SREL un den Dag bruecht, déi vun enger Gravitéit waren, datt de responsabele Minister säin Hutt huet missen huelen an Neiwahlen decidéiert goufen.

No de Wahlen huet dunn déi nei Regierung versprach, d'Fënstere grouss opzemaachen, an en neie Wand sollt net nëmmen deen ale Mif ewechblosen, mä och opraume mat illegalen an illegitimme Praktiken vum Geheimdéngscht. Dat Gesetz hei iwwert de SREL, wat mer haut diskutéieren, sollt een zentralen Deel dovunner sinn.

Här President, den éischten Androck ass heiansdo dee richtegen. A sengem éischten Avis zum SREL-Gesetz vun der fonkelneier liberaler Koalitioun, déi eben aus deem Schaum vun der Debatt iwwert d'Dysfunktionementen vum SREL gebuieren ass, huet de Statsrot, deen nu wierklech net am Verdacht steet, e lénke Fer de lance ze sinn, gemengt: „Bei der Lektür gi mir“, also de Statsrot, „den Androck net lass, datt de Projet de loi virun allem als Zil huet, en neie legale Kader ze schafen, deen et erméigleche soll, esou weiderzefuere wéi bis elo, ouni mussen ze fäerten, an Zukunft iwwert dat erauszegoen, wat legal méiglech ass.“ Op Lëtzebuergesch iwwersat, dat, wat am Avis stoung.

Här President, mir deelen dësen Androck vum Statsrot och nach haut. De Statsrot huet domadder d'Befierchtungen vum däitschen Expert virun der Enquêtekommission, dem Rolf Gössner, bestätegt, datt esou Geheimdéngschterformen nawell gären duerfir benotzt ginn an dacks domadder ennegene, fir d'Geheimdéngschter ze legitiméieren an ze stäerken, ouni awer wierklech kënnen oder wëllen eppes un hirem Fonctionnement ze änneren.



D'Geheimdénsgchter sinn, an där Meenung bleiwe mer unhand vun den historeschen an de rezenten Erfahrungen, Geheimdénsgchter si Friemkierper an engem Rechtsstat. Si si Friemkierper an enger Demokratie. Hire Champ d'action ass esou breet opgestallt a beréiert all Zorte vu gesellschaftlechen Entwicklungen, Tendenzen, Meenungen, also genau dat, wat eigentlech d'Wiesen, de Kär vun enger Demokratie ausmécht.

Zweetens sinn déi Moyenen, déi se zur Verfügung hunn, strukturell intrusiv a verletzen domat par définition d'Privatsphär, och vun deene Leit, déi eigentlech net d'Zil vu geheimdénsgchlechen Enquête sinn.

Drëtzens hu Geheimdénsgchter duerch hir international Ramifikatiounen eng Tendenz zur Autonomiséierung a si entwéckelen Egendynamiken a si kënnen duerfir, véiertens, och net wierklech an net zefriddestellend vun engem Parlament kontrolléiert ginn.

Ech wëll a menger relativ kuerzer Riedezäit op verschidden Aspekter, besonnesch awer deen éischten agoen, wat den eigentleche Champ d'action vum Inlandsgeheimdénsgcht ass.

An dësem Projet de loi gëtt den ideologeschen, philosopheschen oder konfessionellen Extremismus, „mat Neigung zur Gewalt“ gëtt dann nach bäigesat, elo ausdrécklech an d'Missionne vum SREL opgeholl. Dat steet och esou nach eng Kéier ganz prezis am Commentaire des articles. Et gëtt gesot, den Extremismus wier de Refus, fir an engem normale politeschen, demokrateschen oder parlamentaresche Kader ze debattéieren, deen als eenzege viru politescher Iwwerwaachung soll geschützt ginn. Mä wat ass „normal“?

Ënnersicht gëtt Extremismus „mat Neigung zur Gewalt“. Mä wat ass dat, „Neigung“? Et gëtt eis erkläert: „Neigt een zur Gewalt, fënnt eng Radikalisierung statt. Dës Radikalisierung ass de Werdegang, während deem Leit an en ideologesche Message agefuert ginn, an en Ensemble vu Croyancen, an doduerch encouragéiert ginn, hir moderat Iwwerzeegungen, déi och allgemeng ugeholl sinn, duerch extrem Iwwerzeegungen ze ersetzen.“

Gesitt Der, wéi schwammeg déi Begrëffer sinn? Wat ass „normal“? Wat ass „anormal“? Wat ass „moderat“? Wat ass „extrem“? Wéi definéiert een „Neigungen“ oder „Tendenzen“? Wat sinn iwwerhaupt „Iwwerzeegungen“? Op dese komplett onklore Begrëffer an diffusen Theorien baséiert dësen Text! Dës Notiounen maachen d'Dier grouss op fir allméiglech subjektiv Interpretatiounen, an domadder och zur Willkür.

En interessant Beispill vun esou Konfusiounen hu mer beim Deltour-Whistleblower-Prozess viru Kuerzem erlieft, wou e Polizeibeamten, also kee SREL-Mataarbechter, e Polizeibeamten uginnt huet, den Antoine Deltour wier Antikapitalist, well en éischens dat natierlecht Recht vun Entrepreneuren, kaum Steieren ze bezuelen, géif a Fro stellen an, zweetens, well en d'Internetzeitung „Mediapart“ abonnéiert hätt. Eh ben, ech hu mer virgestallt, dat do wieren Extraiten aus dem George Orwell sengem „1984“, déi ech géif héieren.

Ass en Antikapitalist, an dat ass awer elo interessant fir de SREL, ass dat en Extremist?

Den Här Kartheiser géif Jo soen.

(Hilarité)

A virun allem, an do kënnt eng aner Notioun mat eran, schuet en Antikapitalist da vläicht den Intérêts économiques vum Land - eng weider Notioun, déi d'Grundlag vun den Aktivitéiten vum SREL ass?

Ass eng Ënnerstützungsversammlung fir den Antoine Deltour da konsequenterweises eppes, wat vum SREL soll observéiert ginn? No dësem Gesetz jo och vläicht misst ginn? Oder och ginn ass, wéi a verschiddenen Dageszeitunge stoung? Wier definéiert allegueren déi Begrëffer? D'Antwort ass: en fin du compte d'Exekutiv. An dat ass geféierlech!

Mir soll keen erzielen, dat dote Gesetz géif politesch Observatiounen ee fir alle Mol ausschléisen! D'Praxis, an dat huet och d'Enquêtekommissionen gewisen, war eng aner. D'Enquête huet gewisen, dass haut nach émfänglech Lëscht vum Organisatiounen ugeluecht ginn, an deenen hirem Émfeld gesicht gëtt.

Mir hunn als Lénk zwee Fäll kënnen opdecke vu Leit aus déi Lénk, vun deenen aktuell Fichen ugeluecht goufen, déi elo duerch d'Interventioun vum Dateschutz zerstéiert gi sinn. Duerfir wësse weder mir nach déi beträffe Persounen, wat drastoung.

Doriwwer eraus hu mer keng Informatiounen iwwert dat, wat de Geheimdénsgcht haut an der Praxis ënner „Extremismus mat Neigung zur Gewalt“ versteet, iwwregens och net iwwert dat, wat een ënner „intérêts économiques“ versteet. Den Här Bodry huet drop higewisen, awer och keng Äntwert dozou kënnen ginn.

Mir fannen et bedenklech, well hei keng Strofnoten ënnersicht ginn, mä am Fong geholl gesellschaftleche Phenomeener, déi eigentlech misste Géigestand si vu politeschen oder soziologeschen Etüden. Den „Extremismus“ ass nämlech e politesche Begrëff.

A keen anere wéi den Här Kartheiser huet dat jo och elo nach eng Kéier versicht kloerzestellen. Offensichtlech, wéi politesch dee Begrëff „Extremismus“ awer ass - deen, wéi gesot, d'Grundlag ass vun den Aktivitéiten -, gëtt, wann de Premier a Geheimdénsgchtchef an öffentlecher Chamberssëtzung engem Deputéierten Extremismus virwerft,...

(Interruption)

Wann ee weess, dass Extremismus eng operationell Kategorie vum SREL ass, ma da si mer an Däiwels Kichen! Aner Deputéiert heibanne kéinten eventuell hir Sympathie fir Streikbewegungen a fir gewësse Stroossenaktiounen a Frankräich weisen, déi vun der franséischer Droite als Lénksextremismus oder souguer Terrorismus bezechent ginn.

Mir mengen, dass a kengem Fall - a kengem Fall! - politesch Aktivitéiten, och déi, déi als net esou „normal“ ugesi ginn, dierfe geheimdénsgchlech iwwerwaacht ginn. A fir Strofnoten a Gewalt, duerfir gëtt et d'Police an d'Gerichter. A wa se awer iwwerwaacht ginn, dann hätte mer zumindest gären, dass den Objet vun deenen Iwwerwaachung bekannt gëtt.

Mir hunn d'Propos gemaach, dass mer en äänleche Rapport missten hunn, wéi de Bundesverfassungsschutz dat mécht. Et ass esou net ugeholl ginn.

Mir wëssen och, dass an anere Servicer, mat deene mer Relatiounen hunn, politesch Spionage geschitt. De fréiere Procureur général huet op enger rezenter Table ronde iwwert den État d'urgence dovun geschwat.

Här President, Terrorismus an den Terrorismusbegrëff zu Lëtzebuerg sinn zënter 2003 politesch beluecht a schéisst wäit iwwert dat eraus, wat d'Leit an och aner Länner ënnert deem Begrëff verstinn. D'Saach gëtt net méi einfach duerch, dass deen nebulöse Begrëff elo 2004 an d'SREL-Missionen opgeholl ginn ass an och elo weidergefuert gëtt.

Nach eng Kéier: De SREL ënnersicht keng Strofnoten, mä Usichten, déi kéinten iergendwann zu Strofnote féieren, oder och net. Dat ass egal.

Et ware grouss Diskussiounen, konnt een nolliesen, an der Institutionskommission iwwert d'Trennung vun den Aufgabe vu Police a Geheimdénsgcht. Et ass net gelongen, dat vuneneen ze trennen. Den Expert Gössner huet a sengem Buch dovunner geschwat, dass een iwwerall géif e Prozess gesi vun „Vergeheimdienstlichung“ vun der Police a vun „Verpolizeilichung“ vun de Geheimdénsgchter.

Mä et brauch een net nëmme bis an Däitschland ze goen. De fréiere Procureur général huet e puermol schonn op déi ongesond Vermischung higewisen, wou Police a Staatsanwaltschaften Operations- a Beweismethoden vum SREL verënnerechen.

Dobäi stelle Beweismëttel vun auslänneschen Dénsgchter grad an engem klengen Land wéi Lëtzebuerg e groussen Deel vum Inhalt vun der Aarbecht vum SREL duer. An do muss dat net onbedéngt enger parlamentarescher Kontroll ënnerzu ginn. Dat ka geschéien ënner massiver Verletzung vun individuelle Rechter, wéi mer dat bei der Virgeewis ginn hu beim NSA! Dës Informatiounen bilden awer d'Meenung vun eisem Geheimdénsgcht.

An émgedréit: Souguer wa Verbrieche géifen duerch esou geheimdénsgchlech Aktivitéiten opgedeckt ginn, déi op eise Territoire a sougenannten internationalen Operatiounen operéieren, da wier et géint hire Wëllen, also géint de Wëlle vun deenen anere Geheimdénsgchter, net méiglech, eis Gerichter domadder ze befaassen. Dëst ass e Beispill, wéi konkret Kriminalitéitsbekämpfung kann duerch geheimdénsgchlech Interesse behënnert ginn.

Et gëtt vill Beispiller aus der Vergaangenheet, déi mer kennen, wéi geheimdénsgchlech Informatiounen zu Feelschlëss gefouert hunn. D'Beispill vun Taoufik Kalifi, deen un Tunesien ausgeliewert ginn ass opgrond vu Geheimdénsgchtinformatiounen vum tuneesesche Geheimdénsgcht, oder d'Fro vun der Madame Ersöz, der kurdescher Journalistin, all dat weist, dass déi Kooperatioun an déi international Ramifikatioun eppes ganz Geféierlech ass.

Wat geschitt dann elo, wann 150 tierkesch Deputéiert, déi hir Immunitéit entzu kruten, elo ënner Terrorverdacht gestallt sinn? A stellt lech emol vir, déi hätte Kontakter hei mat Lëtzebuerg!

Här President, meng Zäit leeft mer fort. Mä ech mengen, dass den eenzelne Bierger och wësse muss, wat iwwer hien un Date gesammelt gëtt, wann dat géint seng Rechter verstéisst an hien zu Onrecht iwwerwaacht gëtt. Eréischt dann ergëtt iwwerhaupt all parlamentaresch Kontroll an och all gerichtlech Kontroll, och vu speziellen Iwwerwaachungsmesur déi Trojaner oder Hausfriddensbroch duerch de SREL a besonnesch grave Fäll, e Sënn.

Ech kann hei leider net weider op déi Diskussionsion ronderëm den „Statstrojaner“ agoen, mä déi Froen, déi d'CNPD an deem Kontext opwerft an déi och aner an der öffentlecher Debatt opgeworf hunn, bleiwen onheemlech pertinent. An dësen Text gëtt keng Äntwert op dës pertinent Froen!

Här President, ech wëilt ganz zum Schluss och nach eng Kéier soen, dass mir natierlech dëst Gesetz net matdroen, dass eis prinzipiell Bedenken iwwert d'Funktionsart a -weis vun de Geheimdénsgchter oprechterhale bleiwen an dass mer dofir dat heite Gesetz och net votéieren.

Ech wëilt dem Här Kartheiser dann awer déi Fro quasi stellen, ob dann hien der Meenung ass, dass Leit, déi Gruppierungen, sougenannt extremistesche Gruppierungen wéi Pegida, op Facebook ënnerstëtzen, ob dat da Leit sinn, déi senger Meenung no sollte vum Geheimdénsgcht iwwerwaacht ginn.

Ech sinn där Meenung net! An duerfir kann ech just soen: Ech si frou, dass den Här Kartheiser net méi am Geheimdénsgcht ass, weder an eise nach am russeschen!

Merci.

► M. David Wagner (déi Lénk). - Très bien!

(Interruption)

► M. Mars Di Bartolomeo, Président. - Jo, ech hunn dem Här Baum déi puer Sekonne méi ginn, fir déi Fro kënnen ze stellen, a ginn da selbstverständlech och déi puer Sekonnen dem Här Kartheiser, fir dorop ze äntwerten. Dir kënnt dat roueg vun Ärer Plaz maachen, et geet em e puer Sekonnen.

► M. Fernand Kartheiser (ADR). - Här President, ech soen lech Merci. Ech mengen zwar, dass dee Contenu an déi Tonalitéit vum Här Baum senger Bemierkungen iwwert dat erausgeet, wat ech géif als eng einfach Fro considéieren, mä ech fille mech och perséinlech an enger gewëssener Hisiicht ugegraff. Ech wëll also...

► Une voix. - Oh!

► M. Fernand Kartheiser (ADR). - ...mat zwee oder dräi Sätz awer äntworten.

Déi éischt d'Fro: Pegida a Leit, déi dat op Facebook guttheeschen. Ech iwwerloossen et den däitschen Autoritéiten anzuschätzen, ob an hiren Aen Pegida extremistesche ass oder net. Ech fille mech als Lëtzebuerger do net concernéiert. Ech hunn awer eng perséinlech Meenung dozou.

Wéi Pegida geschafe ginn ass, do hate se zéng Grondsätz. Déi hunn ech gelies. An ech mengen, dass mer heibanne wahrscheinlech an enger ganz grousser Majoritéit zu der Iwwerzeegung komm wären, dass Pegida, wéi et ugefaangen huet, op jidde Fall keng extremistesche Bewegung war.

Mir hunn awer eppes gesinn, wat mer hei an och an anere Länner gesinn, dat wor aus politesche Grënn e Refus de dialogue. An ech mengen, deen deet haut verschiddene Parteie wéi, déi dat deemools gesot haten, zum Beispill enger däitscher SPD, déi hir Meenung geännert huet, enger däitscher grénger Partei, déi hir Meenung geännert huet.

An d'Fro stellt sech grondsätzlech, ob an enger Demokratie et gutt ass, den Dialog mat esou Mouvementer ze verweigeren, oder net. Ech mengen net! Ech mengen, et ass wichteg, dass jiddweree mat jiddwerengem ka schwätzen, fir och eng Tendenz zu enger Radikalisierung ze verhënnere.

Fir déi zweet Fro ze beäntworten zu de Leit, déi esou Mouvementer op Facebook verfolge oder deelen: Ech sinn en Unhänger vun der Meinungsfräiheet. Ech géif dem Här Baum et ni verbidden oder iergendengem aneren heibanne, Mouvementer op Facebook ze verfolge, ze folgen - ech weess net, wéi een dat elo seet - oder Saachen ze deelen, déi him gefallen, déi en interesséieren, déi e fir wichteg hält.

A genausou denken ech, dass d'Meinungsfräiheet muss déi Toleranz opbréngen, och kënnen Saache weiderzeginn, déi Verschiddener stéieren.

ren, déi kënnen irritéieren, déi kënnen erausfuerderen, déi kënnen zum Dialog opruffen. Mä ech mengen, d'Demokratie leeft dovunner! An et schéngt mer extrem wichteg ze sinn, dass d'Meinungsfräiheet och dat begräift.

An zum leschte Punkt: Ech wëll dem Här Baum nach eng Kéier soen, dass ech zwar fir de Geheimdénsgcht geschafft hunn, awer am Opdrag vum SREL a fir dëst Land. An e sollt also net probéieren, iergendeppes anescht hei duerzestellen!

Ech soen lech Merci.

► M. Mars Di Bartolomeo, Président. - Merci och. An dann huet d'Wuert dee leschten ageschriwwene Riedner, den Här Gilles Roth.

► M. Gilles Roth (CSV). - Merci.

► M. Gast Gibéryen (ADR). - Wie weess, wie vun hinnen alles fir de KGB geschafft huet!

► M. Fernand Kartheiser (ADR). - Oh, ma alleguer!

► M. Mars Di Bartolomeo, Président. - Sou, wann ech gelift!

► M. Marc Baum (déi Lénk). - Also, ech mengen, dass ass emol eppes, wat Der mir...

► M. Mars Di Bartolomeo, Président. - Am Moment huet just den Här Gilles Roth d'Wuert!

(Hilarité)

► M. Gilles Roth (CSV). - Här President, Dir Dammen an Dir Hären, ech enchainéieren op dat, wat den Här Baum zum Schluss gesot huet. Mir stëmmen zwar, contrairement zu déi Lénk, de Gesetzesprojet mat, mä mat deem, wou hie keng Zäit méi hat, fir drop anzegoen, nämlech op d'Geschicht vun dem Statstrojaner, do wollt ech mech an deenen nächsten zéng Minuten e bësse konstruktiv dermat beschäftegen.

Den Artikel 8 vun dem Gesetzesprojet, dee gesäit nämlech vir, dass an Zukunft de Geheimdénsgcht d'Méiglechkeet kritt, fir op e sougenannten Trojaner zréckzegräifen. Mä wat heescht dat eigentlech? Mä dass heescht ganz kloer, dass de Service de renseignement an Zukunft sech kann an informatesch Systemer, sief dat Computeren, Smartphones, Tabletten an esou weider, aschleisen; dass andeems Agente vun dem SREL kënnen an d'Privatwunnenge vu Leit eragoen, fir esou en Trojaner ze placéieren, oder andeems d'Autoritéiten esou en Trojaner online iwwer Distanz an e Computer kënnen placéieren.

Esou en Trojaner, dee bitt effektiv wäitgräifend technesch Méiglechkeeten. Den Trojaner, dee viséiert net nëmme de Kär vun der Privatsphär vun de Leit, géint déi enquêtéiert gëtt, mä e viséiert, dass gewollt oder ongewollt, och d'Privatsphär vun onbedeelegten drëtte Persounen.

An all Aschränkunge vun de perséinleche Fräiheete vun dem eenzelne Bierger, déi müssen awer vereinbar si mat de Prinzipie vun dem Rechtsstat. Si müssen duerfir, éischens, per Gesetz legitiméiert sinn a si müssen, zweetens, Här Berger - och wa mer bal déiselwecht Krawatt hunn - enger strikter Kontroll ënnerleien.

(Brouhaha)

An all Agrëff op den eenzelne Bierger, a mir schwätzen hei wierklech an aller Seriositéit vun Agrëffer an de Kärberäich vun dem private Liewe vun de Leit, dee muss och kënnen op seng Rechtméissegkeet a virun allem op seng Verhältnisméissegkeet vun de Mëttele gepréift ginn, well och an dësem Beräich hellegt deen nobelsten Zweck net all Mëttele.

An d'Grundprinzipie vun dem Rechtsstat, déi dierfen och net am Kampf géint den Terrorismus a Fro gestallt ginn, well och dat mécht eng demokratessche Gesellschaft, déi mer hei zu Lëtzebuerg sinn, aus.

D'CSV, an ech ënnersträichen et, seet Jo zu dësen neien Iwwerwachungsmethoden, well d'Kriminalitéit...

(Interruption par M. Alex Bodry)

Här Bodry!

D'Kriminalitéit, déi huet, Här Bodry,...

(Interruption)

...nämlech haut en anert Gesiicht, wéi se dat nach viru Joren hat, mä d'Kontroll, Här Bodry, déi muss och sinn. Abuse muss verhënnert kënnen ginn an d'Rechter vun de Leit muss garantéiert bleiwen, dass besonnesch, well déi Mesur vum Geheimdénsgcht eng preventiv Natur hunn an net virun also duerch en Untersuchungsrichter ënnert der Kontroll vun dem Gericht autoriséiert sinn.

Mä ebe grad oder, géif ech soen, och dofir kann et geschéien, dass de Kär vun de Privatleit hirer Intimsphär duerchlicht ka ginn a sech herno vläicht erausstellt, dass dësen Agrëff



iwwerhaapt net begrënnt war. A grad hei bleift de Gesetzesprojet, iwwert deem haut eis Chamber ofsetëmmt, awer onprezis a vag. An ech mengen, wann et néideg ass, mussen mer dat nobesseren. An dat ass d'Responsabilitéit vun eis all. An ech soen och ganz kloer: Dozou steet d'CSV!

De Gesetzesprojet gesäit sécherlech vir, bei wat fir enge Strofdoten en Trojaner kann agesat ginn, mä d'Form, wéi den Trojaner kann agesat ginn, d'Kontroll iwwert den Trojaner, déi si weider net an dem Gesetzesprojet festgeluecht.

De Rapport vun der Institutounskommissioun vum Här Berger hält fest, «qu'il incombera au pouvoir exécutif de s'assurer que les dispositifs techniques mis en place répondent à des critères de qualité rigoureux». Dat steet an dem Rapport. An dat war och den ausdréckleche Wonsch, mengen ech, vun der gesamter Kommissioun. Ech géif och soen: Dat ass fein a gutt. De Gesetzesprojet, dee prezisiéiert net, wat fir eng Finalitéit aver deen Trojaner soll hunn, wéi eng Form vun Donnéeën, Kommunikatiounen an Dokumenter kënne gekuckt ginn.

Duerfir eng Rei Froen: Geet et drëm, fir lafend Internetkommunikatiounen, déi zum Beispill via E-Mail, Skype oder Chat gemaach ginn, ofzefänken? Oder geet et drëm, eng Raum-iwwerwachung ze maachen, andeems den Trojaner d'Webcam um Computer vu private Leit iwwert d'Lautsprecher aktivéiert an esou d'Billen an d'Gespräicher aus enger Wunneng bei de SREL iwwerdréit? Wat geschitt, wann onbedeelegt Drëtter an der Wunneng sinn? Ginn déi mat ofgelauschert? Ginn deenen hir Billen mat iwwerdroen oder opgezeechent?

Au vu vun der Jurisprudenz vun dem Geriicht fir d'Mënscherechter zu Stroossbuerg sinn awer Zweifel ubruecht, dat soen ech ganz éierlech, ob esou en Agrëff mat dem Prinzip vun der Proportionalitéit, also der Verhältnisméissegkeet vun de Mëttelen, am Aklang ass.

Oder eng aner Fro: Sollt et esou wäit goen, dass all d'Donnéeën an d'Dokument, déi an engem Computer vun enger Privatpersoun stockéiert sinn, kënnen erofgeluede ginn, also d'Liewe vun enger Persoun bis an de privatsen, bis an de sensibelsten Detail kann duerchlicht ginn?

Esou Froen, déi däerfen op Dauer, soen ech, an engem Rechtsstat net onbeäntwert bleiwen. De Gesetzesprojet gëtt eiser Meenung no net am vollen Empfang doriwwer eng Äntwert. A mir stëmmen dat haut mat, mä nach eng Keier gesot: Mir verschléissen eis selbstverständlech net an ënnerstëtzen ausdrécklech eng Nobesserung, wa se dann néideg ass, op dese Punkten.

An déi national Dateschutzkommissioun an eis national Mënscherechtskommissioun, déi hunn och fundéiert Avisen zu der Asetzung vun den Trojaner ginn, an zwar an hiren Avisen vum Februar respektiv vum Mäerz dës Joer. Dës war zwar am Kontext vun dem Gesetzesprojet 6921 vun dem Justizminister iwwert d'Sécherheitsmoosnamen am Kampf géint den Terrorismus, mä d'Konklusiounen, wat de Statstrojaner dovunner betrëfft, déi, mengen ech, kann een och op dese SREL-Projet de loi iwwerdroen.

An deem Kontext sot an hirem Avis den 9. Mäerz 2016, also viru genau dräi Méint, déi national Mënscherechtskommissioun op enger ganzer Rei Punkten, wéi si d'Lag vun der d'Situatioun gesäit, a mécht och eng Rei vu Recommandatiounen, déi een an deem sensibele Beräich vun dem Schutz vun der Privatsphär sécherlech net däréi ausser Uecht loossen.

D'Mënscherechtskommissioun, déi national, déi fuerdert vu Fall zu Fall eng prezis Beschreiwung vun den informatischen Daten, déi kënne captéiert ginn, prezis Autorisationsprozeduren an effikass Kontrollmechanismen: Wie kontrolléiert an der Praxis d'Installatioun vun dem Trojaner a wie kontrolléiert duerno och seng Desinstallatioun? Wie kontrolléiert d'Donnéeën, déi erofgeluede ginn? Wie kontrolléiert, wéi eng Dokumenter gehale ginn, well se eppes mat der Missioun vun dem Geheimdëngscht ze dinn hunn, a wat fir eng Daten net däréi gehale ginn?

An Däitschland, do huet d'Bundesverfassungsgericht schonns 2008 décidéiert, dass de Législateur garantéiere muss, dass de Kärberäich vun der Privatsphär, deen näischt mat der Infraktioun ze dinn huet, net däréi touchéiert ginn. An hirem Avis weise souwuel d'Dateschutzkommissioun wéi och d'Mënscherechtskommissioun ausdrécklech dorop hin.

Elo kënnt Der natierlech soen: „Jo, dat ass Däitschland, a mir si Lëtzebuerg.“ Allerdéngs seet d'Mënscherechtskommissioun an hirem Avis och kloer an däitlech: «La CCDH», also «la Commission consultative des droits de l'Homme invite le législateur à prendre en considération la jurisprudence et la législation existante en Allemagne afin de garantir la proportionnalité et la nécessité des mesures envi-

sagées.» Dat heescht: Si recommandéieren, dass een déi Standarden och op Lëtzebuerg iwwerdréit.

A Frankräich, Här President, ginn d'Enregistremente, déi den Trojaner mécht, scelléiert an agespaart. Et muss och an engem Procès-verbal beschriwwen ginn, wéi eng Donnéeën iwwerhaapt kënnen zréckgehalen ginn. All Donnéeën iwwert d'Privatlieden, déi net am Zusammenhang mat der Missioun stinn, müssen zerstéiert ginn.

D'Politik, an do ziele mer eis all derzou, muss all dës fundamental Rechter vun de Leit duerch prezis Autorisationsprozeduren an herno och duerch onofhängeg Kontrollmechanisme garantéieren.

Wie programméiert den Trojaner? Dat ass och eng Fro! Mir sollen eis zu Lëtzebuerg sécherlech net méi schlecht maachen, wéi mir sinn. Mä hu mir iwwerhaapt déi technesch Mëttelen, fir esou en Trojaner ze entwéckelen an ze kontrolléieren, virun allem?

An Däitschland erlaabt d'Bundeskriminalamt-gesetz zënter 2008, lafend Internetkommunikatiounen méttels Trojaner ze iwwerwaachen. An Däitschland hat de Stat an enger éischer Phas mat enger privater Firma zesummegeeschafft, fir den Trojaner ze entwéckelen. 2011, also dräi Joer duerno, huet sech erausgestallt, dass déi Software vill méi wäit an d'Privatsphär agraife konnt, wéi dat d'Gesetz iwwerhaapt erlaabt huet. Och haten Hacker et fäerdegbruecht, Zougrieff op Donnéeën ze kréien, déi iwwert den Trojaner gesammelt goufen. Véier Joer - véier Joer! - huet d'Bundeskriminalamt do duerno gebraucht, fir selwer en Trojaner ze entwéckelen, deen dem gesetzleche Kader entsprecht.

Duerfir d'Fro: Wie soll dat hei zu Lëtzebuerg da maachen? Wie soll esou en Trojaner entwéckelen? A gedenkt do d'Regierung op Hëllef vun auslännesche Servicer oder vu private Betriber zréckzegräifen?

D'CSV ass der Meenung, dass een am Sënn vun dem Rechtsstat d'Bestëmmunge vun dem Gesetzesprojet iwwert de SREL betreffend d'Asetze vu Statstrojaner wann néideg sollt nobesseren an dat zesumme kucke mat dem Gesetzesprojet 6921 iwwert déi sougenannt Sécherheitsmoosnamen am Kampf géint den Terrorismus, wou sech eng äänlech Problematik, wéi ech dat virun ugedeit hunn, wäert stellen a wou den Avis vun dem Conseil d'État, also eisem Statsrot, op deem sensibele Punkt do jo och nach aussteet.

Här President, an der leschter Institutounskommissioun huet op Nofro vun der CSV d'Regierung d'Texten vun de Projets de règlements grand-ducaux iwwert d'Datebanke beim SREL déposéiert.

Här Statsminister, Dir hätt dat net misse maachen, well et si Reglementer vun der Regierung, also vun der Exekutiv, an dass Der et gemaach hutt, ier mer de Vott huelen, dat éiert lech an d'Regierung.

► **Une voix.**- Très bien!

► **M. Gilles Roth (CSV).**- Entsprechend Projeten, muss een och soen, ouni an der Ver-gaangenheet awer ze déif ze gruewen,...

► **M. Alex Bodry (LSAP).**- Besser net!

► **M. Gilles Roth (CSV).**- ...déi waren...

(**Hilarité**)

Mir si fein, Här Bodry.

Déi waren 2013...

► **M. Alex Bodry (LSAP).**- Mir si ganz fein mat lech!

► **M. Gilles Roth (CSV).**- ...och schonns vum deemolege Statsminister Jean-Claude Juncker deponéiert ginn an och vun der Dateschutzkommissioun relativ positiv, muss een awer soen,...

► **M. Alex Bodry (LSAP).**- ...2004...

► **M. Gilles Roth (CSV).**- Loosst mech ausschätzen!

► **M. Alex Bodry (LSAP).**- Néng Joer!

► **M. Gilles Roth (CSV).**- Ech soen, a bedauern, Här Bodry,...

► **M. Alex Bodry (LSAP).**- Bravo!

► **M. Gilles Roth (CSV).**- ...och kloer, dass et deemools néng Joer gebraucht huet, bis dës Projets de règlements grand-ducaux virgeluecht gi sinn.

► **M. Alex Bodry (LSAP).**- An néng Joer sot Der näischt dozou!

► **M. Mars Di Bartolomeo, Président.**- Wann ech gelift! Wann ech gelift, just den Här Roth huet am Moment d'Wuert. Här Roth, loosst lech net beiren! Fuert weider!

► **M. Gilles Roth (CSV).**- Neen, esou séier net, Här President.

► **M. Mars Di Bartolomeo, Président.**- Okay! Ah, wann Der mer dat sot...!

(**Interruption**)

► **M. Gilles Roth (CSV).**- An duerfir kucken ech och elo, séier d'Keier ze kréien, a soen lech,...

(**Hilarité**)

...dass ouni d'Enquêtékommmissioun, ouni d'Enquêtékommmissioun et vläicht souguer nach e bësse méi laang gedauert hätt.

► **Une voix.**- Ah!

► **M. Gilles Roth (CSV).**- Elo, dräi Joer méi spët, Här President, läit dann deen neien Text um Dësch. An deen differenzéiert sech, wat seng Struktur ugeet, nëmme minimal vum Text, deen d'Commission d'enquête an d'CNPD 2013 zougestallt kritt hunn, wat jo u sech eng gutt Saach ass. An duerfir just e puer Detailfroen.

Am Detail näamlech schénge et, wéi wann deen neien Text vun de Règlements grand-ducaux awer vläicht e bësse méi geheimdëngschtfrëndlech, fir dat dann emol esou auszedrécken, a manner favorabel a puncto Sécherheet fir de Bierger wier - op eenzelne Punkte just -, wéi dat 2013 bei de Règlements grand-ducaux de Fall war.

Firwat? Mä den Artikel 3 mat der Oplëschung vun den Donnéeën, déi an der Datebank vun dem Geheimdëngscht kënne gespäichert ginn, deen ass largement manner prezis ewéi 2013. Dat neit Reglement erlaabt näamlech, all perséinlech Donnéeën ze stockéieren, déi de Geheimdëngscht am Kader vu sengen Operatiounen erheift.

Am Reglement vun 2013 waren 23 prezis Kategorie vu perséinlechen Donnéeën vu physischen a moraleschen Persounen opgezielt ginn. An hirem Avis iwwert de Reglement vun 2013 hat d'Dateschutzkommissioun souguer gefrot, fir dës 23 Kategorien nach méi ze prezisiieren.

An duerfir ass eigentlech meng Fro: Wat sinn d'Ursachen, firwat dass op dësem Punkt d'Regierung hei eigentlech de Wee zréckgeet an net méi prezis Kategorien, esou wéi dat vun der CNPD gefuerdert war, aféiert?

Den Artikel 4 vun dem Projet de règlement grand-ducal, dee gesäit vir, dass eréischt zéng Joer, nodeems eng perséinlech Donnée vun engem Bierger an d'Datebank vum Geheimdëngscht agedroe gouf, muss gekuckt ginn, ob de Geheimdëngscht dës Donnée nach iwwerhaapt brauch. Zéng Joer! Am Reglement vun 2013 huet missen all fénnef Joer kontrolléiert ginn, ob de Geheimdëngscht dës Donnéeën nach brauch. D'Dateschutzkommissioun, déi war souguer méi wäit gaangen an hat deemools gefrot, fir souguer eng Iwwerpréiwung ze maachen an enger Zäitlimit vun all dräi Joer.

Och do meng Fro un d'Regierung: Firwat eigentlech dës Réckschrëtt an der Zäit, dat heescht, dass een erlaabt, zéng Joer laang Donnéeën ze stockéieren, ouni dass dat muss kontrolléiert ginn?

Den Artikel 9, dee gesäit vir, dass d'Données de journalisation - wat ass dat? Mä dat sinn déi Donnéeën, déi ee brauch, fir ze kontrolléieren, wéi en Agent Zougrieff op wéi eng Donnée geholl huet - mussen just nach dräi Joer - also dräi Joer - gehale ginn. Am Reglement vun 2013 waren dat zéng Joer, also méi wéi dräimol méi laang. Dës Réckschrëtt schränkt sécherlech d'Aarbecht vun de Kontrollautoritéiten zum Deel awer massiv an. An anere Wieder kann d'Kontrollautoritéit hire volle Contrôle just iwwert déi lescht dräi Joer maachen, de Geheimdëngscht dierf d'Donnéeën awer vill méi laang a senger Datebank halen. Dat ass, fir mech perséinlech zumindest, onlogesch. An dat schénge mer och net am Geescht vun de Konklusiounen vun der Enquêtékommmissioun ze sinn.

Och do d'Fro un d'Regierung: Wat fir eng objektiv Argumenter gëtt et, fir dee Réckschrëtt ze maachen?

Ze bemierke schlussendlech, dass am Reglement vun 2013 déi Persounen, déi en Accès op d'Données de journalisation haten, limitativ opgefouert waren. Dat neit Reglement gesäit net vir, wien all d'Données de journalisation dierf kucken a virun allem änneren.

Duerfir ofschléissend, Här President, Dir Damen an Dir Hären, d'CSV stëmmt Jo zu dësem Gesetzesprojet a mir droen dee mat. An deem Sënn sinn dës Remarquen an engem konstruktive Geescht ze verstoen. A mir wäerten eis och abréngen, fir all eventuell Nobesserungen am Sënn vum verbesserte Rechtsstat ze ënnerstëtzen.

Ech soen lech Merci fir d'Nolauschteren.

► **Plusieurs voix.**- Très bien!

► **M. Mars Di Bartolomeo, Président.**- Merci och dem Här Roth. Domat si mer um Enn vun

eiser allgemenger Diskussioun ukomm. An d'Wuert, géif ech emol unhuelen, huet elo direkt de Premier- a Statsminister.

Prise de position du Gouvernement

► **M. Xavier Bettel, Premier Ministre, Ministre d'État.**- Här President, Dir Damen an Dir Hären, fir d'Éischt vläicht direkt, fir dem Här Roth ze äntwerten: D'Règlements grand-ducaux si Projete vu Règlements grand-ducaux. Mir hu se elo un d'CNPD geschéckt an och un de Conseil d'État. A mir wäerten d'definitiv Versioun dann unhuelen, wa mer och déi zwee Avisen bis hunn. Ech soen lech Merci och fir Ären Input, mä, wéi gesot, déi definitiv Versioun ass nach net adoptéiert. Mä ech wollt, en toute transparence, esou wéi Der och gesot hutt, lech se awer matdeelen. An dofir och Merci fir den Input!

Här President, Dir Damen an Dir Hären, ech wëll och all den Orateure Merci soen. Hei ass e wichtigen Text. E wichtigen Text, well, wa mer déi zwee grouss Kapitelen am Fong vun deem Text géife resüméieren, wier et eng Keier: méi kloer definéiert Missiounen, an op där anerer Säit: eng kloer strukturiert Hierarchie, an och wéi eng Moyenen dierfe benotzt ginn a wéi de Fonctionnement och ass. An de Contrôle, wéi dee sollt organiséiert ginn, deen internen an externe Contrôle och virun allem.

Ech ginn net an den Historique an iwwer firwat, wéi, wat oder wou. Dësen Text hunn ech hei op der Tribün déposéiert den 2. Abrëll 2014. An där Zäit sinn d'Avisen komm vum Conseil d'État, vun der CNPD, vun de Beruffschamberen, vun der Mënscherechtskommissioun. An am Fong hate mer iwwer zwee Joer elo Zäit, fir iwwert déi verschidden Detailer - an ech soen och Merci dem President vun der Kommissioun -, eben och zesummen ze kucken an en Text ze maachen, deen de Realitéiten entsprécht.

Ech si mer bewosst, dass bei verschiddene Leit, wéi d'Aarbechten ugefaangen hunn, e gewësst Mësstraue war vis-à-vis vun engem Service, well een ebe gesinn huet, dass een als politesch Autoritéit vläicht net déi néideg Kontroll hat, dat néidegt Vertrauen hat vis-à-vis vun engem Service, deen awer ganz, ganz wichteg ass am Fonctionnement vun engem Stat! An ech mengen, dass en gros - an ech wëll elo net hei falsch verstane ginn - awer eng grouss Majoritéit hei am Sall d'Wichtigkeet vun engem SREL an och, dass et esou e Service gëtt, awer net a Fro stellt.

Ech hu gesot „eng grouss Majoritéit“, Här President, fir den Här Baum, net dass ech falsch verstane ginn.

D'Basis vun der Aarbecht, déi mer gemaach hunn, woren d'Recommandatiounen vun der Enquêtékommmissioun, a firwat och awer eng Rëtsch vu Punkten hu missen nach drakommen, ass och d'Entwécklung: d'Entwécklung an de leschte Jore vun der Technologie, a fir eis eben och un d'Realitéiten unzepassen.

Mir hu matkritt déi lescht Wochen, Méint a Joren, dass jonk Leit, déi gëschter keng Virgeschicht haten, op eng Keier a Syrien sinn a kämpfen, a wou Elteren an aner Leit iwwerhaapt net matkritt hunn, wéi eng Radikalisatioun doheem bei hinnen am Zëmmer geschitt ass! Doheem am Zëmmer! An dass se iwwer Videoen, iwwer Facebook, iwwer Kontakter, déi se geknäppt hunn, vu gëschter engem, dee keng Geschicht hat, haut zu Kämpfer gi si fir den Islamesche Stat. Jo!

An de SREL huet eng preventiv Roll. A mir alleguerte wëllen évitieren, dass jonk Leit ouni Geschicht och vun haut op muer op eng Keier op eng terroristesch Bunn kommen.

Den Avis vum Conseil d'État wor och ganz wichteg. A wat fir eis elo wierklech bedeiend war, wor, déi éischt Saach, dass kloer definéiert géif ginn, wéi eng Missioun de Service sollt hunn. An Zukunft wësse mir genee, wat mir vun engem Service de renseignement ze erwaarden hunn, wat seng Aufgabe sinn an och, wou d'Limiten - wou d'Limiten! - vu senger Missioun sinn. Et ass kloer definéiert, wat se kënne maachen a wat se net kënne maachen!

An hei ass scho gesot ginn, dass de politesch Volet ausgeschloss ginn ass, mä et ass awer nach méi wichteg, ze soen, wat se kënne maachen! Well wa mer just eppes ausschléissen an net kloer definéieren, wat awer d'Missioun ass, kéint ee sech och d'Fro stellen, wou dann déi Missioun och géif ophalen.

D'Definitiounen vun den Aktivitéiten, déi se och maachen, ass, d'Menace virun allem ze évitieren. An d'Menace, och déi muss gutt definéiert ginn. An déi ass net vum Service selwer, wou se



definéiert gëtt. Dat ass och wichteg, dass een net e Service huet, dee selwer décidéiert, wat wichteg ass oder net. Dir hutt virdrun eng Hierarchie, an ech brauch elo net an den Detail ze goen, wat den Direkter kann erlaben, wat de Comité...

An ech sinn och ganz dankbar, Här President, dass de Vizepremier an de Justizminister och heibanne bliwwen si fir de ganze Suivi vun deenen Debatten, well dat sinn - wann do-bausse jo net gesot ginn ass, wien, wat derbäi géif setzen -, dat sinn déi zwee Ministeren, déi mat mir zesumme mat de Leit vum SREL déi wichteg Etappen zesummen diskutéieren! Et ass net hei eng Décharge vun engem Premier, deen net d'Verantwortung wëllt droen!

Et ass am Text jo kloer, dass de Premierminister och responsabel ass vum SREL. Mä ech sinn der Iwwerzeegung, dass et gutt ass, dass déi Persounen, déi d'Justiz an och d'Force publique bei sech hunn, awer och au courant sinn iwwer wat geschitt an och zesummen en Échange kennen hunn a mir dann d'Vertraue ginn, wann Décisiounen ze huele sinn, wou mer mat hinnen zesummen awer och eng breet Consultation hatten.

An déi Aktivitéiten, Här President, ech hunn et virdru gesot, déi si kloer opgezielt an engem Artikel. Dat sinn den Espionnage, d'Ingérence, den Extrémisme à propension violente, d'Prolifération d'armes de destruction massive, etc. an etc.

Wat wichteg och an deem doten Dossier ass: dass och duerno, wann den Direkter bis eng Propos gemaach huet, awer och dee Comité - well hei ass virdru gesot ginn: Wat ass eng Menace? Wat ass d'Proportion? Wéi, wat oder wou? - eben zesumme mam Service en Échange huet, fir och déi definitiv Décisioun ze huelen.

Déi Décisioun, déi mir huelen, Här President, ass net eng, déi aus der Loft gegräff gëtt. Dat ass eng Décisioun, déi vu Riichtere validéiert ginn ass. Dat ass eng, wou se gréng Luucht vun engem Direkter kritt hunn, dee gesot huet: „Jo“, déi vu Riichtere gesot kritt hunn: „Jo“, an déi bei eis kommen, fir déi lescht definitiv Ennerschrëft ze kréien, fir déi Mesuren och kënnen ze huelen.

Dowéinst ass et fir eis wichteg, dass déi dote Punkte kloer sinn. Dat heescht, wat ee ka maachen, wien et ka maachen an och duerno, wann et bis gemaach ass, wien et kontrolléiert! Dat op externer Basis. An dat ass an der parlamentarescher Kontrollkommission, déi immens wichteg ass, well se och eng Fuerderung war, déi mer jorelaang hatten. An elo ënnert der Presidentschaft vum Claude Wiseler schéngt se jo awer och gutt ze funktionnéieren an och e gudden Échange ze hu mat de Verrieder vum SREL.

Den Delegéierten ass och net e Fusibel fir mech. Den Delegéierten ass, an et ass och virdru gesot ginn, dat ass déi Persoun, där et awer méiglech ass, fir bei deene Sitzungen a bei deem „everyday business“ vun engem Service de renseignement derbäi kennen ze sinn. Et ass eng Vertrauenspersoun, déi de Ministère d'État an de Premierminister representéiert an déi dann och den „daily business“ matkritt. Huet mer et net iwwel, dass ech net all Dag kann am SREL sinn, fir ebe bei Décisiounen, déi ze huele sinn, och dat kennen ze maachen. An dowéinst ass déi Persoun, den Delegéierten, deen, deen dann eben och do derbäi ass.

Mir hunn de Comité ministériel, mir hunn den Avis vun de Magistraten. Dat heescht, dee Contrôle externe ass do an deen ass och fir eis ganz, ganz wichteg.

Zu de verschiddene Punkten, déi hei just soulevéiert gi sinn, wéi zum Beispill déi prezis Fro vum Trojaner, deen do kéint Toun ophuelen oder Biller ophuelen, muss ech soen, dass ech der Meenung sinn, dass mer am Paragraf (2) vum Artikel 8 d'Prezisioun jo hunn, dass et ass fir «des méthodes destinées à l'observation dans un lieu privé qui n'est pas accessible au public». An dat ass jo am Fong fir d'Leit opzehuelen och geduecht. Dat heescht, wa mer d'Leit géifen ophuelen, géif dat éischter fir mech an den (2) fale wéi an den c) vun deem Trojaner, well et ass jo eng Mesure, wou een d'Leit ophëlt, den Toun an och Biller kann ophuelen. Mat enger Webcam kéint een dat jo och maachen.

Mä wéi gesot, Dir hutt och d'Fro gestallt iwwert den Trojaner. Ech wëll elo net hei op der Tribün - an Här President, ech hoffen, d'Deputéiert verstéi mech awer - soen, bei wem mer et bestellen, wie wat gemaach huet, bei wem et ass. Et sinn och verschidde Saachen an deem dote Service, wou ech lech elo just ka soen, dass den Trojaner net hei zu Lëtzebuerg kaaft ginn ass,

mä am Ausland kaaft ginn ass. Mä frot mech net elo, fir hei op der Tribün verschidden Donnéeën ze ginn!

Et si verschidden Deputéiert, déi eis och ëmmer soen: „Hei, kënnt Der eis soen, wat dem SREL seng Missioun sinn?“ De Prinzip vum SREL ass jo eng preventiv Missioun. An dofir ass et awer och immens wichteg, Här President, an ouni elo wëllen eppes ze verstoppfen, mä dass awer och d'Aarbechte vum SREL op operationeller Basis musse kennen diskret behandelt ginn, well soss huet et kee Wäert, e SREL ze hunn, wann een op der Place publique muss diskutéieren, wat se maachen.

Ech wëll just hei betounen - well et ass jo och gesot ginn, dass jo verschidde Mesurë ganz intrusiv sinn, wéi zum Beispill bei de Leit e Mikro kennen ze installéieren oder eppes opzehuelen -, dat ass awer wierklech limitéiert am Paragraf (2) bei der Matière vun Terrorismus!

An ech hunn et schonn och op enger anerer Plaz gesot, Här President, dass et a mengen Ae fir d'Bekämpfung vum Terrorismus..., well et muss ee jo wierklech Punkten hunn! Et ass jo net, dass elo einfach e Sammelsurium vun Trojaner installéiert géife ginn oder vu Mikroen géifen installéiert gi bei Leit. Et muss jo schonn awer eng Indikation sinn, dass do eng Méiglechkeet och besteet, dass een an déi Richtung kéint goen an, wéi gesot, soubal Informatiounen do sinn, déi och un de Parquet weidergeleet ginn. Well mir sinn eis jo och do eens, dass dat déi sinn, déi dofir kompetent sinn. Dass déi also bedénkt si just fir en cas de terrorisme an deem dote Fall vum Paragraf (2), an dofir ass et a mengen Aen immens wichteg, dass mer och déi Moyenen eis ginn, fir awer den Terrorismus, och wann et intrusiv Moyene sinn, och kennen ze bekämpfen.

Här President, ech ginn elo net op dee ganzen Historique an. Ech hunn et scho virdru gesot, déi meescht Riedner hunn et schonn zitéiert. Fir mech ass et wichteg, dass mer just elo... An ech wëll och net op d'Primm agoen. Mir hu gekuckt wierklech, de But ass jo net, fir iergendengem eppes ewechzehuelen! Hei gëtt jo gemaach, wéi wa mir d'Aarbecht vun de Mataarbechter vum SREL net géifen honoréieren. Et ass keen heibanen, kee vun deene 60 Deputéierten a vun den 18 Regierungsmemberen, deen der Meenung ass, dass d'Aarbecht vum SREL net eng schweier Aarbecht ass an net eis Unerkennung soll kréien. Keen huet dat hei behaapt!

Mir hunn awer en Avis vum Statsrot kritt, deen de Risk mat sech bruecht huet, dass d'Primm ganz géif ewechfalen, wou duerno eng gréisser Zomm géif ewechfalen. An déi Leit vum SREL, mir sinn eis däers och bewusst... An ech mengen, d'Primme leie jo tëschent 21.600 a 27.600 Euro, wat eng Unerkennung och ass vis-à-vis vun där Aarbecht, déi se maachen. An elo, mat där Disposition, wou mer soss e Risk gehat hätten, dass Dausenden an Dausende vun Euro ewechgefall wären, elo, wou déi Primm jo, déi net pensionnabel war, als pensionnabel erkläert ginn ass, mécht dat en Ennerscheed vun 147 Euro d'Joer.

Mir wollten net de Leit vum SREL déi Primmen - Prime d'astreinte oder Prime de risque oder déi Prime générale, déi se am Moment hunn - ewechhuelen, mä mir wollten déi verteidegen esou vill wéi mer konnten. An dofir, mengen ech, dass mer vis-à-vis vun deem Montant, deen ech elo just zitéiert hunn, déi 147 Euro, an deen nach, wéi scho vu verschiddene Leit hei gesot ginn ass, wann déi ganz Aarbecht iwwert d'Primmen diskutéiert gëtt... Mir musse kucken, wéi mer vläicht kennen, fir dass d'Leit och näischt verléiere vis-à-vis vun der Aarbecht, déi se maachen, och bei de Leit vum SREL eng Léisung fannen.

Mä wéi gesot, dat doten, den Text wier soss blockéiert gewiescht, mir hätten eng Opposition formelle vum Statsrot kritt. A mir hunn eis och engagéiert - Dir wësst jo, dass och zwou Conciliationsitzungen och waren -, dass dat doten net de Prinzip ass, deen d'Regierung wëllt hunn. Au contraire! Mir wëlle kee Précédent heimadder schafen!

Här President, Dir Dammen an Dir Hären, ech si frou, wa mer haut den Text stëmmen, mat deem mer e moderne Service de renseignement kréien. Mä ech wëll hei net ophalen, ouni lech awer ze soen, dass ech der Madamm Woltz an hirer Équipe, als Direktesch an zesumme mat all hire Mataarbechter, e grouse Merci wëll soen a virun allem och hei offiziell mäi Vertrauen ausdrécken. Et ass e Service, dee keng einfach Tâche huet. Et ass e Service, deen ech als Premierminister brauch fir eben déi wichteg Tâchen, déi an engem Statsministère och sinn, fir d'Sécherheet vun deem Land ze garantéieren, an dee mat ee vun den Haaptakteuren ass.

An ech brauch se net nëmmen eleng als Statsminister, mir brauchen se allegueren, wa mer an enger Gesellschaft wëlle liewen, wou awer d'Libertéiten net duerch Fanatiker zerstiéiert ginn

oder an där net verschidde Leit, well se eben eis Wäerter, déi mir hunn, wëllen zerstiéieren, dann op eng Kéier d'Iwwerhand géife kréien.

Dowéinst, et ass keng Observation politique, dat hei ass preventiv. An ech maachen der Madamm Woltz richtig Vertrauen, fir dass déi Aarbecht och gutt gemaach gëtt! Merci!

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Statsminister.

An ech géif lech proposéieren, dann direkt zur Ofstëmmung iwwert de Projet de loi 6675 iwwerzegoen.

(**Interruptions et hilarité**)

Jo, wa mäin...

► **Plusieurs voix.** - Et geet net!

► **M. Mars Di Bartolomeo, Président.** - Ah, voilà, d'Maschinn ass lancéiert!

► **Mme Viviane Loschetter (déi gréng).** - Et ass en Trojaner drop.

Vote sur l'ensemble du projet de loi 6675 et dispense du second vote constitutionnel

► **M. Mars Di Bartolomeo, Président.** - Fir d'Éischt déi perséinlech Stëmmen. Dann d'Procuratiounen.

(**Brouhaha**)

► **Plusieurs voix.** - Mäin Apparat geet awer net!

► **M. Claude Haagen (LSAP).** - Dir musst ënnen do drécken!

► **Mme Claudia Dall'Agnol (LSAP).** - Aah oui! En ass awer gaangen!

► **Mme Nancy Arendt (CSV).** - Här President, den Apparat geet net!

► **M. Mars Di Bartolomeo, Président.** - Geet Ären Apparat net?

► **Mme Nancy Arendt (CSV).** - Ech hu keen Zougrëff.

► **M. Mars Di Bartolomeo, Président.** - Majo da maache mer dat manuell.

D'Ofstëmmung ass eriwwer. Ech hunn zwar déi 60 Stëmmen.

► **Mme Nancy Arendt (CSV).** - Et ass gaangen.

► **M. Mars Di Bartolomeo, Président.** - Ass et gaangen? Ah okay. Dat war d'Undroung.

► **Mme Nancy Arendt (CSV).** - Mat Retard.

► **M. Gast Gibéryen (ADR).** - Besser spéit ewéi ni.

► **M. Mars Di Bartolomeo, Président.** - De Projet de loi ass mat 55 Jo-Stëmme géint 5 Nee-Stëmmen ugeholl.

Ont voté oui: Mmes Diane Aehm (par Mme Martine Mergen), Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz (par M. Claude Wiseler), Serge Wilmes, Claude Wiseler, Michel Wolter et Laurent Zeimet;

MM. Marc Angel (par M. Roger Negri), Frank Arndt, Alex Bodry, Mmes Taina Bofferdin, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur (par M. Eugène Berger), M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lamberty, Edy Mertens et Mme Lydie Polfer;

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini.

Ont voté non: MM. Gast Gibéryen, Fernand Kartheiser et Roy Reding;

MM. Marc Baum et David Wagner.

An et bleift mer just nach d'Fro ze stellen, ob d'Chamber bereet ass, d'Dispens vum zweete Vott ze ginn.

(**Assentiment**)

Jo, dann ass dat esou decidéiert.

4. 6960 - Projet de loi portant création d'un Comité pour la mémoire de la Deuxième guerre mondiale et portant

1. modification de la loi modifiée du 25 février 1967 ayant pour objet diverses mesures en faveur de per-

sonnes devenues victimes d'actes illégaux de l'occupant;

2. abrogation de la loi du 20 décembre 2002 portant création d'un Centre de Documentation et de Recherche sur la Résistance;

3. abrogation de la loi du 4 avril 2005 portant création a) d'un Comité directeur pour le Souvenir de l'Enrôlement forcé; b) d'un Centre de Documentation et de Recherche sur l'Enrôlement forcé

A mir géifen zum leschte Punkt vun eisem Ordre du jour iwwerzegoen. Et ass de Projet de loi 6960 fir d'Schafung vun engem Comité fir d'Erënnerung un den Zweete Weltkrich. An d'Wuert huet direkt de Rapporteur, den honorabelen Här Bodry.

(**Consultation interne**)

5. 6675 - Projet de loi

1) portant réorganisation du Service de renseignement de l'État;

2) modifiant

- le Code d'instruction criminelle,

- la loi du 15 juin 2004 relative à la classification des pièces et aux habilitations de sécurité, et

- la loi du 25 mars 2015 fixant le régime des traitements et les conditions d'avancement des fonctionnaires de l'État

6589B - Proposition de loi modifiant 1. la loi modifiée du 15 juin 2004 portant organisation du Service de renseignement de l'État; 2. l'alinéa 1^{er} de l'article 88-3 du Code d'instruction criminelle (suite)

Retrait du rôle des affaires de la proposition de loi n°6589B

Ah jo! Ech ginn dovunner aus, dass domat och d'Proposition de loi evakuéiert ass?

(**Assentiment**)

Voilà, dann ass dat esou decidéiert. Pardon! Et war esou selbstredend, dass ech d'Fro net gestallt hunn. Mä d'Antwort ass ginn.

De Rapporteur huet d'Wuert, den Här „Boodry“.

6. 6960 - Projet de loi portant création d'un Comité pour la mémoire de la Deuxième guerre mondiale et portant

1. modification de la loi modifiée du 25 février 1967 ayant pour objet diverses mesures en faveur de personnes devenues victimes d'actes illégaux de l'occupant;

2. abrogation de la loi du 20 décembre 2002 portant création d'un Centre de Documentation et de Recherche sur la Résistance;

3. abrogation de la loi du 4 avril 2005 portant création a) d'un Comité directeur pour le Souvenir de l'Enrôlement forcé; b) d'un Centre de Documentation et de Recherche sur l'Enrôlement forcé (suite)

Rapport de la Commission des Institutions et de la Révision constitutionnelle

► **M. Alex Bodry (LSAP), rapporteur.** - Merci, Här... Bartolomeo!

(**Hilarité**)

► **M. Mars Di Bartolomeo, Président.** - Wéi hat Der gesot, Här „Boddry“?

(**Hilarité**)

► **M. Alex Bodry (LSAP), rapporteur.** - Här Bartolomeus.

(**Hilarité**)

Här President - da si mer eis eens -, Dir Dammen an Dir Hären, et ass mer eng Freed, fir de Rapport hei virzedroe vun der zoustänneger Kommission zu dem Projet de loi 6960, wou et sech drëm dréit, fir hei zu Lëtzebuerg e Comité fir d'Erënnerung un den Zweete Weltkrich ze schafen.

Et ass mat dëser Diskussioun déi drëtte Kéier eigentlech, dass mer eis an engem relativ enken Zäitraum beschäftege mat Froe vun Zäitgeschicht, wéi mer mat der Zäitgeschicht ëmzegoen hunn a besonnesch och mat där Period während a ronderëm den Zweete Weltkrich. Dat